

滇文丛录

卷五十三
至五十六

陳議類八

奏爭滇緬界務摺

趙鶴齡

奏爲滇緬界務關係大局安危懇恩據實力爭以固國防而定民心恭摺仰祈聖鑒事竊滇緬界務分西界南界北界北段界綫有二一係由大金沙江爲界一係光緒二十六年總理衙門照會英使聲明現管地方以小江爲界自緬淪於英大金沙江界限久未完全而江內橫亘數千里之野人山亦漸被蠶食近數年所爭持者名爲滇緬界務實則騰野界務耳自光緒三十一年二月經已革道石鴻韶與英領事烈敦會勘該革道罔利徇人謬以小江源爲界烈領事得隴望蜀復執定以大嘜口爲界舐糠及米並無騰野界限之可言當經外務部查其失地甚多寓書斥駁幸烈領事照會有雖經蓋印不過明此圖之真僞不能爲定憑等語宣統二年外務部據雲貴總督咨轉咨商使重勘該使置之不理隨於是冬進兵佔據片馬毀我學堂勒我民捐奪我祠堡設礮台於我高黎貢山侵據我小江以北茶山土司地反客爲主強辭責我以質證臣窺英人要挾之目的不僅在片馬而在光緒三十一年會勘所及

之地且不僅在石革道誤勘之地而在烈領事勘擬定界之地查石革道勘擬之界從尖高山起由摩石河頭直至歪頭山過知非河經張家坡登高良共山又抵九角塘河順小江邊復另行橫出上至小江源又至板廠山止是割數百年向化于我之騰越保山雲龍龍陵各屬土司地而棄之如遺也若照烈領事所勘從尖高山起東至胆札山過狼牙山磨石河頭搬片子口姊妹山大啞口茨竹子口片馬了口直至高黎貢山北往西藏凡水入金沙江者概歸緬甸管理則是由滇而蜀而藏邊地被其割去者當以數千里計非惟該領事勘擬之界萬難允許即石革道擬定界線亦斷不能輕以畀人今籌和平之解決非做到退兵重勘不可重勘非扼定該領事聲稱不爲定憑之照會不可前議既歸無效則重勘又非詳徵切實證據以杜彼族之口實不可案萬國交涉均憑正式約牘而以最後之簽定爲信守茲界之鉄案不必遠稽志乘援引條約即據光緒二十八九兩年英使照會而已定查光緒二十八年八月外務部致滇督電准英使照稱以小江即恩買卡河以東之分水嶺作爲定界二十九年十二月致滇督電英使照稱近英員查明天然界綫係自東流入恩買卡河即小江諸江之分水嶺等語夫曰作爲定界則彼此永守不得輾轉歧異可知曰

請以則言發于彼而求我允應之雙方同意即生效力如堂堂公使正式之文牘爲不足據將安據耶曰恩買卡河以東曰自東流入恩買卡河可見此嶺之西爲恩買卡河即恩梅開江而恩梅開江以東最近之嶺北爲他憂甲大山南爲扒拉大山山勢綿亘適居小江恩梅開江之間他憂甲大山盡處又即小江與恩梅開江合流處循此至北而南至尖高山其爲天然界綫毫無疑義何能影射遼絕之高黎貢山耶查高黎貢山在騰越東爲保山縣騰越廳東段交界之處與金沙江即片勒瓦諦江無涉潞江在保山縣境中間隔騰越廳與野人山無涉龍江在騰越東其水南段入片勒瓦諦江與恩買卡河隔水甚多亦與野人山無涉至于大啞口在小江以內由該地前往小江約一百六七十里其中茨竹派賴等寨係明光楊左兩撫夷舊治有道光年間承襲土把總左大雄等兵部札付可憑該撫夷等因兵燹遷住漢地今各夷寨仍受其撫馭石草道曾據以駁覆並准烈領事議仿前租猛卯三角地成案所有大啞口以外村寨地方每年擬出緬洋一千伍佰元作爲永租是已默認爲中國屬地矣持彼之矛入彼之盾尙何証據之外求而現佔之片馬了口爲保山屬登埂土司所轄確鑿可據遑論騰野界務與保山更風馬牛不相及耶且英使于光緒二

十八年照會既與小江即恩買卡河以東之分水嶺爲界旋于二十九年照會以小江諸江東流之分水嶺爲界彼此恪守矣乃未幾而住滇之思茅領事務謹順照會又稱擬將尖高山以北片勒瓦諦江即大金沙江與龍川路江兩江間之分水嶺作爲中緬界綫未幾而烈領事會勘又擬以高黎貢山之分水嶺爲界界務何事分水嶺無定名忽而小江以東之分水嶺忽而小江諸江之分水嶺忽而高黎貢山之分水嶺出爾反爾唯意所向幾分水嶺而滇地盡入其彀中外古今有是事理耶然則將以何處爲定查北段界務係以野人山交界既經英員查明恩買卡河即恩梅開江在野人山地英使累執小江西即恩買卡河以東之分水嶺作爲交界自應仍照外務部前議從尖高山起至石我獨木二河之間循恩買卡河至小江西恩買卡河以東之分水嶺爲止乃確切不易辦法與英使所稱天生極妙界限亦適相符合其次亦應從尖高山起過狼牙山歪頭山張家坡登高良共山抵九角塘河順小江西北流直入恩買卡河會流處爲界然已失地不少矣若一誤再誤而遷就烈領事所勘或石革道原勘則迤西迤南沿邊土司地不保安有雲南打箭爐巴塘裏塘等地不保安有四川藏屬之擦瓦龍一帶不保安有西藏駸駸南下牧馬英無亡矢遺鏃

之費席卷西南半壁而長江流域亦非吾有土地有限敵欲無窮朝廷縱不愛滇屬土司地獨不愛滇乎縱不愛藏屬沿邊之地獨不愛西藏乎縱不愛滇藏獨不愛川黔粵楚及長江流域諸省乎又况均勢之局破則連雞之兆成英擅優利法詎甘于旁觀自餘諸國亦將投袂而起各求大欲觀英佔片馬法遂增兵河內而俄于伊犁蒙古日于東三省德于山東近日之舉動可推測矣近聞有以英人所索邊界久在化外擬照烈領事原勘讓與之說滇中函電紛馳一日而責問者數羣情驚疑人心搖動咸有誓死力爭與土俱亡之志合無仰懇天恩勅下外務部雲南總督查照烈領事會勘時聲明雖經蓋印不爲定憑照會暨光緒二十八九年英使照請以小江分水嶺爲界等項成案據實力爭妥慎辦理設再爭而無效可否商交海牙平和會裁判之處出自聖裁臣遙望鄉關近覘時局憂憤所極不敢不披瀝直陳是否有當伏乞皇上聖鑒訓示謹奏

邊防策

段之屏

滇南孤懸萬里所可患者游勇其一也開化馬白關外處處巢窟爲游勇出沒之區本年春游勇爲法人大創流入滇邊滇防之不固誠不可不早籌也籌之之法總以

屯田爲最善古之名不妨剽襲也古之法不防變通也不然滇邊二千餘里在在皆宜防守計腹地之闢尙不及邊關之廣必欲嚴其鎖鑰守以重兵雖盡滇之民竭滇之財亦不足以供邊之用爲今之計除以各鎮營兵照舊分防外莫若於邊沿要地就近招募游勇寓兵於農採取屯墾諸法以爲長久之計務使野無曠土而邊有實兵豈非善自爲謀之道哉謹就管見求實用臚列如左

一設防周密必兼屯墾也滇南邊地最闊如開廣臨元普洱騰永龍陵維西無非今日應防之地其間要隘甚多固非營兵所能盡守且盡用營兵糜費旣多轉輸不易不如就近招募游勇兼設屯墾以實邊備蓋邊境久荒則穀貴穀貴則民散民散則兵勢必弱積荒皆熟則穀賤穀賤則民衆民衆則兵力易強必然之理也以兵養兵以民衛民兩者不失而度支已省不致有師久糧匱之慮此護邊實塞之一計也

一屯墾一法原期持久也滇南饑瘠平日仰給各省協濟恒慮入不補出現日辦理邊防計地數千里兵餉必籌自庫款勢必絀於支持計維於沿邊踏勘可耕之土除現在成熟田地及已荒而業戶自願隨屯開墾者勿庸招墾外餘則計畝分屯科租貸種有兵之處督兵爲農無兵之處募民開墾務期遠近相望首尾相應至設立屯

長營官隨時講武及農隙訓練兵勇一律號召所在賞罰必嚴俾無事則無兵不農有事則盡農皆兵歲熟徵租價種餘糴入官以供邊儲如是則兵有餘利而無地不安國無游民而有壤皆腴也

一分防馬白足資翊蔽也其地左跨盤龍右施三岔足以扼塞河口羽翼臨元洵爲開廣要地必須分防駐守以壯聲援此外更宜間以屯墾連接河口俾深山老林之間不致終成無人之境一旦有事既免飛輓之勞亦無奔馳之苦此誠全滇之左翼邊關之要籬也

一盡力屯墾以詐禦詐也年來英法各國不惟撓我權政而且思啓封疆暗據要津明敦友誼俾我關防不便過於拒絕迨其力足兵精每每藉端尋隙越緬諸國大抵皆然今併置而不論我維盡力屯墾以五人爲伍十伍爲屯十屯爲營布列邊塞聚則爲兵散則歸農三五年中游勇皆爲良民蓋西南並邊之地強半荒衍今皆設法屯墾行見無地非民即無地非兵縱有警急敵無駐足之區民操堵禦之權甚至彼此交鋒挫敵則官不認咎失利則兵易爲援彼以狡來我以狡應此蓋以逸代勞以靜制動以實御虛以拙勝巧亦今日權變之要計也

以上四條在內則可耕可守在外則可戰可勝乘此游勇稍散時容易招徠不假多謀蓋今日之急務誠無有若屯田者也若夫便宜行令認真踏勘是在不擾民不營私之人而已然則欲固邊防可不以得人爲先務哉

上省憲辦理泉州東西佛會械鬥並懲辦首要情形稟

李增霽

竊維除暴所以安民造福原不避禍故段成公斬郭晞士卒邠州以安寇子翼誅賈復將官潁川以治非關強項保民者固應如斯也知府以草茅下士適蒙拔擢委任泉州抵郡以來察看各屬情形時虞隕越每思竭忠盡智以圖報稱乃割雞方期小試而快牛竟致破車緣於四月初八日晉邑白耆廟東西佛會因口角細故起衅於郡城內外列械闔門南門新橋一帶白晝殺人通衢罷市合郡驚惶時兼饒平詔安土匪不靖風潮日亟尤爲可慮知府甫經抵任值此現狀不得不從嚴下手用是督縣會營即時拿辦當場捕獲著名東佛會匪李牛王箭二名西佛會匪林山吳灶二名分別懲治一面勸令各街商民照常開市一時風潮借以頓息曾經稟報在案詎料中營劉都司金華出爲袒庇謂李牛一犯係該營日兵李金龍即使犯案亦須移革方可責懲並主唆兵弁赴廈担控洪提督不察遽行咨參以圖洩忿其實誤矣查

李牛一犯積案如山姓名狡變卷查前軍門黃提督任內飭拿小刀會首之李遇八
卦會匪之李虞又被控搶劫各案內之李午以及縣署掛印刑書之李錦龍即其人
也該犯以鬼蜮之行蹤濟豺狼之凶暴故能屢逃法網作奸犯科今幸罪惡慣盈自
貽伊戚又忽冒充營卒以爲護符其詭譎已可概見方訊辦該犯之時觀者如堵無
不極口稱快且係營縣當場捕獲手執火槍千人共睹不容抵賴即該犯初供亦知
罪無可追避重就輕自認幫門不諱此等著惡若不按律懲辦何以安閭閻而靖地
方就令果爲中營目養兵原以衛民抑將縱兵以害民乎是固不待置辯矣知府身
任地方與民同此休戚但能爲民除害即身蹈水火亦所弗辭若其稍受挫劬頓異
初心恐將來門畿益張不可收拾必成民變爲虺弗摧爲蛇奈何知府爲永除禍端
起見理合將該犯積案供詞備悉鈔呈伏乞憲台察核賜委詳查按律審辦並治知
府以應得之罪以爲焦頭爛額者戒知府幸甚地方幸甚

議士籌辦普洱鎮邊土民學塾呈文

普洱鎮邊土民學塾呈文

竊視學奉委籌辦普洱鎮邊土民簡易識字學塾遵於八月十二日由普起程十月
十八日返普計歷時六十六日行程三千餘里所有各處籌辦情形敬爲縷悉陳之

鎮邊開闢在思甯後進化較思甯尤先各土司經視學極力開導咸知興學利益衆情鼓舞爭認開辦二十堂申送宗族子弟上省增學十六人曾經稟報在案思甯兩屬土司向稱十三猛除猛烏烏得已淪陷及普文改設委員外現惟十猛皆隸屬於車里宣慰司宣慰政治不修各猛俱不聽令視學自六順往車里時因宣慰司致函阻止去不見面亦屬無益如望其興學必由六順逐漸推廣方能開化此時遽行強迫不惟難見成效且恐滋他疑車里而外厥惟各猛先言思茅曰六順曰猛遮曰猛籠曰猛阿曰猛腊曰橄欖壩曰倚邦曰易武共八猛地今分爲四段(一)六順距思茅三站土把總刀繼善常見漢官稍明禮義經視學勸勉承認開辦三堂並申送宗族子弟上省增學三人(二)猛遮猛籠猛阿各土司地猛遮恃強跋扈凡漢官到彼處以威則疑以恩則玩歷有年矣今望其興學頗不易易凡猛籠猛阿等處均仰其聲威聽其命令猛遮不願開辦猛籠猛阿亦不敢應承如欲興學非別用手段不爲功(三)猛腊橄欖壩兩土把總地此地盡屬擺夷漢人絕少經視學調至易武面商該土把總飭叭目頭人前來言語不通諸多隔塞必俟能通緬話者方能勸導抑或俟六順學成飭令前往勸設或易見效(四)倚邦易武兩土把總地倚邦曹土職婦

諸事不舉疲玩性成茶林荒蕪商賈蕭條伊言難於興學自是實情經視學竭力勸導勉強承認設立二堂易武伍士職婦雖係女流頗知大義現已設立一堂請石屏李貢生教讀該子應襲亦在內附學又約商家設女學一堂該已聘未娶之子婦亦在內附學視學極言興學利益現承認自明年起再爲推設二堂此籌辦思茅所屬土司學塾之大概情形也次言甯洱所屬曰整董曰猛旺俱兩土把總整董太於玩視庶政不修視學於往倚邦之前專諭前往調初四日來猛旺面議視學到猛旺時該土司尙未到又別專人前催並由猛旺土司函約不料視學自易武轉來該土司仍然未到本欲逕至整董因猛旺土司勸以烟瘴盛行不肯前進且隨從人皆染瘴疾礙難前行只好住猛旺之高酒房待伊一日不到即返該土司如此疲玩經前署甯洱縣費令於八月札調一次又經視學飛調兩次既不見面又無片紙回復藐視政體於斯爲極擬請嚴加懲辦以爲玩視政務者戒否則處處效尤恐明春再往各猛亦終徒勞無益矣猛旺土把總召國藩較整董甚爲明白經視學開導後承認開辦一堂因其地太炎熱一堂外不能多設此籌辦甯洱所屬土司學塾之大概情形也總之思茅所屬各土司地以六順較爲開通仰懇憲台隨時調至普洱責成該土

司刀繼善往勸各猛興學勸之有效優其保獎如其不勸嚴加懲責彼深明夷話又與各猛聲息相通辦理自易見效或調至思茅由廳丞委辦亦可惟猛遮太於囂張非用強力不能得斂材就範之效倚邦太於疲敝非用大劑不能收起死回生之功甯洱屬之整董土把總蠢然一物正可借此炯戒其已經承認辦學各土司均取具鈐結在案應另行列摺具呈所有奉委籌辦普洱鎮邊各土司簡易識字學塾情形理合列摺謹呈

籌辦永北化夷學校詳文

秦康齡

爲詳請示遵事案查永北學校業經歷任辦理有案知事於去年十二月二十四日到任查南區初等小學計三十餘校該地距城二三站升學諸多不便已籌設縣立第二高等小學校在南區清驛地方作該區初等小學升學之地又查西區小學甚少已飭令勸學員長督同各約紳團認真勸導本年已推廣西區小學十三校均經另文詳請立案惟北路原分二區向未設學北一區係漢藥距城二百八十里設有土知州轄治北二區係永甯距城四百餘十里設有土知府轄治信喇嘛教其人民概係摩挻西番崇拜波羅夙尙瀆樸欲推廣教育必自破除迷信始漢藥四面涼山

崇別陡峻黑夷住山漢民住垣黑夷一名老盤居高臨下強賓壓主其地爲川滇交通門戶往來商旅常被搶劫夷黨以族招族川邊徙入省者漸多生齒日繁搶劫愈盛夷衆恃險爲巢無法緝捕失主常時呼籲官署極力票緝前清差役衆多一票十數人前往正賊潛匿百不獲一幸不受傷民國改用警察人數甚少一票一人被其捆縛危險實甚因之不敢深入其地夷衆愈行肆掠知事到任伊始聞知始末痛焉傷之檢閱黑夷搶案卷宗盈櫥披閱月餘大略覽週即將到任調查情形及籌辦法具文詳報奉批所擬各節仰即遵照批飭分別專案切實妥擬詳道核轉以憑核飭遵等因在案現知事四月二十四日公出與四川鹽邊縣陳知事會哨商辦川滇邊界夷匪等案親履滾藻境內所有素常爲匪黑夷俱已聞風遠颺頭人亦潛匿不面屢督法警逐村往傳經五六日之久始傳獲五六十歲者數人來見知事查該地夷多漢少素無讀書識字之人官署文告全不知曉土司棄地不治教養毫無以故不明禮讓不識法律習染汙俗流爲賊匪擬籌治標治本二法除籌設城內團保事務所清查槍械並組織該地鄉鎮警察以爲治標之計另文詳報外其治本一法除籌辦織染傳習所招生學習亦經另案考詳而欲從根本下手期於一勞永逸非從

事教育不足以收效果彼蚩蚩頑頑現已強壯之輩固難化成而七八齡之兒童恒以千數計若不早施教育將來此輩長成賊種愈多流傳愈衆地方受害愈甚再四籌維必乘此時間推廣學校使一般兒童當可化成良民俾賊種日漸消滅詢之來見夷老耆民據稱該夷民自川邊移來業經三代聞其祖若父云該川地夷家每年約十數戶請一先生教學聞說讀書之人實在尊貴該祖父均能識字計自移滇以來即無人倡首請師教學子弟不讀書所以不聽父母教訓結黨在外數月不歸父母亦無可如何今蒙設學實在受恩聽其言詞頗知感激惟設學教育必先籌定經費方足以資永久查該地舊有漢藥汎設置把總一員每年收有羊毛火口捐一項每養羊夷戶每年納羊毛斤半名爲羊毛捐不養羊漢民年下宰殺年豬設置湯鍋每戶年出火口捐一百五十文自把總裁後此項羊毛火口捐有爲游民冒充官役私收者有未會上納者知事現與該夷老耆民商定其已經私收者無從根究此後仍照舊章抽收此項羊毛火口捐作該地設學經費該地夷甲約在三千餘戶每年約得羊毛四千餘斤以一角五仙作價約值銀六百元漢甲一千餘戶每年約得火口捐一百餘元現已商酌妥適夷甲設化夷小學十校每校教員年定薪金六十元

純用羊毛捐款漢甲智識漸開人智嚮學亦定爲小學十校火口捐不敷之數由學生自行納費本年自下學期收獲全年經費以一半作修建校舍設備校具之用以一半作教員薪金經知事開導之後漢夷兩甲耆民歡欣鼓舞均願竭力開辦並勸導各民戶子弟送入就學惟該地創辦伊始在在需人督率即成立之後亦須隨時查視俾其不敢敷衍擬設視學一員專司其事通盤籌算此項視學夫馬火食旅費每年約需銀二百餘元各校每年約需書籍表冊筆墨抵張銀共一百餘元無處籌措擬請鈞使俯念邊邑興學籌款艱難准其抽收羊毛火口捐以作該地學校經費其不敷視學及書籍等款項請照知事前次奉委籌辦普思鎮邊沿邊土民學塾及知事前著東川府時創辦東川巧家巴布涼山夷地小學例就地籌款不敷准由省款補助即請每年准補助銀叁百元俟漢蕪辦有成效再行辦理永甯土司地面小學繼期實事求是以圖發育普及使後生夷民多識文字稍知禮讓不至民流爲匪漸企同化始克副鈞使興學安邊用夏變夷之至意所有籌設永屬漢蕪土司地面化夷小學及抽收羊毛火口捐並請省款補助各節是否有當請祈核示飭遵

奏爲廢止娼妓呈事查世宗憲是剛筮昧岳于平人人賦其才八人席聘臣其書

爲呈請廢止娼妓事查世有惡風陋俗相沿數千年人人知其害人人不思去其害
未有如娼妓制度之甚者也昔在野蠻專制時代不惜犧牲女子人格以供貴族富
豪之娛樂娼妓制度之發生與存留固不足異今者世界思潮逐日變遷俄羅斯共
和國既已實行廢娼妓最多之日本近亦由島田三郎諸人之反對與各種工廠
之增多頃據該國統計報告娼妓數目比諸歐戰以前亦已逐年遞減惟我國內亂
頻仍經濟緊迫全國娼妓反有逐年增加之勢設不師快刀斬麻之智爲根本推翻
之圖則國民受其毒害正不知伊於胡底今特將廢止娼妓之理由與廢止娼妓之
辦法條列於左以備採擇

理由

(一)人道與國體上之理由夫天地生人男女同爲人類共和國家四民又屬平等
今獨存娼妓一種階級犧牲婦女之人格以博男子之金錢男女之間顯分軒輊按
諸人道既未有符揆之國體亦極有碍此應行廢止之理由一

(二)經濟上之理由夫一國國民不論男女均出其心思體力從事生產事業國富
庶可增進今計全國娼妓不下數十萬人此數十萬青年女子祇知坐食不事生產

且不惟不事生產已也並日吸男子之金錢而浪費之男子之經濟固受其影響國家之富力亦無由增進此應行廢止之理由二

(三)衛生之理由報載民國八年末京師醫士報告北京花柳病患者占病人十成之七披覽之餘深堪悲惻北京如此全國可知是娼妓一日不廢於國民衛生有極大之妨碍故欲求國民身體之健康非速將娼妓廢止不可此應廢止之理由三

辦法

(一)由內務農商兩部通令全國每省至少必設婦女習工廠一處以收容廢業之娼妓限至民國十年十二月底止一律成立分別具報備查

(二)由內務部通令全國廢止娼妓限至民國十一年十二月底止嗣後不准營業

(三)凡娼妓之有父母者令其歸家由父母妥為擇配願入婦女習工廠者聽

(四)凡娼妓之無父母有領家者由領家於限期內妥為擇配其願入婦女習工廠者領家不得抑留違者懲罰之

(五)娼妓之無父母領家者一律入婦女習工廠學習工藝每月所獲工資除清償廠中衣食費用外其餘仍歸婦女所得

(六)婦女在廠學習工藝仍可自由擇配廠中不得扣留

(七)擇配時以未患傳染病者爲限如現患傳染病症由其父母領家及工廠療治全愈方許擇配違者懲罰之

(八)民國十一年十二月底以後如發見娼妓除懲罰其父母領家外其婦女應勒令入廠學習工藝一切待遇同前

(九)娼妓之在租界者應商同外國領事按照上定限期辦理其願入工廠者仍由近處工廠收容之

(十)外國娼妓之在中國者應照會外國領事於上定期限以內一律令其歸國期限已滿如發見外國娼妓仍在中國營業應會同外國領事驅逐之

以上所陳各理由各辦法明知疏畧已極不足仰贊高深然一得之愚不敢安於緘默竊比野人獻曝之事謹上貢於鈞座之前如荷採擇施行使數千年遺留之淫惡制度一掃而空鈞座之造福於國民者豈有涯矣將來中國歷史必大書特書俾廢止娼妓一事歸美於鈞座又何所畏而不爲哉

謹呈

請國務院實行禁酒呈

席聘臣

爲皇詒實行禁酒恭呈仰祈鑒事查天下之事利害不一得失不齊使其事有利而無害有得而無失則保存之可也擴張之可也使其事利多而害微得巨而失細則改良之可也訂正之可也若其事有百害而無一得則排斥之禁止之實有須臾不可緩者以愚思之今日中國應行禁止之事不一而足而造酒飲酒兩事即應行禁止不可視爲緩圖者昔儀狄造酒大禹嘗而甘之遂疏儀狄是酒之爲害古聖人既已明詔後世周書酒誥凡羣飲者盡拘執于周以殺之其禁酒之法可稱嚴厲漢唐宋明各朝對於造酒飲酒時禁時弛大抵年歲饑荒則禁之以足民食庫帑匱乏則弛之以裕稅收是皆苟且補苴之謀飲鳩止渴之計而非富國利民之道也夫北方各省土地饒瘠所產糧食本不豐富而每年爲造酒所耗者又占十分之三故糧食一項全恃南方接濟若仍不足則美國白麪亦輸入以補充之使一旦對於造酒飲酒兩事嚴加禁止則北方糧食足敷北方之用不必南方之接濟並可塞美國之漏卮而南方每年接濟北方之米即可輸出外國以有易無似此一爲轉移每年對外貿易可以增數千萬元之收入對於國民經濟裨益夫豈淺鮮此應行禁酒之理由一夫寒則思衣饑則思食此出于人生之必要萬萬不可禁止者若酒則爲奢侈

品而非必要品故世界文明各國莫不重加課稅寓禁于征中國內亂連年閭閻貧困正宜獎勵節儉力戒奢華酒既爲無益之奢侈品與其重加課稅增人民之負擔何如嚴厲禁止圖根本之改良此應行禁酒之理由二夫酒之爲物含有強烈之刺激性故雖性情和易素不爲惡之人一朝飲酒過量忽失其高尚之品格而爲狂暴卑下之事據刑事統計表世界人民之因酒而犯罪者約占百分之三十至四十是飲酒一事足以使國民道德易于墮落此應行禁酒之理由三夫各種酒類均含酒精雖有多少之殊其能害人則一故飲酒之後莫不狂亂燒灼飲之既久則發生咳嗽肺病過敏症皮膚病胸部壓迫症恐水症以及纖維燥直人工加齡各症然此猶指其一身之害也至飲酒之人子孫受其遺傳往往爲低能爲白痴爲顛狂小則至家族之衰微大則遺社會以禍害此應行禁酒之理由四據以上四種理由觀之則酒之爲物從國家起見從個人起見均應在禁止之列或者疑欲實行禁酒必先禁造酒今中國以造酒爲業者不止數十萬家一旦禁其釀造停其營業酒戶生計必受至大影響不知國中以釀造爲業者多屬富戶多者擁有資本數萬數十萬少者亦備有資本數百元數十元今一旦實行禁酒彼等仍可移轉資本以經營他種事

業倘吾人維持少數酒戶而不惜禍害多數國民良非策之善者也又或疑國家每年所收酒稅不下數百萬元合之地方收入每年不下數千萬元今一旦實行禁酒則全國每年收入頓減數千萬元國家財政難保無支絀之慮不知國家實行禁酒每年之收入僅減少數千萬元國家不實行禁酒人民之財力將損失數萬萬元兩利相權則取其重兩害相權則取其輕吾人爲國民之利益計惟有斷然禁止掃除毒害至每年稅收減少數千萬元應由財政部另籌他項租稅以資彌補况禁酒以後民間之能力只有增加斷無縮減另行他項稅則決不至無負擔之能力此則事理至明勿庸疑慮者也或又疑中國禁止造酒則外國酒類盛行輸入勢又多一漏卮不知中國果欲實行禁酒當由外交部照會各國凡外國酒類除業已起運來華者仍准輸入外凡未起運之酒即不得再運來華以爲民害美國刻已實行禁酒一切辦法吾國自可仿照辦理並無困難之處况鴉片煙爲專銷中國之品中國果欲禁止英國政府尙允將銷華箱數逐年遞減至於洋酒價昂國人嗜之者少市場銷數本不甚多外人當無反對之理此亦容易解決之問題也方今我總理代理揆席四海具瞻當爲國民謀幸福更當爲國民除禍害果能實行禁酒則一方面可以增

進國民之幸福一方面並可掃除國民之禍害愚昧之見倘蒙採納請交內務外交
財政司法農商交通各部共同商酌妥擬辦法公布施行以阜民財而正民德所有
呈請實行禁酒各緣由是否有當理合備文呈請鑒核施行謹呈

振興中國實業應採之方針

席聘臣

今之言救國者咸知以振興實業爲唯一不二之方法顧振興實業有應採之方針
焉如航海然方針既定則意欲南而南意欲北而北意欲東而東意欲西而西雖船
行有遲速之分時間有久暫之別鼓輪前往終有達到目的之一日否則方針不定
忽東忽西雖終年飄泊海中終無達其目的之一日故中國今日不欲振興實業則
已如欲振興實業則決定進行之方針實主管全國實業最高機關唯一不二之天
職夫振興實業之方針亦不一矣揆諸歐洲先例有主張自由主義者此派以英國
之斯密亞丹爲泰斗彼以自由放任爲最良之政策個人之利己心爲支配經濟之
最高原理國家對於民業不必加以干涉但使各依其利己之思想以自由競爭則
一國之實業必有充分之發達此種主義英國十七八世紀之時曾採用之而收極
大之效果然至十九世紀遇德國採保護主義之結果遂日趨于不利之地位是自

由主義之不宜于今日中國也明矣德國保護主義首倡之者爲李士特繼起者則有羅諾瓦格拿諸人其義蓋反對自由主義而以一國之實業由政府加以保護爲原則如工廠輸出品之補助金保護關稅政策等是也此種主義德國採用之十九世紀曾握中歐實業之霸權一時國運勃興大有凌英跨美之勢然此種主義僅有益于少數之資本家及海外貿易者行之數十年社會上發生極富極貧兩階級德國之社會民主黨遂布滿于全國卒釀成數年前革命之慘劇是此種主義雖收效于一時然隱涵重大之缺點昭然不可掩飾中國今日雖可採用其一部而未可採用其全部然則欲振興中國實業究應採用何種方針乎曰中國今日所應採用者即國家生產主義是也夫中國天氣溫和地大物博人口繁盛工資低廉出其富力宜可與歐美相角逐矣乃國置民貧公私交困破產之聲騰囂于全國共營之說倡議于友邦者則由消費之物多生產之物少消費之人多生產之人少一國之歲出歲入不敷甚巨一國之輸出輸入相差太巨之所致也今欲祛除此弊自非獎勵生產不可然生產事業純然委之人民一國之實業仍無充分發達之望何則今日中國之人民無資本者多有資本者少所號爲資本家者多不過擁有數百萬少不過

擁有數十萬數萬元已耳。機巧既不雄厚大規模之實業自屬無力舉辦。雖有時用招股方法可以多集資本。然中國人性質長於獨立進行而短于協力共事。國內股分公司成功者不過十分之一。失敗者或居十分之九。即其明證。此大規模之生產事業不可專委諸人民之第一原因也。且中國今日教育尙未普及。職業教育更未發達。實業上之精深技術。尤人民之所未喻。故關於實業上一切研究計畫調查實驗。人民往往以爲無益而置之。其所從事之實業。咸本于平日之經驗及傳統之智識。此種守舊辦法。處從前閉關時代或可爲現狀之維持。處今日生存競爭時代。設昧於改良。封于故步。則不惟無進步之可言。一與外人相接。觸鮮有不歸失敗者。此一般生產事業不能專委諸人民之第二原因也。設探國家生產主義。則可免以上兩種之缺點。蓋大規模之生產事業。由國家舉辦。則所需資本。或借外債。或借內債。或招股。本果其事業確實登高。一呼資本可以立至。又凡有學術有技能之士。人民所不能聘請者。國家皆可厚給薪俸。以聘之。優加禮遇。以延之。則關於一切研究計畫調查實驗。必能周到無遺。凡所舉辦之生產事業。自無失敗之慮。但所謂國家生產主義者。非如今日共產黨之主張。舉全國之生產事業。悉由國家舉辦之。其間自

有一定之界限今列舉國家所應從事之生產事業於下

(一)規模宏大人民財力不能舉辦之生產事業如鐵道礦山製鋼造船開墾田

等項

(二)人民智力幼稚尙不知舉辦之生產事業如電氣化學工業煤氣等業水力

工業等項

(三)利益遠在將來人民不肯舉辦之生產事業如疏水排水造林築堤等項

(四)本屬有利之事因人民不善經營或囿于技術雖舉辦而無成效之生產事

業

以上第一二三項則由國家出資舉辦之第四項則由國家出資收買之除人民

已能生產已知生產之事業由人民自由生產國家但居於提倡保護之地位外凡

生產事業之關於全國者則由中央籌款舉辦之其生產事業之關係于數省者則

由中央聯合關係省分籌款舉辦之其事業之關係于一省一道一縣者則由中央

聯合該省籌款舉辦之或訓令該省籌款舉辦之必使一國之內無地不生產無人

不生產無時不生產生產之物以之抵制外貨而有餘以之供給全國而無不足菽

粟如水火貨物如邱山將見全國人民美其衣甘其食出作入息蹈道詠仁以游於熙皞之天以坐享昇平之福又何至朝野上下總總以貧乏爲憂汲汲以稱貸爲生活哉此種政策十八十九世紀歐美各國行之而有效近數十年日本仿之而成功彼特不肯明以告人耳余沈思之餘忽有所悟用特發表之以貢獻於國家是否可行敬希裁奪

滇省水利問題

席聘臣

地面等於德法戶口埒于丹比人民則純良誠樸氣候則清淑溫和探鑛則金銀錫鉄銅鉛錫無不備掄材則梗梓杞楠柏松杉橡無不生滇乎滇乎非地球之樂園天府之奧區乎無如天惠雖優人工未盡試策馬尋蒙段之故壤曳杖游金碧之山河則工喟于肆商戚于場男嗟于道婦嘆于房彼談生活之艱此語衣食之窘即號稱文明中心之省會亦莫不民有菜色途有餓孀路隘縷鳩面鵠形耗矣傷哉何滇民之貧困竟至于斯也

夫滇民貧困之原因極其複雜如洋烟之禁種協餉之停止風俗之日趨奢侈金融之窘迫逾恒皆助成人民貧困之重大原因然其主要原因仍不在此其主要原因

何在乎一言以蔽之曰穀物騰貴而已夫中國各行省之穀物貴者其暫而賤者其
獨滇省之穀物賤者其暫而貴者其常其故安在

一曰旱 滇山國也崗巒起伏田疇稀少自迤南乘車赴省惟宜良省會地稍平衍
此外則山環嶂疊無田可耕建水蒙自開化廣南大理雲縣順寧一帶間有平地可
事開墾惜乎河流未通陂池未築雖富沃壤視等石田東昭雲武各屬亦緣水利未
興田盡龜圻雨量稀少遂無秋成偶有勤苦人民於山谷之間闢梯田種雜糧以爲
禾稻之補助然日久不雨雜糧亦歸枯槁耕九穫一得失莫償此穀物騰貴之原因
二曰水 滇本山國喜潦憂旱鄂爾泰興修滇省水利疏曾痛言之但雋益平彝一
帶南盤淤塞落水洞湮夏秋之交類成澤國記者十餘年前因事赴燕道經曲靖見
夫河水泛溢橫衝田畝霑益城外彌望汪洋該處人民無田可種莫不棲息道左爲
輿夫爲游手結繩織屨藉保餘生悲楚情形筆不忍述此穀物騰貴之原因二
夫在交通便利之地則甲省穀貴乙省從而彌補之乙省穀貴則丙省又從而救濟
之譬如江蘇浙江各省一成荒歲則安徽之穀至焉江西之穀至焉湖南湖北之穀

亦至焉甚至安南台灣之米俄國之小麥美國之麥粉亦莫不廣集蟻附補我置貧
滇則素鮮蓋藏不通舟楫迤西遇旱則東南雖豐收於事無濟也迤東遇水則西南
雖穀賤於災無補也安南爲產米名區距省僅三日程亦因車費太昂不克運省故
一遇凶荒勢成坐困加以水旱頻年目下穀價之高較之北京上海有過之無不及
中人之家每月收入僅足以購食品下流勞力之輩終日勤動求一果腹而弗能食
之難得如此故錦繡章甫園亭池館奇珍玩好美木佳花舍之而弗求措之而不顧
人民生活益趨益低此害在文明者也貧民子弟無力教育之無不識魯魚莫辨一
與外界角逐則人巧已拙人智已愚優劣相形終歸淘汰此害在文化者也又况一
國之富由人民貯蓄而成一般人民於謀食而外更無餘力以事貯蓄則國家富力
亦必無增加之可望此害在國富者也尤有可慮者穀物貴則生計艱生計艱則馬
耳薩士之原則無形之中互相遵守於是近十年內較之十年以前烟戶不加人口
日減人口減則需要寡需要寡則貿易衰此害在工商界者也人口減則壯丁稀壯
丁稀則兵力弱此害在軍界者也嗚呼因水旱而穀物貴穀物貴而文明有害文化
有害國富有害人口有害工商界有害農界有害軍界亦有害然則今日欲使滇中

之穀物不貴滇民之生計日裕舍祛水旱而外烏有他法哉祛水旱之法維何
一曰開河 河分三種有已開者有未開者已開之河曲靖南盤江雲益濁水河貫
通數縣人民食利者數百年無如兵燹以後吏惰民偷千里利源聽其壅塞爲日既
久河高於田一遇淫潦田皆淹沒謂宜酌撥官款迅加疏濬河深水退有田可耕此
利在民者也已耕之田公家接收丁糧不至年年豁免此利在國者也至於迤西一
帶如雲南縣等處旱田數百里無水下種荒廢累年果能導洱海之水以資灌溉則
得穀之夥不減嵩明其他如宣威馬龍蒙自武定各屬雷鳴之田不可勝計更宜踏
勘水脈撥帑開河河流疏通堪資挹注則百年棄地立變膏腴民俗賦增公私交利
此救貧之無土策也

二曰築堰 滇省萬山重叠邱陵起伏每當盛夏猛雨則山水驟漲急轉直下閭殫
爲河一至春冬之交雨澤稀少則又赤地千里耕種維艱苦旱苦潦民力遂竭謂宜
特派專員四出視查周諮鄉老熟審地形擇背高面低山水下注之處多築堰塘豐
蓄山水塘隄雜用土石環種樹木四開涵洞啓閉以時俟山水陡生則開近山之涵
洞以受之使水獲歸塘不爲民害插秧需水之際則開近田之涵洞以泄之使人民

自由利用引以溉田省城鉄峯菴麓旱田千畝無水可溉廢棄多年前前日農業學生曾動築堰之議鄉間愚老又狃於風水之說阻撓多端大利不興良堪歎息故凡遇築堰事件宜由行政長官多方勸導稍施壓力修塘築堰庶易成功昔叔敖相楚曾陂壽春召守南陽鉗盧是作國利民便百世謳歌世之從政者奈之何憚而不爲也

三日掘池 開河築堰費用甚巨非國庫補助必難舉辦至於掘池一事費小利大處處皆可推行記者游歷日本江浙各地其農田仿古井田之制有田廣於九畝者八畝用以種稻中央一畝則留掘深池以廣蓄雨水其中廣截蓮藕蒲菱之屬初夏以還池蓮齊放偶步田隴清香撲人插秧之際則車池中之水以溉四圍之田故雖與河堰遠距之區亦能如限耕種至於雨澤過多之歲則將田中積水放入池中螟螣不慮繁生秧苗不憂腐壞法良意美矜式尤宜今滇省之田近河者僅知利用河水近堰者僅知種用堰水距河堰稍遠之地則豚躑籌車坐希天惠一遇乾封少雨雨或愆時非怨造物之不仁即歎己身之不幸擣味冥頑良堪憫惜謂宜由行政長官特下命令凡有田九畝者務須掘池一區深必逾丈滿積雨水以待插秧以知事爲監督以董事爲鄉導督率田主尅日興工並宜特派專員四出巡視其有惰農愚

夫延不開掘始則訓誡繼則罰緩終則田畝充公以爲公共掘池之用天工代人
定勝天備水備旱之方無有逾于此者也

夫今日爲滇民謀生計自以振興實業爲要圖但實業獲利有緩有急森林之利獲
在十年蠶桑木棉亦必四五年後始能收效至於五金鑛產贏絀難期錫銅而外害
多利少若夫興水利溉農田則甲年興工乙年獲利上益庫帑下裨民生語云食爲
民天又云天下大利必歸農即今日歐西計學家亦謂農業爲工商之母農學水利
精益求精獨中國政治家反目爲老生常談漫不加察此記者所以不揣固陋特草
此文冀有心滇民生計者一顧之也

勸辦粵邊游匪策

勸辦粵邊游匪策

捍外患難除內患亦不易然內患不除而遽欲捍外患恐乘機而起究合內外而共
成一患斯其患益大矣故欲捍外患仍先自除內患始夫所謂除內患者何也游匪
恣睢由來久矣而粵邊囂聚大有日長炎炎之勢向之議者以爲勦之恐病根難拔
益啓禍端不如因而撫之以徐收爲已用豈知狼子野心驕橫轉甚此與養癰貽患
何異異哉爲今之計仍莫如會同滇黔粵三省協力勸辦總期除暴安良懲一可以

警百庶內患消而外患可徐圖矣謹就管窺所及爰擬勦辦游匪條陳數事敬爲我
憲台言之一選將宜慎也夫將者軍之司命凡兵之強弱戰之勝負皆繫於主將之
一身苟將領不得其人鮮有能濟事者故勦辦游匪當以選將得人爲第一義一兵
勇宜練也夫訓練於平日乃能收功於臨事今之帶兵勇者平居訓練祇屬虛文一
且使之臨敵是驅之死耳否則見賊而奔耳故孔子曰以不教民戰是謂棄之一器
械宜精也兵法曰器械不精以其卒予敵也今官兵與游匪相鬪所恃者器械耳
然必不可見奪於敵人致器械之精者反爲彼用一軍糧宜裕也游匪忽聚忽散隨
劫隨食不須持糧而行官軍弗能也故追賊數百里必有數日之糧而乾糧難以多
攜搬運又難輒至須於各處險要置寨貯糧以資接濟庶不至有匱乏之虞一險要
宜守也粵邊一帶多高山長林幽谷深箐游匪多盤踞其中宜擇險要之處分兵據
守時出而搜尋之遇有游匪舉礮爲號則大兵隨至一鄉團宜設也鄉團之設雖意
在自守然於剿賊機宜亦大有裨益賊匪奔竄山谷不由路徑官兵雖盡力窮追終
莫相及以前無阻截之者也誠於各處練團賊至則據險以拒使彼不得竟過而大
兵隨後跟擊腹背交攻必獲大勝有此六者而更加以號令明賞罰信區區游勇不

足滅矣雖然游匪之中亦有迫於饑寒苟且以求生活者亦有爲彼所挾制而爲賊盜者繼意以爲當誅厥渠魁釋其脅從有願爲兵者分屯置戍使之防守有願歸農者開墾置田使之耕種庶幾於勦辦之中仍寓撫綏之意雖仁者之師不過是也如是不惟游匪之患除而風聲所樹外夷當亦有見難知止不至垂涎於邊疆者是我一舉而兩患俱除也豈不懿歟

請取銷富行原擬合同另商改訂呈文

陳鈞

呈爲富行單方擬具聯合條件礙難實行呈請飭令取銷或另行會商改訂事案奉鈞署第一號訓令內開本省長爲整理全省金融平減港滙匯水起見除原文有案邀免重錄外後開務將該項條文認真奉行勿負本省長殷殷期望之至意是爲切要速速此令等因奉此遵即將發下條文詳加體察覺富行所擬將錫務公司每年鎔出錫片全數售與富行不得售與他號及自行運港各種辦法於事實法律手續三者均有應行加以研究之處總理職責所在難安緘默謹分別爲我鈞長一詳陳之請先論事實在富行此次對於錫務公司所出之錫不惜爲此一網打盡之計其意無非欲將錫片運港銷售變成港幣既可購辦生銀供給鑄料又可多收匯欸活

動金融與總理平日主張富行之於箇舊急應放手辦理買錫跟單

在儲蓄款與錫商買賣存摺即

由滬交清乃敢取出錫則
之單跟極爲穩當生意

用意正復相同其有不同者則祇向外發展與由內剝奪之一點耳箇

舊每年產錫在五千餘張於錫務公司範圍以內每年不過六百張

統向商供商辦及略有別路
者而書者富行實行商與收歸

則又須去
一大半

占全廠八分之一而剔除錫務公司占此八分之一以外其餘七分或跟或賣

大約有六分落於廣人及匯理銀行之手富行此時如果決定從買錫跟單兩事進

行祇宜放開眼孔從廣人及匯理銀行等所占八分之七著手不宜束縛自身從錫

務公司所占八分之一設法此就事實論不得不加以研究者一也再進而論法律

錫務公司雖係官紳合股然總之係屬股分有限公司性質祇要確守公司條例即

應享自由貿易權利今富行擬將公司出錫全行收歸並開具條件交由財政委員

會議決定呈請政府令飭照辦大有強制執行之意在官股方面本屬不成問題但

錫務公司股本兩百萬元官股壹百二十餘萬元雖占三分之二商股七十餘萬元

仍占三分之一萬一此三分之一商股中有一部份出而抗爭其將何詞以對居今

日而尙侈談法律本屬不達時務但此等行動發生於他省可也發生於本省主持

財政之人謂所圖謀者祇財政其他不暇顧及亦可也乃不發生於他省而發生於

本省雖發生於本省主持財政之人而仍以我鈞長始終護法素主保商者之命令行之則不可也此就法律論不得不加以研究者又一也又進而論手續查此次財政司長提案其中有云錫務公司應確實與銀行聯合辦理即富行所擬合同其開宗明義亦云富行與公司本互相維持又云雙方同意所謂聯合也所謂某某與某某也所謂互相也所謂雙方也釋其語意均承認公司與富行實係立於對等地位彼此既屬對等則遇有訂立合同等事或兩面集合會商或由此方發動徵求彼方同意其合同乃能成立其手續乃爲正當今合同由富行自擬而頒發係省長命令論命令固惟有認真奉行論合同則多數不能同意謂命令不可不遵其如不能同意之合同何謂合同不能不改其如認真奉行之命令何此就手續論不能不加以研究者又一也如上所述勿論於事實上法律上手續上總理對於富行此舉均不敢隨聲附和輕於贊同即使不問事實不談法律不論手續而富行單獨自擬之合同藉鈞長之命令以見諸實行其中亦多窒礙難行之處即如第一條載錫務公司每年自辦或合辦供辦所鑄出各種錫片均須全數於鑄成時就箇舊售與富源銀行行云夫自辦者主權屬之公司自不必論而合辦與供辦兩種全視其所立之合

同若何假令合同未經載明錫砂應歸公司則公司且不能將供辦合辦者所出之錫砂割斷而歸爲己買更何能將供辦合辦者所出之錫砂兜攬而售與富行第四五兩條載公司需用款項應儘量由富行借墊公司售錫餘款須全數存於富行出進均以月息一分計算云云竊查公司近日常狀况後每年用款或可自行活動有款存儲之日必居多數照此定立合同假定公司常時有款五六十萬或百萬存於富行每年富行應付此項息金多則十餘萬少亦須六七萬對於公司之待遇固特別優異對於富行之負擔則特別增加爲富行借著而籌似不應如此失算第六條載錫務公司原設省港兩分部應儘合同成立一月內撤銷以後須以全力經營採煉事宜以圖產額之增加云云查公司設立省港兩部原擬略收匯兌兼做洋紗以冀與廣幫及匯理銀行分營此中之一樹多組織一部份事即多有一部份人兼設省港兩部固於採煉事宜無所損取消省港兩部亦於採煉事宜無所加蓋既不能使辦理匯兌者以下例而措措又豈能強買賣洋紗者以扯爐而土炭故照合同所定將公司省港兩部撤銷謂爲匯理廣幫擴張勢力則有之謂爲錫務公司增加產額則未也照事實法律手續三者既如此照合同規定各條又如彼然則公司與銀

行豈終不宜於聯合乎是又不然公司曩年營業虧折賴富行借款扶助得延綿以至今日現借款雖分年攤還而大德仍缺然未報即以尋常報施而論公司苟有可盡力之處亦豈應坐視不理特據實行聯合自有所以聯合之道互相維持自有所以聯合之方簡單其詞兩言可決一曰仍准公司自身之存在一曰無礙公司前途之發展而已若名爲聯合而有類於沒收託詞維持而無異於歸併在總理之愚總期期以爲不可總理謬蒙殊知特加重任受事伊始困難萬分揭冊而閱公司除兩百萬元股本盡置諸機器房屋廠地絲毫不能活動外約計內欠外帳連本利計算在二百七十餘萬元無米之炊巧婦難爲所謂雖有善者亦莫如之何也幸上年廠尖漸自發達錫價又復增高九死之餘仍獲一生豈始料所能及此現在公司第一步辦法即在清理債務或撥產抵補或購票償還或照定案而提前辦理或議減子息而攤還本金均已分頭並進當可逐件歸結一俟各種債務議有償還方法後第二步辦法即在發給官商股本息金公司因營業失敗自壬子年即已停止發息從前事處萬難本亦莫可如何今既略爲活動自應竭力騰挪每年果於攤還借款外尙屬有方可想擬將應付息銀照數撥出按股派息賠款付息兩者均能照計劃實

行若果繳尖如常行簡不變再得三數年能將兩百萬元股本恢復半數以上或空數恢復然後拱手而讓之他人則所以報鈞長之知遇者在此所以盡自己之職責者在此所以不負各股東之付託者亦在此至名則雙方而實祇單方名則同意而實未能參加己意之合同一經簽訂即不啻將公司斷送不惟良心不許即責任亦何能負萬萬不敢輕於下筆所有富行所擬合同礙難實行懇請飭令取銷或另商改訂各緣由理合詳細縷陳是否有當伏乞核令示祇遵再總理前因下車傷足瞬將一月仍未告痊行動均極艱難據醫者言刻尚不宜輕動再得休養數日即當進省聽候訓示合併陳明

為夏瑯溪提軍懇予諡法請都察院代奏公呈

夏瑯溪提軍名瑤字君平江蘇武進人

呈為已故提督戰功卓著惠留桑梓籲懇天恩予諡以彰忠藎而順輿情呈請代奏事竊原任湖北提督夏毓秀於宣統二年正月因病出缺當經前護理湖廣總督臣楊文鼎代遞摺摺並臚陳戰功事蹟具奏本年二月二十五日內閣奉上諭楊文鼎奏已故提督戰功卓著懇恩賜卹一摺湖北提督夏毓秀勇敢誠樸軍紀嚴明咸豐年間束髮從戎轉戰雲南貴州四川等省勦辦髮逆番夷土匪所向有功由偏裨洊

升總兵擢授提督整頓營務勞瘁不辭茲聞溘逝軫惜殊深夏毓秀加恩著照提督軍營立功後病故例從優議卹任內一切處分悉予開復應得卹典該衙門查例具奏並將戰功事蹟宣付國史館立傳等因欽此仰見朝廷優卹功臣策勵戎行之至意欽服莫名職等竊維該故提臣生平戰績早在聖明洞鑒之中就中剿辦雲南髮逆其功德留遺桑梓至今猶謳思弗輟冀邀褒榮於一字以圖報享千秋者職等既感慕之夙深兼應有代表輿情之責謹將該故提臣在滇戰績敬爲我皇上縷晰陳之咸同間滇中回匪乘中原紛亂之餘逆首杜文秀僭號竊踞大理盡有迤西五府三直隸廳地逆首馬榮等屢踞省垣遣其黨分陷雲武等處及竄踞迤東所屬其迤南地方雖經前署臨元鎮梁士美率鄉勇死力堵拒然除臨安一府鮮受蹂躪外無復乾淨土該故提臣自束髮投伍殺賊屢著奇功不數年由偏裨至統將克復武定直隸州嵩明安寧昆陽等州城暨富民祿勸元謀各縣城昆陽之役並生擒僞將軍楊明等殺賊一千五百餘名搜獲僞印一百零八顆乘勝移師進紮鎮溪渡三街賊憤怒數萬衆圍攻該故提臣奮力鏖戰六晝夜擒斬二十餘匪已而賊以全力圍攻省垣同治二年正月十六日省城失陷署雲貴督臣潘鐸被賊該故提臣立奉調赴

援率部曲勉以忠義血戰十餘晝夜攻破城內之五華書院翊靈寺城隍廟一帶賊營道遂首逆馬榮於境外取獲首耳級四百八十三顆生擒逆首馬興國獲偽印一顆武定之役生擒偽將軍余胖子等四名獲銅木偽印十一顆元謀之役擒獲偽將軍馬士林馬興科等並疊次力解省圍此皆故提臣功在省垣及雲武等處地方者也其克復迤東所屬之馬龍尋甸霑益等州城曲靖府城潞江府屬之新興州昭通府屬之大關永善等廳縣城也於尋甸則生擒戕害署督臣潘鐸之逆首馬榮馬興才殺賊三百餘衆於曲靖則生擒逆首馬聯陞搜獲銅木偽印一百五十九顆偽札一百八十三件於新興則擒獲逆將田慶餘正法此該故提臣功在迤東一帶者也陷踞雲武等處及迤東各屬之逆首馬榮等既正法伏誅其偽將軍楊明等亦先後成擒維時生靈塗炭十八年之久而未拔者厥惟迤西滇大吏以該故提臣富於兵略所向有功也於是派統兵助戰於景東廳中甸維西等處諸路削平於是復繼統雲南府十一屬兵往援楚雄之白井是役也偽大司寇李芳園率悍賊十餘萬衆圍攻甚力該故提臣先率三千人馳往密令土司分燒賊糧賊營伏奇兵攻其要隘斬殺賊匪三千餘人生擒偽將軍朱似龍等八十七名十數萬悍賊皆紛紛驚散李芳

圍亦遂窺大理至是白井大姚二州一律掃蕩楚雄數百里地無賊踪於是復派督師進剿遂克復順寧府雲州等城並分兵協剿騰越攻克小猛統所戰皆捷匪勢窮蹙而全滇肅清矣此皆故提臣功在迤西一帶者也計在滇大小數百戰每戰身先士卒因是身面手足先後受鎗砲刀矛等傷凡二十九處同治甲戌入覲蒙穆宗毅皇帝俯覽傷痕溫綸勞慰前護湖廣督臣楊文鼎奏稱該故提臣在雲南勦辦回逆幾於無役不在行間克復城池擒斬要逆厥功甚偉良非虛語該故提臣每下一城子女玉帛秋毫無犯與士卒同甘苦儉約不治家人產業身歿之後家無餘財微特爲滇中宿將所罕覩即求諸中興名將中亦不可多得竊維易名之典原朝廷表忠勛勸後來伏查原任雲南開化鎮總兵白金柱四川提臣馬維騏均先後荷蒙恩旨予諡該故提臣於白金柱馬維騏爲先進捍衛桑梓之功復遠過之至貴州之役順道攻下清正安平等城征服四川久叛包坐諸番之役出師一月遂攻下數十部落降番夷數萬衆以息邊患庚子之勤王秦晉湖北之整飭軍戎均昭昭在人耳目不復縷陳職等景仰前徽緬懷遺澤聽父老之傳述益思慕而低徊合無仰懇天恩俯賜該故提臣諡號以彰忠蓋而順輿情之處出自逾格鴻施所有據實縷陳已故提

督戰功卓著惠留桑梓緣由謹合詞呈請代奏皇上聖鑒謹呈

上改心不宜劃歸緬寧呈文

徐嘉鈺

爲呈請察核示遵事案據上改心縣佐李光藩呈稱竊縣佐案奉前縣長張訓令第四五八號內開案奉普洱道尹公署第四四號訓令開案據緬寧縣知事田炳經呈報奉令整理疆界當經集紳籌議切實勘察分別擬具意見附呈圖說請予鑒核辦理等情一案除原文有案邀免冗錄外後開仰該縣佐遵照速率同團首親往緬寧與土改心交界各地查勘明確是否上改心插花於緬寧界內抑係緬寧之猛猛插花於土改心界內務須逐段履勘繪圖說明專人送縣以憑復核呈報勿延切速此令等因奉此縣佐遵查上改心轄境分爲東南西北四區僅有北區一面與緬寧屬之猛猛接壤隨即傳同四區團首朱恩壽雷洪發彭應龍楊芬洲及團紳楊華廷等前赴北區一帶親履踏勘土改心原管各村寨實不有一處插花入緬寧界內只有緬寧所管臨安壩尾緬帕南來河亡安等處插花進上改心地界之內僅繪具大概圖說呈請察核縣佐轉署後當由該四區團首邀同地方鄉老共集數百餘里人陳述意見僉謂上改心地面跬步皆山居民多係獠獯狃從前本隸屬於猛猛土巡

檢納糧應役屢受土司苛待有事奔訴漢官尙代爲之解紛迨至前清咸同之季杜文秀亂事發生漢官無暇遠顧土司亦無能照管得勝街探獵夷目張登發乘機盤踞遂脫離土司關係並與孟連宣撫司所管諸山探獵夷目聯絡一氣自主爲酋長據地稱雄光緒十三年前雲貴總督岑襄勤公始揀派四大督帶統兵剿辦張逆授首諸山探獵一律克服軍務平定乃將猛猛及孟連原管探獵諸山地面改土歸流設置鎮邊直隸廳從此民夷方有依附分黑江即辣蒜江以北各村寨設上改心巡檢小黑江以南各村寨設下改心巡檢民夷得見天日涵濡治化迄今三十餘年一心阪命無敢稍有疑異特當地民夷膽小性篤祇知耕山而食不事何項生業所有四區煙戶共約六千有奇歷年以來皆平平而過并無增損惟北區一段界連緬甯近因常與緬屬人民交往或以貨物貿易或以博戲引誘銀錢借貸重利盤剝是以日事奢靡習成懶惰多有將田地抵償於緬民之手者初則認佃分租繼則撥田自種北區民夷失業失所緬民猶有未足得寸進尺由是又有請撥劃土改心全地歸緬之舉風聲傳播衆皆惶恐團紳與衆民夷等既不欠糧又不違命蒙委縣佐分治其間相安已久實無異議萬懇照舊歸瀾滄管轄感德不盡各等情縣佐當以查勘

明確無上改心插花於緬甯界內劃歸之舉緣無成議安慰而退再三體察該團紳民夷等趨向甚屬堅執陳情俱極誠懇自未便議及變更大拂民望但緬甯猛猛插花在上改心之臨安壩尾等村獨猛猛屬之亡安夷民常有過界偷牛盜馬事出隔屬不使深究擬請將各插花村寨劃歸上改心以清疆界而便管理是否有當理合將奉令率團履勘暨各團紳民夷所呈不願改劃意見各情形並同圖說呈復伏乞察核轉呈等情據此知事復核李縣佐所呈率同團紳等履勘繪圖陳述從前改土之原起聲明現在經過之事實不願改歸緬甯其情詞固屬懇切然僅就上改心一方面立論但該縣佐職權有限自不便統籌全局知事甫經到任對於此事本無成見惟揆諸緬甯田知事所請不免偏執明雖整理疆界實則別有用意知事非好與之分辯特有不能已於言者不得不爲我鈞尹縷悉陳之若就瀾滄地形而論坐落在瀾滄之右原係孟連猛猛兩土司所屬諸山獠狃叛踞其間前清光緒十三年用兵收復始安設鎮邊直隸同知分設上下改心巡檢光復後因鎮邊名稱與廣西省之鎮邊縣雷同遂得改命今名以瀾滄江爲內地分界之江其江之左爲景谷縣屬地江之右爲瀾滄縣屬地縣界分晰瞭如指掌歷年從無爭競今將上改心劃歸緬

審按地圖考其形勢豈不是緬審屬地直插花入景谷瀾滄兩縣之間正與田知事所指上改心縣佐轄地插花於緬審縣屬西南之中一語大相反對將來治理更多不便此上改心之不宜劃歸緬審者一也若以人民種族而論瀾滄江西邊順江一帶北至緬審猛耿馬南至孟連中間一派俱係崇山峻嶺分爲上下改心兩段所管人民盡是獠黑狒狒新闢夷疆開化未久特上改心一段自獠酋張登發伏誅後民夷漸次歸誠尙稱馴樸而下改心一段逼近野狒大山夷情獷悍反覆無常每於數年或十年左右猶叛一次昏賴兵力爲之平復案牘具在無可諱言正欲藉馴樸之獠狒用以感化獷狃之夷衆何也以其言語相通習俗相同俾同族互爲引導較易就理況上改心所轄獠狒尙有北界接連緬審屢受緬民盤剝而不甘心者強之使歸緬審所屬匪獨措施費手失衆望而拂夷情尤爲計左此上改心之不宜劃歸緬審者二也若以徵收錢糧而論瀾滄全縣每年額定秋糧九百餘石上改心所轄四區每年攤認糧額二百六十石幾占三分之一以全年所收之糧欸留作坐支縣知事及縣佐行政公費自屬不敷尙須由思茅釐局提欸補助再將此項糧欸撥分緬審則瀾滄進欸愈形短絀開支越更不敷此上改心之不宜劃歸緬審者三也若

以江稅收入而論瀾滄自設治以來即於瀾滄江流分設渡口五處曰大蚌曰雙江曰募廼曰措撒曰糯紫自造船隻雇定水手抽收江稅除開銷經費外年有報解尙有盈餘留以彌補辦公鈞尹前以瀾滄設治已歷三十餘年仍屬草創城池衙署迄無定所借寺廟爲辦公地點不惟不成體制而且有失觀瞻曾奉鈞令飭將江稅收入限自民國八年一月起全數提解鈞署發交思茅銀行代爲存儲留備將來建城修署之用業經按月批解在案特工程浩大支欸繁多雖有蓄積恆虞不足其大蚌江渡口在上改心轄境之內將上改心劃歸緬寧自必將來大蚌江稅收隨之劃撥五渡年共解欸貳千肆百餘元大蚌一渡過往人多年收九百餘元統計年額已占十分之四再將此款撥歸緬寧瀾滄工程即難舉辦呈請撥還稅收言既不順恐事亦難成畫蛇添足多此一舉此上改心不宜劃歸緬寧者四也若以興學籌欸而論瀾滄僻處極邊之邊民夷固陋風氣不開前設土民學塾皆係由省請欸自省欸止發各土塾不能復設旋即解散現在圈糯城設勸學所一處設高等小學一堂初等小學一堂上下改心各設初等小學一堂所有勸學員長校長教員學堂購書一切用度全賴地方提欸下改心一帶前年保逆亂後元氣大虧民夷未全復業當撫恤

之不暇何能再事籌款上改心未受損傷原有年收學穀二百七十餘京石勉資挹注學堂開支專望此款亦經按年冊報有案將上改心劃歸緬審則學穀因之而去無力再籌瀾滄之學勢將廢止此上改心之不宜劃歸緬審者五也緬審得上改心固屬增益瀾滄去上改心實受虧損然土地人民均爲雲南政府所統有究應如何歸畫權操自上知事決不敢妄叅末議同僚以爲曉舌之譏以上所陳五不宜不過就事論事當否仍懇鈞裁再知事所陳之意見與田知事所請之意見本不相合自不便會同核議妥商徒事紛爭致勞往返有違鈞命伏冀鑒原所有核轉上改心縣佐率同團紳履勘並繪圖陳述意見及知事議論不宜劃歸各緣由理合併圖具文呈請鈞尹俯賜察核批示祇遵

擬上軫念山東饑荒發帑金十六萬倉米十二萬特差御史一名前往賑濟務
貴州大令人沾被德意廷臣謝表
楊方盛

伏以慮軫窮檐帝治贊天行之化恩頒御府皇仁濟物力之衰四郊枯槁生春六郡
流離載色苞桑計切黍谷陽回臣等誠惶誠恐稽首頓首竊惟國以人爲本有人斯
能有土有土斯能有財民以食爲天無歲則亦無民無民則亦無國是以周官荒政

甚詳首薄征而散利亦越漢代湛恩最渥每發廩而蠲租惟是佐天地以勤民用能奠山河而長世慨青州之不熟嗟赤子其何依殫首興歌悵蒼華之難久天枝寫怨羨其楚之無知下有仇離上誰安集收穀神而示虐怵昊天斬伐之威賤民命以恣貪重大地蕭條之困草餐木食矚憐虎口之讒蓬麵槐齏莫問鵠形之慘已作溝中之捐瘠猶聚潢池以弄兵伐木折屋鄭俠莫能繪其圖易子折骸華元何足摹其狀粟紅徒資肥鼠貫朽空磨從風自非至仁極盛之朝安得散財聚民之政茲蓋伏遇皇帝陛下乾龍居首離象當空舜孝夔夔母心與天心並格文慈穆穆父道兼祖道而隆神戈揚我武之威歷指三陲而大定甘雨潤斯民之旱時捐十萬以生全乃者聞齊魯之降僮穆然顧流離而懷咨謂足孰與足則儲之何心况民則吾民而厄之何忍若非專遣賑使無由曲效便宜六察既下似稿初甦萬口遙傳如仆斯起取之民復予之民惠而不費損乎上仍益乎上道以大光一鑄一銖觀天恩之浩蕩于囊于橐蘇民困於阡危第舉國爭之而不能乃聖心發之而甚易豈知自有停止之日原無虛言果然深居靜攝之時不忘賑卹從此煙生虛里絃歌縫掖起權呼漸看月滿東山穀擊肩摩添氣色集飛鴻於中野化碩鼠爲樂郊彼護之冠蓋曾無救於流

亡若種以蕪蕃益足資其珊笑橫古今而絕擬參化育以同流臣等材慚作礪之金空索長安之米念小人有腹未知君子之心抑土壤至微尙切泰山之助雖取諸懷而與諸其人亦云便矣願施者厭而索者未倦何以待之伏願振久筭之宵衣集方陳之羣策宜民恒用一以緩二易虐從寬敷惠勿暮四而朝三慎終如始斯萬邦綏而豐年屢比戶可封亦百室盈而婦子寧丕基永固臣無任瞻天仰聖激切屏營之至謹奉表稱謝以聞

擬上聖謨廣運平定伊犂特頒恩詔覃被中外竝加增直省解額用昭武功文
治之盛羣臣謝表
沈思敬

乾隆二十一年某月某日具官臣某等恭遇皇上聖謨廣運平定伊犂特頒恩詔覃被中外竝加增直省解額用昭武功文治之盛臣等謹奉表稱謝者伏以聖武遐宣化日蕩穢槍之影皇仁遠布光天耀奎璧之輝靜塞外之鴉音無勞玉斧集岡前之鳳羽載賣金泥井鉞不揚取佳士以爲國士參旗盡掩化羽林而樂泮林慶洽臣民歡騰中外臣等誠惶誠恐稽首頓首上言竊惟王者本天出治每思除暴以興賢聖人法古臨民恒欲休兵而耀德雲瞻商旅簡書錫華野之英雨洗周師鐘鼓樂辟雍

之彥槎迴博望科開方正賢良箭定延陀士策明經制舉軍中委韓范尤崇洛下師
儒闈外寄王唐竝羅榜前俊秀凡皆武功之克著遂致文運之聿興自豎將而安用
毛錐詩書氣短因籌糧而暫停宮燭琴瑟聲稀雁斷雲邊已老蘇卿使節梯懸天上
莫彈貢禹塵冠從未有葱嶺烽消虎賁與龍驤竝奮棘闈日暖麟遊借鳳舞齊輝如
今日者也茲蓋伏遇皇帝陛下乃聖乃神允文允武元雲入戶奉寶冊於丹陵綠籍
昇壇得瑤圖於翠渚假旗息馬集虎觀以傳經臥鼓橐弓開鴻都而肄業固已東西
南朔王會覃敷杞梓穰楠賢關大啓矣乃藐茲醜族僻在伊犁鯨波湧於長河帆敢
跳梁弗恪虎窟埋於絕塞居然跋扈爲雄小蠢亂常戢防風之後至諸番歸順降頡
利以先驅式秉聖謨恭行天討統連營而竝進霞蔚雲蒸分兩道以齊驅星流電激
月明瀚海風聲雜鶴唳以俱揚日照秦關野色將龍文而竝麗觀盈郊之糝鬪燦列
堯階看載路之帝璫喧呼舜壽西天草木偃矣從風北地山川翕然就日於是特頒
恩詔普逮臣僚更浦綸音加增解額桂花香暖廣分蟾窟之枝槐舍影黃頻溢龍門
之浪披堅虎豹羨三秋瑣院多材解隊貔貅傳一榜文星有耀大將之鼓旗十二傳
蟻戰於高墉翰林之風月三千奏鏡歌於廣殿臣等傾葵有志射虎無能飲至策勳

懷班令史勒銘之筆凱旋報捷之傳修期下馬之才快觀耿光拜揚大烈伏願綏來
常切樂育彌殷武劍長韜靜中天之日月文琴疊鼓蒸大海之雲霞羽萃鱗攢太史
之河懸鏡山輝川媚文昌之氣垂珠將億萬年之磐石常安千百國之苞桑永固矣
臣等無任瞻天仰聖激切屏營之至謹奉表稱謝以聞

呈請楊崇峯先生入祀鄉賢文

尹廣謨

爲呈請入祀鄉賢以敦風化事竊維建功立業堪增史冊之光重道崇儒願獻芻蕘
之見故品題月旦純修既式圭璋斯宏獎風流鉅典應隆俎豆謹遵國家之功令用
廣庠序之光輝茲本州已故原任陝西巡撫楊名鵬束身名教世守清白之風篤志
人倫夙全忠孝之性初生頭角禎祥兆夢夫金人幼關心胸穎悟稱奇於刺史方入
泮於髫齡輒分糴於米廩優品學而槐市蜚聲擢賢書而桂林馳步惟承菽水躬奉
堂上椿萱化治蘇湖手植門前桃李十餘年聯銓司鐸復乎北斗標型七千里捧檄
參軍條爾西秦駐節循聲丕著俯由末吏題陞簡命重膺仰荷封疆責任撫綏遐邇
億兆秦中憇處處棠陰歷踐大小官階日下來翩翩駕影通籍竭半生勤勞出恢學
術連朝應八番召見入告訂謨常用嘉乃懋績恩頒北闕丹書民均感厥深仁德戴

西陲黔首爾迺解組乞還惟是閉門尋樂情敦古處鄉黨不敢言官教演義方堂構
皆能步武憶仕陝二十八載名動在在堪傳當旋滇一十五秋實惠班班可致農桑
學校關中佛供萬家菽帛盤殮雲甸人思二廣若夫理貫天人性命道宗孔孟程朱
尺步繩趨抑抑希賢之品還原返本規規經世之文自少年早絕浮華持躬行於弗
怠迄晚節仍勤講改溥教澤於無窮一行一言著爲坊表五勸五戒立作箴銘禮訂
簡編猶見先民矩矱字刊辨要允貽後進楷模至如操守端嚴性情樂易外則光風
霽月不求合以詭隨內則璞玉渾金不沽名以輕售人有美曲成之人有過深諒之
存心養性邵康節差有合焉崇儉黜奢范希文不是過也洵哉聖世賢良偉矣豐宮
人物且也排難解紛樂施好禮洞井里之弊下情均爲上仲篤本支之親九族視猶
一體廟宇攸關風脈倡義培修差徭實累村閭捐租豁免分鶴俸以興鄉校膏火籌
自私囊造虹橋以濟泚江柴薪便於衆竈推詳梗概踵循先正之遺規縷述芳模類
多陰行之宿德凡此典型所在直並壽於蒼洱昆華驗之輿論交稱無間言於父母
兄弟夫閭里有淑修薰其善良尙致禱於飲食矧邦國有存愛沐其嘉惠弗思報以
馨香浩等抱璞含真詎敢阿其所好素知習見何至譽其不虞仰維彤廷彰善原有

成例之可循竊效青史書名請附鄉賢而入祀伏冀俯垂鑒察即賜申詳俾邀天闕
之殊恩得薦明禋之盛典庶幾揚清激濁立懦廉頑則於世道人心裨益不淺矣謹
呈

滇文叢錄卷五十四

書牘類一

東西涯先生

楊一清

連得手書窮邊寥落中不勝慰藉知近來東剗所及如僕者僅一人耳顧僕何以堪此感愧感愧比事想審帖冬間套中賊情決不敢保恐非書生所能獨當况陝西武備廢弛之甚極力料理只辦得二三分而武安債帥擁虛位失人心已久奈何爲處今亦不敢不勉凡百以身任之利害進退皆所不暇顧六月十四日賊到蘭州金城闕下若無前奏留官軍其害不可言也今雖無殺獲之捷幸不失利僕七月初九日到蘭州莊浪礮火不絕道路阻寨卻再不會犯蘭州蓋彼亦知我有備故耳靖虜邊防頗區畫停當今冬想無虞姑未敢言及蓋士夫方惡聞修邊之說此事當爲即爲以佚道使民無所不可不然今賊勢如此既不敢保其全勝則慎封疆守要害設險自固以逸待勞斯得策也又避而不爲然則若之何其可哉大抵令人止可以樂成不但凡民爲然耳此中曲折難盡難盡募土人自爲戰一節事體相宜人心樂從非如所謂招募藉民爲兵者也冬間賊果內侵必獲此事之用今亦未敢盡言

東東山先生

楊一清

翰教勤懇極感至意北虜入套已久未嘗侵犯東見於高家堡西見於寧夏河東墩台者數亦不少而沿邊一帶瞭見烟火無處無之此其奸謀尙未可測僕十月間大閱鎮兵於固原十一月大閱邊兵於花馬池皆號數萬先聲伐謀之意也兵衆而即散分布諸要害聲勢相接如賊犯某城堡地方所至爲正兵某兵出其左某兵出其右爲兩奇以應之某兵繼其後爲援隨處皆然聯絡如貫珠又多藏兵於素所無兵之地至則出其不意易於取勝大要避之於沿邊廣遠之地而圖之於鄉村阨塞之區賊誠似先年深入恐難以善其歸顧此賊今不窺我之西而潛寇我之東若解此機者然延綏東路兵馬精強無足爲慮况又不能深入不過覬覦近邊而已向者兵機一疏以去年曾有此機而失之故先事預圖欲得其千里深入有機可乘而爲攻其所必救之計耳非敢輕挑強胡無故啓釁奏疏中亦已明白不敢不慎承諭使人以器之說愚意正與此合賤目積勞與熱舊患大作餘情不及縷縷

與內閣吏兵諸先生第二書

楊一清

兩寺新命人心聳然精采百倍諸被改擢者悉皆砥勵鞭策用圖報稱往時頽靡廢

放之風爲之頓革願習玩已久人猶未知所重其參政僉事改卿少卿者同事且譁而輕之親友問訊輒出言語若以爲墮坑落塹云者流俗之難曉至此此固不足深卹然轉移之機在廟堂一籌運耳何則二寺體勢素輕今雖奉有明命而朝廷所以待之者未審何如以京寺待之是亦京寺而已矣以方面待之是亦方面而已矣此其故不可不講也若一切循常襲故不加隆重則空言無據何以欲動人心至於考語一節關係尤重蓋巡撫巡按與二寺政務不相涉考語無憑填註未免詢諸二司二司未免詢之知府往者弗振實坐此故今不爲之處其事勢恐又漸墮故轍中而莫之能救也詳具奏牘伏惟察之

與內閣吏兵諸先生第四書

楊一清

茶馬論列已罄其愚雖未敢自以爲是要其勢事不得不然其推原祖宗立法本意恐是一段大議論似不可少所患私茶不易禁官茶不易積耳大抵茶是本馬是利無本則利將焉用官買固順以輸運之艱故有招商之議商買固便以價出之難繼也故復有官賣之議行之數年茶司各有數十萬之積則金牌可復然僕前所言差官一節又不可不預爲之思也至於四川東鄉利州諸處誠今日利販之淵藪其地

密邇漢中宜附陝西巡茶提調不然禁之於此開之於彼譬之治水不於源頭理會而徒遏其流恐奔放潰決之勢終不可遏餘惟主張國是者采擇之

與內閣吏兵諸先生第五書

楊一清

清地募軍文冊差官奏繳監牧之政二事爲先願茲政初舉僉謂草場爲土人占據已久決不可復必復之恐激土達之變而總制秦公尤主是議某熟知此中情狀恐阻搖撼乃其故習不足深卹懋簡練事之官分投清理憑據籍冊盡得其實徐諭土人聽其階愬分豁改委他官復勘凡辭有可指及情有難堪者稍稍還之奏疏中所謂審虧牧地之額不敢失衆庶之情者此也至再至三其情已盡其辭已屈然後樹立封界分地授軍地有定額軍有定止草場既復人情亦安向之羣咻衆閔者今何如哉至於募軍之令初下任事者習於往歲延審招募之弊閒生疑議殊不知積年逋逃勢既不能驅之復業而盜賊奸宄皆此輩爲之將來貽患不細今收集歸之官官獲其用彼安其役門攢戶合而力不孤什伍團細而官可考固未嘗取諸見在有用之人而貽損此益彼之誚也疏中亦略及此誠懼傳聞之失真聽察之難憑故曉曉云耳若以爲自銜伐豈某之志亦豈明執事之所以見待者哉大抵天下之事

在見之真行之果若徇流俗之論則無可爲者矣

與陸提督都憲書

楊一清

不意流賊之變驟及江鄉上則南都根本之地下則東南財賦之區關係至重鄙懷不勝懸切不獨同室被髮纓冠之義而已去年已嘗慮及此屢言之諸老本兵以事勢未及未有所處亦嘗致書巡撫巡江及敝處府衛使知此意早爲設備不知曾留意否而今早如所料矣計此賊百戰之餘雖甚勇黠顧本不習水戰制之宜無難第恐得我連降驅被迫脅之以刀兵啗之以財貨則我濱江樂徒游食鼠竊狗盜輩皆彼鄉導皆彼精兵也不早撲滅則根本爲之動搖貢館爲之阻隔其禍有不可勝言者正意當此危急之秋誠得如執事才識威望而習知江南事宜者往領安攘之寄必無不濟方謀議間忽得來翰毅然請行聞者稱快本兵即如所擬但願以拯溺救焚爲念星馳前去量帶西北勁兵數千人北駐江北以爲聲援半渡江南以備截殺彭提督仇總兵大馬亦於南都以東隨鞭屯駐防遏一以壯金陵之保障一以爲瓜真二縣之防有急易於徵調至於召募鄉兵求間諜懸重賞以待之術取計破用收不戰之功又執事之所稔知者不贅言此窮寇也譬之用獸不宜急門鎖江以脆

弱不練之兵嬰其初至之鋒取敗固宜而志則可取較之閉門畏縮者不同是宜憐其志姑貸其罪以責其後功則人知自奮矣指揮孔湧素以驍勇聞楊能又出京營二人號爲出也今皆喪敗儻不見棄絕或可收之桑榆掌印指揮陳章廉靜不擾愛養士卒以固人心無出於此且鎮江叢爾之郡驟屯重兵外而防禦賊寇內而承應上司勞憊可知可役其力不可徵其財二者茲徵則驅之爲盜耳當於他郡縣多區畫錢糧輸送前來以備供應嚴有司科派需索之弊此止盜上策也况鎮江衛官軍糧餉經年不得支給屢奏有行未聞區畫紀聲道怨極生變難保必無不可不慮又思此賊出入無常聞大軍之來或奔淮揚通海二州以竊山東彼之計常掩天下不備而我之患常生於所忽故淮鳳之兵不可盡撤山東之地不宜全虛營之圖之

與內閣諸先生

楊一清

某衰朽病廢之人久不敢致起居於左右不惟體勢宜然亦實爲多病纏繞不能近筆硯故也新正二十四日忽兵部差千戶陳璽齎咨文見示知有提督陝西軍務之命方患痰嗽伏枕聞之驚懼不知所出伏念某曩官京師因目病痰疾足疾爲患澁誠懇請章數十上乃定俞旨休致今年七十二歲精力日憊耳目四肢無非受病之

地豈能復使供任不然則望天子登簡眷注之恩賢宰相汲引扶持之德至深至厚人非木石豈不知感知報安敢崇飾虛讓甘爲名教之棄物哉疇具奏疏中仰冀垂念斯文夙昔之愛力爲維持使得苟安林下以全餘年則感荷之私所謂生死而肉骨也力疾口授代書奏瀆萬希加察

與胡永清亞卿

楊一清

閣下道躬古道有壁立萬仞之雄浩氣昌言有萬夫莫奪之勇老夫初知之而未深深且信矣而未悉也逮夫處賊濠之地抗章銷變有曲突徙薪之忠而天不加察黨禍者巧設機非以陷之及及乎不免矣於是乎心醉神伏幸朝廷百年作士之有斯人也虎口旣脫要路屢登而老夫偃伏林下有願見之心無得見之階而向往之誠固在也病廢以來已漠然無與於世事矣不意忽承新命自度不堪負荷卽具疏辭免而勅符旗牌關防俱降恩賚便蕃制詞隆重督以大義期之古人人臣之義不當復有辭避而近患目疾痰嗽未愈勢不能出不免再疏陳請如天聽未回只得扶病而往金羅兩進士至承教翰詞意諄懇因得竊觀近所上諸疏皆至論名言而忠厚惻怛之情昌大俊偉之氣溢於言表其間亦多觸忤時忌吾人不能深諒徒撫其違

衆數語以爲口實其微意所存固不能窺也夫以公之才自足用世公之節自可抗俗公之望自能繫時重輕一二醜正之輩徒自損耳於公何與焉鄙見謂未起之先宜居貞養晦修其在己者耳天下事不須再言反招衆咻無益人我雖賦畀不忘忠大臣盛節而知幾之神向口之戒固聖門之家法也不得已而起然後以其平日之所負抱所欲爲者隨所位任而大施之若矜不得施則奉身而退庶乎始終之節全而出處之義明矣賢者自有處豈俟贅言乎

與湛原明司成

楊一清

賢關重地乃得鉅儒斯文幸甚世道幸甚京江密邇南都門上任未久而時雨之化已停停在人蓋昔之爲司成者多以法束人法嚴而弊愈多犯者愈衆執事以誠待人以德服人人感其誠而不敢欺化其德而不忍犯爲師儒者不當如是耶老夫病廢以來已漠然無與於世事矣不意忽承新命病不能出兩疏懇辭既乃蒙恩賚便蕃勅詞隆重人臣之義不當復有辭避而病嗽病痰未愈不能就道進退維谷有如此者奈何奈何

再柬東湖都憲

楊一清

老夫起廢西征執事奉詔敦遣奈衰病之軀夙疾未瘳新恙繼作不能即時就道致勞憲節久駐心甚不安昨又蒙寵以佳製款以盛筵情文兩孚儀物交至執事體國之誠愛賢之意不可復加矣而走也非其人也其何敢當其何敢當醉酒過多目眚益甚未能躬謝先此代拜但侑以文幣佳賚使蕃不無傷惠蓋執事所將君命也老夫之行國事也享之以酒饌固當欲服重之以幣帛似不敢受况勸駕之禮前既有行茲亦不當復出謹當納之郡中知我罪我尙希情亮

與李獻吉

楊一清

老境長途忽此良晤二十年戀慕之懷少得慰浣殆天假之也願止得兩接言論匆忽而別又增一倍悵惘矣拙稿爲好事者所刻蕪雜不足觀亦無倫次誠木末且播醜惡於人既止之不得亦欲借是以備遺忘俟教於名家鉅公自西涯之後非吾獻吉莫可託此昨承面諾希乘暇披閱存其可者而去其不可者有當君意處批教數語邊城得此如濯清風於溽暑中爲快何如刪去一半待別錄成帙乃求大作序諸首得因是以傳姓名此生大幸幸不見吝

再柬內閣諸先生

楊一清

入關之初已奉一書後暫住省城數日詢諸二司訪諸鄉士大夫皆云戎備廢弛行伍消耗其原皆由倉廩之空虛軍食之不繼今日急務必得充實邊儲查補軍伍先養後教則軍令可行軍氣可揚軍威可壯此非赤手空言所能辦必鳴於朝廷鳴諸當道而後得慰所望職業所繫故不能已於言也耳目所及彫敝之狀已不忍言而窮邊數千里未經耳目者當復如何良可憂懼願爲政在人舉用才能亦非得已近日度支所處支應目前猶恐不給積歲累月奈何爲計鄙懷拳拳欲爲地方遠圖不然今年經理只了今年明年經理只了明年歲歲差遣不已勞乎僕誠闇劣受知君相誠不敢自負自棄此下車第一義煩深體而曲全之

與金蓉谿司馬

楊一清

錢糧煩與鳳山極言期於必遂而召募馬價在本兵必不見各大臣體國有同舟共濟之義門牆道誼之私固未暇論也戶部初擬不過欲應答目前區區則欲爲地方遠圖邊軍缺馬十居其半苑寺茶馬徒取充數行太僕寺收貯馬價不多乞討之數欲一半供召募之用一半仍留買馬使邊城多充厩之良則邊將生敵愾之心矣足

兵除清補軍丁之外別無所處惟召募庶幾可行然無錢則亦不肯應命既當軍役

必置號衫弓矢器具彼貧民誰肯自出己財以應執銳披堅之役乎奏內所引弘治十八年之奏乃東山之筆後亦不曾多用存五之四在官不知彼時本兵何所處也軍門必有財用乃能激勵人心蓉谿之疏所論西海賊情當以後一着爲得計如冬間套內無賊明春或可舉事苟無錢糧財用寸步不能行但此言不可先泄惟蓉谿處不敢不預告也徐當論列以俟進止

東巡撫王都憲

楊一清

套賊久不露形跡近日走回人口傳報大衆臨河而返俱在套中意圖南牧果然當在旦夕間矣城中選軍想已就緒原擬七月中旬以前造冊徼報八月十五日起程九月初一日到邊今既有前項聲息不得不預調防守後有的確消息再當飛報鹽引已派發四鎮林正郎聞已到鎮城此君儘肯任事任勞任怨蓋有用之才也昨傳金蓉谿已致仕未知果否蓉谿處此危疑之地得脫甚妙但種勛資緣賄賂固未嘗及其門彼何由知之而嘒嘒者之論至此然則楊震能畏四知而不能使王密之不加震亦貪吏也耶寧夏事變不常故得如楊宏桂勇者鎮定之而言者誤聽至此且士夫之取楊宏正以其廉而反謂其不廉正以其直實而反謂其狡猾正以其無附

靡而反謂之奔競是非易位良可爲世道慨也

與江南諸親舊書

楊一清

入關中已四閱月江南消息茫不與聞邊務廢弛已極如破屋然床床皆漏雖極力修補不知能振起二三分否且往年總制專備套賊今套賊之警方殷却未嘗入寇此其奸謀未測或待秋深馬肥乘間大舉亦未可知邊人或以爲有所畏避不敢進未必然也甘肅一鎮回賊窺其西達賊掠其東士不解甲倉無厚蓄守臣告急專一仰給軍門而謗才赤手不知何以應之所喜到鎮以來耳目一新將多効力軍有鬪志雖不敢爲犁庭掃穴之舉亦欲收執訊獲醜之功若夫成敗利鈍付之天矣邊城岑寂翹首江雲不勝激切顧受命未久不敢言去俟虜患稍寧乞骸之疏當在明春耳餘不喋喋

與唐提學憲副

楊一清

此見邸報陪寫叅牧甚非所宜閣下以人品自當殊擢以年資亦當不失爲長憲造命者豈偶未之思乎但吾人自處常使係於己者有餘而係於人者不足無傷也況低昂人物士林公論具在而乘除損益天實主之亦惟行法以俟命而已若因是介

諸心胸形諸言面非所望於賢者朝廷已用次員廟堂必有所處矣

東司徒秦公

楊一清

承覆奏准給鹽引銀兩足感扶持且承教示委曲僕亦知財用匱乏司國計良難顧地方事重利害切身有不能已於言者耳鹽引糧銀各至三十萬在一鎮則有餘散之四鎮則不足且今陝西各衛所負欠官軍應得月糧積至二三年數至百十餘萬上司所至遮道泣訴有人心者所不忍聞而沿邊折支不及本色之半貧苦之訴如出一口聞僕之來若有更生之望而謗才赤手惟以甘言撫慰而已幸蒙官帑送給又且許將藩司原收三項官銀留用尤感體悉內一件傳奉事所收銀兩係原擬該解甘肅之數今亦不敢轉而之他也套賊初不露形迹近日走回人口傳報大衆臨河而返俱在套中意圖南牧果然當在旦夕間矣且區區往年總制專備套賊今甘肅虜情尤急蓋有三寇焉回賊窺其西亦卜刺巢據其南零賊掠其北彼鎮士馬怯弱倉庫空虛實難支持每見奏內謂甘肅已寧實未嘗寧也况速壇滿速兒遣牙木蘭糾合瓜沙瓦刺諸賊將謀入寇屢得諜報云云未敢深信亦未必全虛所喜其先遣回酋脫脫木兒領兵窺掠一入我境即被勦殺或足以挫其鋒而折其氣也寧夏

自遭變故人習狡詐反覆多端故欲得如楊宏桂勇者非惟防禦虜寇亦可鎮定人心巡按亦以爲然詢之士夫邊將衆口同然而言者誤聽至此宏爲總漕數年修舉廢墜使京運早完其功實多此執事所深知何俟贅言願此位欲之者衆得早脫爲幸不然如簧之口不知何所止極也

與太宰廖公

楊一清

縉紳士夫傳誦執事掌銓以來紀綱大振宿弊頓革近倖請託一例不行凡所舉措司屬無所預其力此固執事所優爲而鄙懷不能不爲斯文喜也二司缺官頗多前已奉達不獨區區而撫按亦皆無官委用如固原兵備河西關南二道守巡舊者已去新者不來其新陞者每多乞罷雖不見許每假此爲遷延之計况此地此官責任頗難其不願來者縱強之使行亦難濟事謬有舉奏倘事未行得如所請不獨老夫之幸而地方有所倚賴執事以人事君之忠亦不外是矣至叩至叩知銓部鑑衡不欲使外官干預但大臣同心爲國諒不肯若此不然則七十老翁亦嘗從事鈞衡台輔之後英俊滿朝豈無堪膺是任者而必強之使來來復不得自展老朽何足惜如公家事何如初命何恃愛不敢自隱諸惟鑒恕

與內閣兵部諸公

楊一清

近日渡河入境之賊陝西官軍逐之於內沿邊官軍遏之於外寧夏官軍邀擊之於中東逐西奔且戰且走延將一月方將盡絕蓋是積年入寇猾賊道路甚熟伏藏甚巧斬獲雖不多而死於山谷沉於河流者頗衆所喜官軍接戰未嘗損傷地方人畜不曾遭害寧夏境上雖微有虜掠旋即奪回而達馬委棄道途死傷不可勝計大挫而遁莊浪走回人口傳係小十五部下之賊而花馬池邊外套賊有答話探尋其未出者或足以沮其邪謀喪其驕氣矣謹具實以聞不敢有所粉飾是雖非大捷然河套河西兩地劇寇窺伺之際關係非輕彼蓋狃於往年空虛將乘間肆掠而不出虞表敗至此區區不過坐鎮移文而已固未嘗有勞而各路官軍有聞闢而喜之氣似不可泯幸裁處而振興之

與刑部都察院諸公

楊一清

陝西樊紳之變本出妖言愚民被其誑誘雖率衆攻城而旋即散去所挾兵器不過數件署官立號虛名惑人亦無顯跡始既未嘗流劫鄉村戕殺人命後又未嘗與官軍拒敵止是入山二十六人爲子鰲所獲餘皆解散之後官司陸續擒捕轉相攀引

至此今槩坐以謀反之律致陷一百六十六人於極典情恐未安聖明好生事下法司看詳必不盡依所擬而僕忝有地方之責不敢不言且此事傳聞已久上下因循不早撲滅逃罪不暇何敢言功陝西地方此事甚多別有論列蓋欲消患於未萌也總希裁處之僕亦盡吾心焉耳

與甘肅巡撫寇都憲

楊一清

所諭地方事足知留心邊務糧銀已發五萬兩去矣腹裏買糧固知不得已之言但腹裏臨鞏地方收成亦薄米價騰貴近日洮岷靖虜等處急缺糧儲區區及王巡撫俱發官銀糴買累月買不及半且蘭州每銀一錢買糧料時估各九升召商與八升還不樂從安定會審每銀一錢官糴不過斗一二升又無可買者比之涼州莊浪時估返似高貴此事決不能行若民運本色亦是舊例但節被好事者題奏事例俱徵折色解蘭州戶部請勅郎中一員在彼收貯聽該邊領運此舉上下已相安縱欲強之使納本色必致奏告紛紜終於報罷况先年民運亦無本色糧草到邊止是大戶領銀就在本處糴買上倉今據分守叅議所呈涼州迤西倉場頗足供應惟莊浪缺乏之甚若肯高其價值減其斗頭人自響應奈何小廉曲謹之人每每避嫌寧可斂

怨務潔其身延捱月日苟圖免過倘有緊急徵調將若之何此在撫台督處何如耳
缺馬之說誠然誠然六七月間已爲莊浪西寧涼州並嚴鑾發去七八千兩此外別
難措給近日曾爲貴鎮及延綏懇說馬匹缺乏之故兵部止奏發一萬二千兩煩差
官去陝西布政司領回買馬仍先過固原給與明文但二鎮分給甘肅止可領八千
兩仍留四千以給延綏可也苑馬茶馬自有御史專管區區難以干預但聞之吉御
史云今歲洮河茶馬該給寧夏西寧之馬已給甘肅矣陝西取討五百匹若教早
來留與本鎮固無不可今各枝兵馬已差官軍領回不可復追回夷聞已遁歸惟莊
浪賊情未定陝西游兵在彼兩月因料少草惡馬死甚多臨河有賊恐犯腹裏已掣
回蘭金地方矣遊擊嚴鑾可仍令莊浪二處截殺爲當處置回夷諸事久未得報示
有碍回奏希早發幸幸

與崔世興光祿

楊一清

承差回止得一堂名方以爲訝今書至乃知賢者之無遐心也春間所寄二柬俱於
八九月方至書郵之不足託如此麻太夫人誌銘久未暇作作矣又未及書今乃寄
去煩改教乃可用也閣下在光祿條理精密一歲之間所省不知幾何縉紳推重聞

之盤糧科道官云然大拜之階也可賀可賀老夫衰病之人朝廷以戎事起之大義所迫不敢不出力疾赴邊罄竭心力大虜伏套而不敢深入回夷雖入而旋即遁去將士思奮境土晏然所以未敢乞休者以套賊之去留未定故耳不意忽有召命自度兩目昏眊不能閱視文字足膝軟弱跪拜甚艱豈有入朝之理得咨後已發一疏拜勅後又發一疏途間俟命若三辭不獲則飄然歸江南耳希爲我親造湖東達此誠悃幸勿以北來望我還我舊物保全而歸恩典有無皆不敢計

與康德涵

楊一清

初與桑憲副言令其轉請吾德涵固原會叙一月以罄平生正欲遣使奉邀而行取之命忽下敗興而止且聞德涵已至隴州隨又傳文旆已東歸計將於乾州約會故不及再邀老夫此來朝廷以邊事起之不得不出德涵之所知也到邊數月料理兵糧稍有次第所喜虜賊畏遁地方晏然方將上乞骸之疏不意誤蒙召命然新年七十三歲兩目昏眊不能閱視文字足膝痿弱行動須人攜扶豈能入朝供職得咨後即具疏辭免得勅後又發一疏沿途治疾從容出關如不見允發第三疏即飄然歸江南耳此非知己不敢以告亦孰肯信之哉二十五日至涇州日行一程擬於元旦

可至乾州德涵望於初二日到使得飽聆清誨以慰數千里長別之懷諒惟不外
與崔岱屏邦侯

楊一清

僕老朽無庸於世久矣去歲朝廷以邊事起之恩禮隆重不得已而出到邊以來罄
竭駑鈍以圖報稱仗天之威大賊伏套而不敢深入回虜雖入而旋即遁去八月間
達賊有犯我境者我軍追殺不遺一矢雖止得首級二十八顆而其餘盡驅之墮河
以死僅餘六騎出邊自是醜虜遠遁邊境晏然方圖上乞身之疏不意忽有召命遂
起紛紛多口若謂有夤緣復入之謀噫是何言哉是何言哉已兩次懇辭如天聽未
回至三至四有不但已也然辭免之意亦不爲人言實因賤軀多病目不能視閱文
字兩足軟弱步履跪拜甚是艱辛豈能入朝供職且播醜態於人人哉執事平日遇
蒙知愛今晚節末路更希曲爲調護致意於當道君子得還我故物返之山林所謂
生死骨肉之感也若曰心欲求進口爲此言是欺天罔人名教之所不容雖庸愚決
不至此况年七十有三來日能有幾何尙不知止而垂涎於聲利之途哉情激辭迫
亦恃高明有以深亮我也

與李獻吉憲副

楊一清

是月六日道破石舍人趙勝持來翰并得所評箋制府小稿歎服高見平生詩文中
事原無苦工信口肆筆好惡不自知然同聲之應竊敢謂西涯後莫可當是任者閱
之益信相見不遠幸先期爲我卒事近作督府稿益疎鹵不足觀然道故實備詩史
他日或有取焉亦煩細校而去留之以慰至望欲取道汴河以達徐州爲飄然之計
到中牟稍俟有定舟徑登發免汴城人事勞攘請過中牟以罄所懷諒不外也大抵
去年之出勢不得已也出矣竭吾力以靖三邊用酬知遇予之志也召命遄下則非
區區之所及矣議者乃妄意吾之出不爲三邊爲內閣噫是何言哉是何言哉予雖
有口如簧安能塞滔天之浮議惟拂衣而去與世相忘庶稍可自明耳何以教我俟
面乃盡

再與獻吉憲副

楊一清

鄭州小恙神思輒昏昏接吾崆峒恍如夢寐中語間有述答惜不自覺舟行一日稍
醒家史出焉不覺大笑併故步殆失之矣老態如此尙可語及天下事哉發舟後阻
風阻淺各一日竟棄座船由長船至溜溝登淮安座船二十三日至徐州此去當稅
駕乎山之阿水之滢睡烟歌月以畢餘生大江之北無我足跡矣舟中取崆峒集閱

之真若捕龍蛇搏虎豹急與之角而不敢暇焉者不圖先秦古文復見今日乃知近之學古文者之無所得也文而若此何病於學古哉樂府歌辭直超兩漢上得風入之意六朝而下弗論也鄙作本無足觀特欲取正知言亦因以自考非取必於傳前稿想已校畢張生領回矣寄去自訟稿東遊集二冊中或有取焉幸明以教我

與石屏州知州張孝書

那欽

貴治東首諸天禪刹古蹟也規制宏偉佛像森嚴第建設歲久傾圯弗稱邇余承調征討蒙迷劇賊經過晉謁周旋熟視心適欲新之把事魏彭景忠魏作衡廷瑞進而言曰此吾祖名暄者創建之功也茲若此婢僕寡弱弗克繼述且繞于尊善不敢自專也增葺之舉惟吾是賴余曰吁詩云我思古人實獲我心今吾子亦有以獲我心乎遂諾及凱旋召工計值捐俸百金廷瑞亦盡厥力請左右以司出內相與共成善道何如

再與石屏州知州張孝書

那欽

刹謹畢事曷請紀乎然事之可垂悠久者惟金與石若虞周彝鼎之識岐陽之鼓會稽之刻皆是物也幸得一言壽諸天石以示不朽

汝明兩文由石屏州知州張孝撰諸天寺記中摘出乃嘉靖十年立碑元江土府

尚有那鑑那嵩那崙皆重文教云

與臨元喬兵道

許鏞

臨元山高箐深盜賊易起生自髫年見強寇千百爲羣擄人財物民間皆荷擔而立臥不安席及生自仕途閒住以來年六十四歲矣猶日與鄉兵枕戈逐盜星夜不輟自謂終身亂離中矣豈意節鎮以來一塵不驚四民樂業使生老年見太平也昨聞舍親家已故福建廉憲李晴山公之子兆慶以瑩瑩一書生與巍巍萬戶侯爭訟舍親筮仕翰林吉士改掌科陞大名府知府轉四川副使再遷湖廣叅政被一御史劾其年老是時爲嘉靖四十五年也生亦在朝見狀元李石麓爲閣老以晴山年貌語吏部天官曰斯人官雖數任囊無一錢遽以老而斥歸將使清白之吏灰心何以爲政於是吏部以晴山轉福建廉訪總八閩台人始稱公道得行不幸晴山遭疾化異物於閩中矣今其子孫僅以墳前地租供伏臘幸天不絕清白吏之後猶以學校升斗之澤繼續書香若非仁人如台端者念其鳳毛則晴山與尋常墓靈塚伯俱爲餒鬼不知隻雞斗酒紙錢麥飯從何得乎晴山之孫陞爲舍姪袁州府同知之壻今舍姪棄世止遺老朽尙見賢人之裔得大君子培植恨老足不良於行不得踵轅門一

爲舍親家叩謝故以竿牘上塵清曩他日見晴山於地下告之曰喬公祖眞仁人也既保障萬民使不陷於寇虐又保祐清苦使得全其祀事是於李氏生死而骨肉也曷旣惶悚之至

與友人書

王錫哀

煩辱儀顧恰欲謝鳴不謂一兩日內竟病矣區區有懷託巢老轉布曾爲第一備達否敝門潘生爾彪吳江籍偶來相視久不能歸景仰高風于函丈欲圖樞叩此亦有志士也希翁台進而教之如何哀弟頓首

柬劉晉川司空

周理

古人以學道譬之牧牛發心修道如尋牛久之見性如獲牛以念佛總攝六根如調牛故經云譬如牧牛之人執杖視之又云一回入草去把鼻拽將來此捷徑法門老檀早深入矣經云見性易學道難既得見性放過即不可幸老檀二六時中將本參話頭重加精進一切處不可放過念茲在茲如煉精金轉加明淨今時學道之人只務說禪說時似悟對鏡都迷只爲不肯信心一切處放過被境所轉不能轉物爲道山僧在長安市中與諸宰官居士單提淨土一門同修念佛三昧如黃太史慎軒居

士夫人去世發願永斷愛欲獨處靜室公務之暇一心念佛廻向西方袁又損昆季及一門眷屬俱持彌陀佛號并往生神咒爲西方公據又劉尙寶李御史諸善友俱以念佛三昧送日月此諸法友禪士雙修福慧兩嚴真可謂在家菩提也今以化諸君念佛公案一百八句見性成佛秘旨書寄老檀熟參熟念自覺覺他但念佛有二種一口頭念報身佛二心頭念法身佛未見性人念口頭佛已見性人念心頭佛以心融十方故念佛一聲十方震動經云佛身充滿於法界正念佛時佛即是心心正念時心即是佛心佛不二法界如如經云覺徧十方界即得成佛道惟老檀深心念佛不盡

與及門殷夢臣書

名謝廣東茂名人前黔陽縣令

趙炳龍

有人自貴陽來聞足下已補官始大駭繼而大笑謂足下必無此今果不然是僕能深信足下之心而足下與僕所願守區區之節者爲無負也幸甚幸甚雖然不能無戒於足下足下貌樸而嗇性耿而急情摯而盡貌而嗇則易爲時俗之所薄性而急則多爲小人之所忌情而盡則易爲左右之所倖爲俗所薄未能無憤心矣爲人所忌未能無悔心矣爲左右所倖未能無姑息之心矣以是三者之心而能守區區之

節適足下憤事而速謗其欲明哲保身也僕未之聞也願足下勉其難全於所易忽以光霽者開其嗇以柔忍者濟其急以委曲者防其盡習溫厚之樂誦和平之詩一出於坦蕩之途凡於人之薄我忌我倖我者有察而無校則足下之全節庶乎能自振拔而僕成就足下之意始終爲無負云

與強子任同年書

高應雷

記與足下別在負慶閣後無他語但期異日報國之事臨上馬又飲僕三爵誓生死無相忘其夜宿羊林酒醒思之汙淚俱下以是知所感激至今心勸其言己亥聞演變訪足下生死不得恐家爲亂兵所沒無有識者又恐已隨蹕去庚子聞足下在大幸大幸及壬寅聞緬變周籠山歸自威楚道足下親授廣文嗚呼足下疇昔之言已矣陶淵明不爲五斗米拆腰事鄉里小兒廣文之俸其薄於五斗可知也而足下甘心焉報國者願如是乎若欲僕暴足下之罪則當裸而縛之尊大人之墓表重覘其悖教然後令兒女子之善唾罵者坐而訶之鳴鼓而攻僕猶以爲聖門之薄罰耳僕與足下同年共業其所期許者至詞說唐突知足下不罪雖然國家之事至無如何之時此身雖覺無益抑豈不賴有此身哉文信國孤忠被劫何難殺身成仁猶望黃

冠出遊者意有在也足下誠欲愛身以俟異日與其隱於吏孰若隱於塵隱於塵孰若隱於野乎隱於野孰若隱於山林煙水之間乎衛之考槃秦之秋水陳之衡門讀詩而見古人皆可做而學也且夫秦政雖暴不入桃源客星在天鈞竿難覓兩大寥廓何地不可容者願必拘拘焉借口於居貧居卑若晨門封人之所爲乎願足下亟去官挈妻兒耕於陸山之麓與老農圃爲婚友塞通顯之路讀忠孝之書寧沒世而名不稱其榮於廣文有間矣僕近來善病頗厭梁肉地方齷齪無可寫憂亦無餘財問醫藥日訓童子章句楚音聒耳心甚煩然舍是無以治生復益勞碌每四時佳節則鄉思沉痛兄弟經夕不寐泣下沾襟雖鄉人饋以酒脯愈篤悼歎誠所謂一日而腸力迴者耳今盡典衣囊約得銀十六七兩暫遣舍弟歸侍老母僕行蹤尙未可知丁彥充任說修傅介石皆有書不識可在故處念足下詩六首草舍弟扇頭蕭颯秋聲不禁長讀三舍弟在省知荷提携非詞謝能盡雷再拜

寄同社書

高應雷

近有人自鄉中來云昆明池及西山皆無恙惟自南薰門以至出郭瓦礫鱗集衢巷蕭然出郭二三十里間盡爲草場以牧騾馬牛羊人不耕插舊動成墳寢多被犁掘

士大夫圖築之附郭者則以集倡伶嗚呼果如斯言僕之田廬知不可復問矣夜郎
烽火川原阻修回首故園膺肉俱顛僕聞之尙爾如此則凡當日之親履其變者傷
心慘目爲苦當何如哉僕少年讀書不能窮理是以官居狼狽碌碌無所建明且負
簡書而遯山林罔於人臣致身之義欲歸養老母則又以冒罪於國者不敢倖福於
家客寄他鄉遭俗厭忌力單舌短無可謀生爲僧則犯逃墨之譏爲賈則乏販人之
術一弟兩僕執掌無何更遂歲寇盜靡常鄉民惶擾山藪垢壁間虎狼蛇豕之類白
晝食人有事不得不避避之不善輒有性命之虞非以錢米雇鄉導者則惴惴不敢
去當此之際思欲如故鄉之識所去就也胡可得哉今在義陵三年與俗稍狎居鄉
教六七子僅可博兄弟口糧兩僕出民家作苦工日覓一飽至於四時之烝禴社臘
之羔豚賓朋之酬酢則但付之燈前紅淚酒後汗顏而已悲夫悲夫又義陵酷熱慘
寒冬夏難處每當溽暑薰灼飲食則蜈蚣蝮蝎之毒可畏寢臥則蠅蠹蟻蝨之穢可
厭其土人書必江浴夜必湯浸以去污穢塵鬱之氣僕遠人性不相合不浴則已浴
多冒風風後以藥散之動致虛損惟秋後四五十日稍是養和耳及乎霜冽而冬草
木搖落凡濱河負山之處或經月杳晦風雨淒淒每雪則江水不流無問老幼男婦

悉登之火爐間自曉入夜烘櫓袖衝寒氣僕性不慣此衣棉則身起熱麻向火則眠
多血障舍是寒者又冷不可當地方苦窳不產煤炭終夜兄弟抵足有如蝨蟲之僵
者耳回憶少年時螺峰訪梅寶珠咏雪風景猶依依昨日也而僕自貽伊阻謂之何
哉嗟乎相知貴相知心僕僥倖一官不能爲國抒憤又以數年狂客廢菽水萱幃名
教罪深誠爲鄉黨所不齒然栖栖而爲此者實有類乎跋胡蹇尾之行使得於鄉評
月旦間貸以一字之口誅焉則僕千秋有知己矣時以老母念篤暫遣舍弟南歸兼
致念諸君意遠憶詩二首不成體祇足自點幸鑒而裁之雷再拜

寄徒三和書

讀徹

吾不見汝已三十年矣記與汝別時汝方有十餘歲今不但吾老汝亦將老即相見
恐亦不相識也雖同在世儼如隔世自非土木無情其何堪此汝師祖師公伯叔兄
弟輩不知誰爲古人誰是今人邈兮漢兮總如說夢汝省城師祖知去世已久一姑
婆亦不知近作何狀言至此吾腸欲絕矣更復何言汝今學業道業何如朝夕親炙
何人所作何事汝老母兄弟輩年來家計何如皆無恙否名山不致有內魔外撓否
後進有志向上者否常住邇來增損何如方今海內盜賊縱橫國用告乏賦稅加派

日復一日民不聊生天下皆然以我吳爲田之累雖得優免接年蟲荒旱荒吾鄉僧田之害不問可知往往官長有宦遊我滇者莫不以此爲念欲得永免雜役則受福無量向者蔣太尊送其瀕行諄諄曾以苦告承公心許惜其名山不幸聞尙未果如蜀中他處依田派差尙有僧夫俗兵守城禦敵之說倘國家一時有不寧法門有難正未可知是以僧又莫若無田之爲愈也世道如此深山窮谷草木食願自了粗足矣更復何爲前見汝來書切切以居處衣食之道不得其所爲告此亦見汝無遠大之志世間但有衲子蒲團外飽死者多幾曾見蒲團上餓死的人況天地爲屋廬何處非我所有而必戀戀於一隅老死鄉曲其他盡失我不愁汝無飯吃無衣着但恐汝衣暖食飽已所作何事思之思之法門八萬四千何門不可入道但看人骨氣強弱莫問入門難易汝試以一生事問之於心先打一草稿在胸中將來要作何等樣人成何等樣事何等是我力之能到或不能到如此審定然後用志不分如老鼠嚼米倉着力一處久久自能豁然穿透取用不盡東嚼西嚼枉費工夫終有何用即學問無人指點無下手處或隨持一經一咒一佛名號看一話頭莫生取捨心愀厭心一條白練去枯木寒灰去即使此生不得桶箍暴斷當再出頭來自是現成如或

悠悠忽忽終日坐在無事甲裏百劫千生轉沒交涉活佛出世亦與汝無分况望歸來何爲豈不聞阿難言將爲如來惠我三昧不知身心本不相代父子上山各自努力吾言祇此珍重珍重切記切記吾以弘華嚴大法之願未終故歸期難定處所難定處所難定歸與不歸看機緣何如耳汝在山須要親近識者復引後進師輩一一爲我致意不知存沒何人難以通候我雖身在方外心常照見受業之處實未能忘汝水月師祖塔建何處塔銘行狀皆曾有否衆師公骨塔亦在何處每於祭掃時節惟有設靈遙拜痛哭而已我一生得力受用處全得你水月師祖些些子如人飲水冷暖自知向人吐露不得即此真是衣鉢相承向者分囑水月田租並我自治衣鉢田以世法論之皆汝承受不知何故與汝無分吾不得知量其汝師輩必有高明定不謬也汝亦但隨時隨分可耳我雖在方外創業治產於祖宗分上毫無有補言之慚愧汝亦何苦升合相爭聞汝野師翁近習靜鷄山亦是名山之寶汝當時時就教執侍巾瓶勝見吾也法潤師來吳奉木檀越命以華嚴懺法相委多恐爲謀不終安仁弘辯師及諸山耆德見時一一皆爲申念申謝不盡所寄之物俱惟片紙及法師弟書悉爲我一轉致萬里鴻毛恐爲行人之累聊見一念耳

前差官至滇所以不敢即致書奉候者蓋未知老先生尊意何如耳昨差官回備道老先生優禮之殷兼述老先生雅意翊戴天王至真至切更無他念雖一時同事諸公猶未深信而芑所以信之不疑者蓋觀老先生之爲人乃當今之豪傑也從來無欺人之豪傑無負心之豪傑無面是背非之豪傑無朝三暮四之豪傑芑是以不顧議論是非敢爲具疏竟請封爵然老先生便當從此改絃易轍拜表稱臣奉正朔歸版冊文武之升降一稟於天子征伐之行止必請乎朝命如是乃不愧祖宗不負朝廷不負芑之荐舉乃成千古真豪傑矣芑先始祖吳越王諱錢俶者以江南之地歸宋而太宗賜鐵券金書子孫世世與國同休芑恐皇上不允封爵故疏中即引先始祖爲例然當日先始祖與老先生今日不同者有四請爲老先生言之先始祖立國吳越傳三世四王保有江南之地將近百年與五代相終始而宋始興與宋朝未嘗有君臣之分也而老先生大明之舊臣也其不同者一也先始祖王爵傳自先人歷梁唐晉漢周俱受冊封而老先生之王號則自己之僭稱也其不同者二也先始祖土地授自祖宗始於唐末並非取之宋朝而老先生之雲南則天朝之封疆也其不

同者三也先始祖保有江南世世奉貢未嘗與中國有一矢之加而老先生二十年來殘破數省屠戮朝廷之人民糜費朝廷之金錢何止數千百萬甚至殺親王辱大臣於朝廷不得爲無罪其不同者四也芑之所以引先始祖爲例明知事勢不合不過委曲以成老先生之美倘蒙明旨俞允是聖天子破格之鴻恩芑不敢居功即或朝議不從另議封號老先生亦當拜受以俟再請加封老先生如此謙讓不違恪守臣節則是功名之路正長子孫之福無量青史揚名姓氏俱香非芑所能測也芑生平心事光明磊落不肯自欺欺人一遇當行之事即舉世非之而不顧即今日爲老先生請封一事其阻而且忌者正自不少而芑反衷無愧竟行不疑即老先生異日相信相負總不問矣然老先生生爲男子頂天立地不乘此時立萬世不朽之功名而徒據一隅以自雄非所以稱大丈夫也且今日之勁敵非直我明朝之患也今先人曾被大難是亦老先生不共之恥也芑輩戮力於外日在圖維而老先生擁強兵安坐於內地恐不免貽笑於海內英雄矣齊襄公復九世之讐春秋大之老先生能無意乎佇望之切言出不倫伏維亮察

書牘類二

與蘇撫宋牧仲書

趙士麟

企仰清風延望霖雨匪伊一日矣謹以膚見遙佐高深竊江浙之區莫急於水利旱與澇皆荒而尤莫急於旱蓋澇則江浙雖饑而全楚之粟順流千里不二旬遍達吳越旱則數千里之內皆資擔負所及者幾何故莫急於旱也僕往者承乏江浙遠考史籍近訪輿言每惟河道之通塞即係生民之休戚在浙則石門一帶在江南則京口丹陽一帶年年苦涸漕運病之至京口丹陽數十里間外藉江湖消長居半內資長蕩湖開家湖練湖諸洩而閘壩久廢餘流涓滴源源帶水浹月不雨即民舟常苦艱寒每歲隆冬輒興役開濬以通漕艘擊水挑土昏曉不息墮指潰踵恒有僵仆而死者不一勞不永逸屢欲具題大爲開浚而相時待力顧此失彼耿耿至今天畀仁人覆臨茲土彼倉冥冥實留以有待矣頃凡自吳越來者極言江浙亢旱之狀已踰三月即杭嘉蘇湖幾不通舟楫甚至有傳洞庭山以南亦可徒步者不勝駭異情關舊治中夜轉展唯有一策可以少濟此五六郡望歲之饑民想足下亦必有同心也

念旱既太甚則米必湧貴米既湧貴而外江之米不至則愈貴今即移咨各省招來米商而京口丹陽河道已成陸地米艘何自而入愚以爲今插秧已失時農民十室九流糊口四方趁此時將京口丹陽一帶數十里河路大興工役開浚深廣其利有四一開河路以來米商也一通民船以便貿遷也一興大工救饑民也一免冬役以恤祁寒暑雨也此一帶河道約長三十餘里開深一丈二三尺合蘇松常鎮四郡之搢紳巨室富商大賈委曲勸輸措資或亦不難遙念足下仁心妙畫其已見之施行者亦既載之口碑播之國門此救荒之澤當更必有出於尋常意見之外者不揣鄙陋遠獻其芻蕘幾備高明之一採也

答陳元若書

傅爲訂

三年中心朋雨散矣遙憶犬別之高江水之深悵然興嘆如陶潛云豈無他人念子實多願言不復抱恨如何來書籌及去就古人交道於斯見之朱子謂士君子之出處非獨其身之事而已所處之得失關風俗之盛衰弟於榮辱得喪解脫已久而出處大節其敢或苟今之未去者以有老親命也屢次請還卒不見許是以腸一日而九轉嘗讀退之文歐陽詹舍父母之養至於京師將有所得以爲父母榮雖父母之

心亦然詹雖不離側其志不樂也詹在京師雖離父母其志樂也弟今者實有類於是然而家懸萬里音問闕希每一念及神魂飛越而生平倔強亦無有望人世相憐之意久而零落如故旅邸無事經月不出戶庭以書史自娛覺落漠中之意味較深於軒冕也伊川云君子之需時也安靜自守志雖有需而恬然若將終身乃能用常也弟不敏竊以此自勵足下漕務暇儘可讀書別後學力想已大進五代之傑首推慕容元恭傳云恪進止有常度罷朝歸第則盡心色養手不釋卷乃知無本之木不可以繁昌也仕而廢學則事業所就固可想見也就所見以質高明足下其有意乎

其對與夏醴谷書

其對與夏醴谷書

同譜中久而篤者兄一人耳入楚時擬到長沙縱談連日夜不得擬入武陵抵辰州斷當有遇又不得相遇固若斯之難也萬里得手書如親面談兄之拳拳於弟亦猶弟之拳拳於兄此後見否付之天可也弟居家數載枯坐窮經苦無師友講習終不長進退之云聰明不逮於前道德日負其初心朱子云三十以後長進不多諍思此旨良可驚懼書中齒及饗猿弟何敢隱債負三千酬利之餘僅足堂上甘旨曾賦詩云負郭田空都爲宦汗牛書在卽爲豐傷何如也所可幸者母健弟友庭內乖戾不

作至家計有無不足深較又籌及補官弟念之深矣檣櫓不可爲棟梁軸解亦難爲舟楫自揣義分當以山中老耳復何言哉復何言哉

吳興答張西潭書

傅爲訖

辱書兼惠丹青諸物甚佳舍親備述起居復道棋陽政蹟南陔孝行聞之甚喜孝慈爲從政所先末俗惡直醜正固上行私魚肉所子恬不爲怪賢乃能振拔時吏克紹先猷所謂鐵中錚錚者也書曰惟既厥心又曰圖惟厥終蓋言徹表裏與始終也賢其慎之余才識短淺學業荒陋其中未見有萬一可師者賢於落漠中顧特見取私喜且愧歸省來一載餘矣兩代白頭猶幸強健如昔承歡之際私心熟計列鼎食者思負米而悲歌得尊位者向北面而涕泣古人一日養不以三公易之豈尙復遠離有所希冀然欲守私情則老親數趣登程跪請不許欲從命赴闕則風燭可慮是以腸一日而九迴決然於進退之難也抑又念得親在於順親逆命即爲不孝不得不委曲以從擬九月初旬起行初意紆道棋陽一觀治行緣挈眷隨行願未得遂入會城時或賢於政餘扁舟我即暢談半日足以慰情離索余生平不喜俗亦不慣閒問視外即緡閱經史自樂或感時觸物娛憂抒懷因之寢食俱廢筆墨遂繁不及盡錄

簡寄數十首倘異日懷思見僕篇什不殊面對也

答陳肇洙書

傅爲許

昔因祝人齋得交足下接談未數數然而大分逾疇昔是其然必有其所以然莊子云子桑戶孟子反子琴張三人相視而笑莫逆於心遂相與友竊謂我兩人亦然別後屏應酬據槁梧窮經暇即靜坐欲剷除一切雜念以歸於一而思仍龐雜伊川云此是不誠之本橫渠云習俗之心未去而定心未完紬繹斯言寔爲心咎去秋八月立一册自記凡晝爲夕夢書以自警及冬遭變功夫間斷今人不如古人於茲益信足下賦質沉毅功力勇銳從此功無斷續其造就不知所底來書云目下考索典制留心時務此是寔寔經濟非同紙上空談但須提其要耳又云朱陸門戶不可過爲主張以得罪前賢弟亦有說焉譬之行陣朱子堂堂之陣正正之旗陸子則偏師直入者也故論者曰陸似奇朱似平平者中庸之道孔門傳授心法高者可俯而就卑者可企而及奇則極其流弊恐究竟不免墮入滌蕩中考夫先生云朱子精微象山簡率誠爲定論沿及明代諸儒輩出醇出無疵者首推文清陽明功業炳煥可方李忠定講學則偏後人詆爲誠淫邪遁似亦太過吾輩才識學力萬不逮古人何敢妄

置一詞然入門路徑亦須剖晰明白去偏就正然後爲得也近得容城孫徵君所輯理學宗傳於宋則五子外加邵子陸子於明則文清外加王文成羅文恭顧端文共十一子爲正宗其餘不與宗傳之例悉附於後名曰儒考其書簡要可觀徵君自謂三十年苦心寔萃於斯斯亦勤矣然細考淵源毫釐千里必欲混而一之甚覺無謂足下以爲何如又云楊園全書必俟弟與人齋商酌然後付刻弟服膺此書守而弗失其言精微廣大與讀書錄先後一轍人齋費半生精力補輯成集厥功不小原本間學重出者檢除之字訛者改正之望速設板以公字內無疑又云農書不宜入集曾同翠庭商酌或附卷末名曰外書亦可夫爲學在鞭辟近裏而日新不忘呂文簡曰學有間斷時或於良友處講明亦爲攝伏身心之助夏如畏學有本原功夫切寔時與講習裨益自多弟則入滇索處同志寥寥求如人齋與足下一二人相爲砥礪豈可得哉

與劉蘭谷書

傳爲訂

四海知交歡聚都門詎非一時盛事而諸君子德業文章各有本末弟以不肖介其間如東海意怠粉粉猗猗而似無能故其行列不齒今得齒諸君子後視東海之意

迨幸矣歸滇子然萬里音信斷絕每當風清月朗登高遙睇見雨散雲飛益深悵悵
閱邸抄吾兄回京次明亦回京諸君子中得一二人尙不孤寂靜山解任未知脫然
歸去否翠庭視學於越想已出京此中離合升沉之故似有數焉存乎其間又念諸
君子地之相去近者百里千里遠者數千里未有如弟萬里者天末索居雲峯千疊
無出山之日則亦未有相見之日惟冀諸君子思日贊襄以勵相我國家弟在萬山
中偕二三父老扶杖而觀太平斯亦足矣所慮砥礪無人陷溺其心而已不知咎叢
厥身而人不告終身過中無有上達之日是所恨耳別後定多玉藻無由接讀以作
指南弟雖偶然操筆譬如數尺漁舟在清淺溪間自弄烟水乃使入滄溟而望三山
必將瀰茫運轉自失南北莊子所謂見笑於大方之家也遙寄數詩聊當晤對

與祝人齋書

傅爲訂

輦側一別忽焉三載萬里孤子夢想爲勞弟嘗言雷翠庭與兄乃吾師非吾友也今
翠庭視學於越公暇兩君子晤對講學此生平第一樂事恨不獲聞餘緒以淑身心
疑造物之厚兩君子而薄吾也然吾雖窮於朋友幸不窮於母弟詩曰伯氏吹埴仲
氏吹箎怡怡膝下吾母顧而樂之則又何敢疑造物之薄吾也足下先儒風規淡然

粹然豈今之有哉弟雖不敢自即於頑而質劣學薄無人夾持便鬆懈無力蓋獨居
惟見有己見已則日蔽將有以惡爲善以非是而不自知者可懼孰甚焉吾鄉人
才寥落嘗思厚自培養以供後進挹注今源之不涸數流即竭已先枯槁安得潤物
乎年來閉門靜坐日勤雜誦檢束身心以爲挹注之資然終不能推己之有餘濟人
之不足也宗五之變聞之如萬戟攢胸叠旬於邑諸君子諒有同情夫吾輩之壽夭
得失出處去就難以預度如此訂精力就衰垂垂以老而學行無可稱述功名不立
於天下後世後顧孑然絕不敢致疑於造物也德薄人應如是耳吾兄立德人也以
吾兄之德而無後爲善者其懼矣造物至是始可疑矣謹啓

上王漁川刺史書

楊棟

竊某與州人士嬉遊宇下三載於茲矣深仁厚澤仰答末由私衷耿耿每欲有所陳
獻前因勢分懸殊恐涉越俎之嫌故不敢言既而得晉光霽復以客坐筵前又不便
言今文旌將移展謁少期若不言是終無可言之日矣故不憚曉曉爲閣下陳之今
夫世之論爲政者動曰清慎勤三者固尙矣雖然猶未也浸假清而迷於黑白其弊
也愚慎而膠於成見其弊也固勤而詘於事機其弊也懦是雖清也慎也勤也其弊

與不清不慎不勤者等此之謂中無主中無主故外物得以奪之而左右乎我者因得同伺其隙以售其奸此方高乎簡穆之風而彼已具夫炎天之勢患生肘腋痛入膏肓其受害有不可勝言者惟一粒金丹可以療之不過曰明決而已所謂明者非察察之謂也要在平日致知格物虛心澄慮隨事觀理如握新磨之鏡物來畢照莫能遁其妍媸所謂明也惟明斯決不疑不貳如理亂絲一刀兩段不以禍福而遷移不以鼓簧而回惑不以力之艱難而稍阻不以勞之因依而苟安如此則內不迷於德行而人不能欺外不屈於物慾而事無不濟古之立大功建大業者靡不得此則興失此則喪姑以楚漢往事言之沛公精於藻鑑任賢使能言聽計從當其未入關時已具有帝王氣象不待約法三章之後始筮其能構鴻基也項王性多疑凡事游移鴻門之會固不當以成敗論英雄然而楚勢之終於不振者未始不胎于此此亦足以爲不明決者之一證也至如申韓之學意主曲說是刻覈而非明荊公之法志在必行是執拗而非決又當別論是又不可以一例觀者其中分限爽以毫釐某十載牖下與窮爲期未嘗偶詣當途今乃不能檢情自封猥首而溯誠鈴下誠念夫君侯天資忠厚人也仁愛有餘而明斷似若不足愚人一得於高深未必無補願少垂

盼焉語曰貧者贈人以言僕固非能言而君侯直能知言而納言者故於去之日從士夫之後徂餞城南不以酒而以文不以頌而以諍

與三胞兄書

馬錦文

七年闕別萬里歸來朝夕相依頗遂怡怡之樂轉瞬間忽又雁行南北回首鄉關不覺停雲幾度弟自春間自省起程因設措盤費沿途耽擱直至五月初十方能入京計一路所費已至七百餘金雖不可謂非鐵錚錚好漢而此中心力亦大半耗去矣六月內補任掌廣西道署河南道又接署戶科掌印兼巡視東城刻下晨出夜歸幾無寧晷至天各一方光景老貴叔姪回時自當備述家間一切全仗吾哥弟若多涉囑懇轉爲贅語也今歲恩科矜望藉朋喜信此番若不進步可知並不發憤雲龍倘有差上省務勤寄家信總交省城南門外忠愛坊通海緞舖楊文老萬無一失端此寄達并候近安餘情縷縷不盡欲言

答某中丞書

錢澧

五月十三日拜書具仰厚意天譴不肖大故連遭忽焉服闋勢不敢不即北上因前會同一事不識獲咎何由去秋八月行及鼎州特遣一奴子詣潭覓舊吏鈔寄底案

是奴殊鈍直至今春二月始能以所鈔至伏視之竟乃知實受明公之賜循心自揣無任戰兢自獲近仁宇前後數年竊謂循行職事可以質之寮友告之鬼神即如此一事力辦幾及一年不謂去官而後變態乃更若此吾徒知效一官亦何在得一絕免後患之道也不得而已委之於命然前實有所最痛一事而後有所難處之端方始聞命也先慈殯猶在寢先君老病懼或傷之匿不敢告竊冀老人壽更百年不肖子或更有桑榆之補然後具以實聞不謂其竟已矣至今念之猶有餘痛所謂難處者謬荷聖慈得以忝列曹司正恐引見不時或蒙詢及從前案由若竟據實以對將不免多生事端既有所不忍若不過朦朧引咎則不但俯欺一心實亦仰欺君父有所不敢早夜思維誠不得一途由之使兩全無憾也前萬廉使還承大君子不以雲泥之隔注念拳拳茲復引而益親實出願望之外禮無來而不往然亦不敢匿怨友人謹此片紙披露腹心自今而後誠不敢更聞命矣

上伯制軍書

劉大紳

十二月之朔九日寧州鍾收到委巷中宣示關書聘金俾大紳爲五華書院山長當即再拜祇受肅械申謝想蒙賜覽矣惟是爾時感愧交并詞意鄙拙不盡所言懼無

以仰副大君子樂育群才之至意是以忘其忌諱重瀆視聽冀教誨焉蓋聞書院之與學校遞爲廢興者也三代後學校之教不修士之有志於學者始相與擇勝地立精舍從事於學而書院名焉其後天下郡縣皆得立學則有改書院爲學校者矣又其後學校之名猶存而實漸失於是書院復興子朱子衡州石鼓書院記詳哉其言之矣朱子曰今郡縣學官置博士弟子員皆未考其德行道藝之素其所授讀又皆世俗之書進取之業使人見利而不見義士之有志於爲己者蓋羞言之是以常欲求燕閒清曠之地以共講其所聞又曰毋以今日學校科舉之學亂焉所謂富哉言乎者非耶五華書院肇自西林鄂文端公其繼起而廣大之者皆聖賢之徒公相之選萃三迤之士人於其中延師課訓之藏書有樓寢息有室修膳之豐膏火之裕視中州大省有加焉是亦所以助學校之不及也然而士之來游其中者爲學來乎爲科舉來乎其與子朱子所謂郡縣之學校有異乎無以異乎蓋不可知矣今欲使來游之士盡捐舊習相與深求古人設書院之意既無是師安得有是弟子而况如大紳之衰年廢學漫無短長者哉然大紳常考自有五華書院以來名臣碩彥學士大夫蓋無不出其中即以近時論若錢龍池少司馬李鶴峰中丞周立厓少廷尉錢南

園副使萬荔村方伯其最著者也彼其時亦豈能不從事於科舉之學哉毋亦惟是即科舉之業以求聖賢之學探天人性命之奧嚴義利人已之分本末兼該內外交修是以見用於世與徒事估畢帖括者相去霄壤也是以諸公之所成就爲昆華洱蒼生氣色而爲之師者若前之孫潛村先生後之張惕菴先生亦且至今聲稱不朽也抑又聞之前明顧涇陽先生高宗憲公於應天書院講子朱子之學東林之名滿天下以社學應之者百餘年風未熄此亦子朱子所謂好古圖新之資能謹而存之者也今大人百世之師也惟望出其所學以授大紳使大紳得以遞授於弟子而皆得師焉則今日之五華書院與郡縣學校而並興當世有子朱子者其必爲之記其本末以告來者矣大紳謹上

與袁蘇亭書

劉大紳

蘇亭足下邇日承足下數數叩紳在東治譜足下固樂道人之善者也紳何治譜哉今鄉人無不欲欺足下者紳何敢爾顧念東人之於紳寔有不可解者方紳以乾隆癸卯年筮仕濟南新城歷甲辰乙巳丙午大旱災荒之時拯救無術方欲引退大吏且量移曹縣代者既至矣而新城人不欲紳去也請於大吏弗許適使者琅公過縣

南境新城聚數千人遮於道乞留紳長山西鄰邑也亦代新城乞留使者爲言於大吏得留三月既至曹則其乙巳丙午之年災傷更甚於新城也方務與民休息而河使者檄修趙王河工段數百丈日役萬夫兩月而始竣無逃亡者無疾病者又檄辦河工料楛三百萬紳以方收斂暫緩之河員訴於使者督責嚴急將按以罪因請爲十日限縣人爭先往納未十日而三百萬之數足矣紳偶行民間有於馬後言穀賤銀貴開徵期迫者顧語之曰俟穀得價再輸未遲也此語遂達大吏耳怒謂曹縣知縣逕緩征矣急遴廉能吏代征之至則新糧皆如期完矣因議征乙巳丙午年逋欠計爲數四五萬兩有奇揚言不足數即以他人易紳民大恐晝夜輸將不數日得三萬餘兩廉能吏由此膺上考戊申年紳遂以病自劾方紳之初至曹也以與上司有違言投劾去縣人聞之環署泣留且相率走訴大吏絡繹道路間適大吏有事於泰山見面面諭止之紳以是不得去至是乃於元日密自甲文不假書吏手迨得請而縣之人始知之雖乞留者相踵而至無可如何也甫歸而攤賠之令已至於是又出再至東省題補文登未抵任而新城方修城城工棘手人爭避之新城人轉請於大吏願得紳修城紳能辭大吏不能辭新城人也城工竣方議重新正蒙書阮以錦秋

湖荒爲膏火田蓋前此在新城時已草創是舉其時正旱災未能大有爲也而已以在曹縣任內事同衆人革職遣戍矣是爲甲寅年月日也兩縣人於是爲紳歛鍰請贖得歸其後大臣有以紳上聞者廷寄來滇送部引見仍發往山東以知縣用將補福山福山地僻事簡其士人類皆能文章如新城於紳爲宜而部已選人裁得暫攝兩月焉次年補朝城又值大雨水以七分災報大吏准五分五分則不成災矣幸民間素知紳無怨謗者紳又以病自劾弗之許許暫移署青州同知次年以武定同知陞署同知固閑曹也時登萊蝗蝻四起大吏委紳督捕復值河南黃河水漫自漕運河至大清河爲沿河郡縣害又委紳查災賑紳素無才能皆勉強任事而已後一年爲乙丑得家書知伯兄叔弟相繼物故而母親年已八十乃援例請養遂得歸數年在東如是而已無所謂治譜也而東人之於紳則寔有不可解者請留矣代贖矣未已也其始以病歸也東人留醫藥者幾年乃歸爲紳母壽爲紳壽如在任時也歸則送至汴梁城燕游數日始別去有送至樊城者其繼以贖歸也延留爲壽者如初歸則有送至漢口者最後以養歸也則有送至周家口者是皆足滋紳愧者也無所謂治譜也其間有無知愚民懼好紳者或舉古人行事附會於紳或以紳行事增

飾之轉出諸情理外皆不足據爲治譜也恐足下不察而以樂道人善爲事即紳不敢欺足下而人有欺之者矣今天下之欲欺足下者豈少也哉敬質直布之足下幸賜覽焉月日紳不宣

與張溟州太守書

谷際岐

自去秋得奉恩旨後日夕企望謂可計日還京以圖暢叙後趙朝君來方知爲節使
扳留辦理未完公事益見宏才實意隨處感孚正在欣慰即接來書知抵東後辦理
扶靈南歸已諸事安速而於鄙人行止言之倍悉尤徵關切因臘底足疾復發臥牀
四十日未得具扎奉覆今又接來扎知閏月十六起行適愚亦定二月二十二日自
通洲上船取道江南還溟而揚洲鹽憲恰有書相約如慈靈由揚取道尙得清醅一
奠並爲至孝人掃室相待暢伸東道情也總之此次盤根錯節不但主知從此益加
特達而大才磨鍊封疆柱石盡基於茲乃知大任之降定自拂逆中來惟冀我知己
五夜冰淵倍加刻厲乃不負彼蒼此番玉成厚意也三十載相得師生豈宜作尋常
套語惟有忠言實義互相切劘方無忝賢豪以道敦崇之實耳奠幃匆匆未能伸敬
又以疾不得恭書聯匾正深歉仄乃承致書言謝益難自問茲臨行略具數行未盡

所云准擬四月初在揚奉待邇時又面悉一切也專此奉達並候孝履惟自玉不一
上姚夢穀先生書

師範

範白夢穀先生閣下範負性椎魯家鄰西鄙雖早承庭訓少知自愛乃困之以帖括復疲之以舟車舊學遺忘毫無本末昔嘗住都城者十有餘載竊見諸鉅公手持文柄震懾一世非不工於立言考其行率多不合或迂僻爲古詭誕爲博範竊心非之於是顯者之庭落落然無範之跡即通門舊好亦不過旅進旅退而已惟於南園待御處得聞閣下高風亮節自以爲祥麟威鳳生既並世而不獲一見心欽欽然若有所失流濕就燥或亦水火之性則然戊申還滇先君子嘗召範而謂之曰我沒必求有德有言者之文以銘我無拘戚誼無豔官階若所見迂僻爲古詭誕爲博者皆非我願無已則東注可東注爲南園字先君司教晉甯昆明乃旁邑數以所業質極獎之故每呼其字如諸生時範當日默不敢對私念得他文不可知若南園文亦甚易易乃先君之卒反後於南園兩月範自奉諱回鄉營葬植碑修祠而誌墓之典缺如去冬承乏望江聞閣下主講鐘山擬以謁制軍之便泥首崇階借償夙願偶遇周午塘言之午塘曰先生已移席敬敷子猶不知耶傾聽之餘欣躍彌日齋心潔貌慕然

投刺遂游霽宇如坐春風退而念先君子壽躋大耋登仕版廿餘載著有政聲於法
已得銘且範亦非欲以文諛其親者據實陳情先生必憐而許之遂不揣冒昧持狀
叩謁果欣然命筆並爲手書入石夫不得之於南園今乃得之於南園之師又即先
君子之所謂有德有言者範可告無罪於九原矣鞅掌下吏一晉省垣率多不懌範
則以得見先生爲幸他務苛繞皆所弗恤楚米之役先期趨別先生謂範差竣回皖
先生已歸龍眠相晤必於明春執手相送情致拳拳孰料先生來皖而範猶滯楚歲
序之遷流人事之變幻有如此範自抵鄂赴襄足疾耳疾相繼並發困臥舟中者七
十餘日因病得間成古近體詩二百餘章雜文數篇已免鈞六世兄另繕清本俟銷
差後面奉左右不見南園得見南園之友當亦樂爲教育也五排廿四韻先錄寄呈
淺才弱筆無贊揚高深亦聊志向往之誠耳臨穎悚切伏惟爲道保練不戢範啓

寄袁十三蘇亭書

師範

別後八奉手書俱際多冗言不盡意漢皋困臥忙可成閒始得爲知我者少陳其概
嚴於疾惡而果於任事者性之真也非病也急於爲人而緩於謀己者質之慤也非
病也然而病矣作令之難習見之而尤蹈之要有三說焉甘載奔馳積欠數千雖西

人之子惟利是圖然自居憂後旅次艱虞親朋莫恤彼肯慨然相畀若終負之不信疎率之才浮沉苜蓿盤中故人推轂而諸巨公遞薦於朝遂得覲天子聆玉音一旦自甘槁落致孤引拔不義束髮受書先君子爲解致君澤民之語往復流連若有厚期幸值今皇上勵精圖治旣抱六尺之軀不能投効毫末不孝且不忠職是之故遂爾出山否則以十四科之老孝廉日與新進少雋伺候於訑訑者之聲音笑貌何其不憚煩與守篆十月頗思振作乃不以爲迂即以爲拙統而名之曰不在行嗚呼今之所謂在行者果在何行哉苟且遷就迎合揣摩極其弊於上爲蠶於下爲賊與其賊也寧拙與其蠶也寧迂強而從人匪惟不敢抑亦不能蓋範之嚴於疾惡果於任事也非迂也性也而其急於爲人緩於謀己也非拙也質也昔秦越人之弟學醫於其兄診脉結筋鍊精易形挾其藝自周之楚居郢中三年無有過問者巫從瀟湘來鮮衣美食侍者十許人舉國趨之若鶩此巫也取生人而死之亦不悔彼醫也即日取死人而生之亦不顧楚人信鬼而惡藥習俗所移賢者不免於是去而之齊有名於時長洲茂苑間有善謳者雖車子秦青不能是過羨長安之麗而往遊焉諸名部爭逐之聞其登場觀者滿座乃一舉袂而哂者半一發音而去者又半大爲主者所

呵妖淫之聲已中於人心前有箏筑後有篳篥而欲以引商刻羽之調叶之是惑也
遂棄其值而歸終其身不復言遊用則爲燕之伶不用則爲楚之醫範皆有以處之
矣邇復聚書數千卷間有秘本百念灰冷一經把誦心輒火熱不減少時旋自念楊
升菴王元美蟠天際地出鬼入神不過博文苑傳中寥寥數語消磨歲月可懼亦更
可歎然結習難除聊以自娛倘新累脫然便擬請告與吾兄周旋選事則迂與拙之
病庶幾其少瘳乎近作一册詩略後序一通寄呈左右試刪之阿郎想英英欲上矣
吾輩已過五旬血氣漸衰節飲加餐萬勿以強自恃黃鶴樓晤香海文選樓晤芷汀
接談數日差快人意滇中諸舊雨懇以此書示之俾悉鄙意依風眷戀路與心長不
宣

覆張補裳二丈書

師範

未晤者數月此心飄然已墮北地之西矣小春廿八日馮刺史伴至辱降手諭並寵
佳章已若舉某之性情遭際曲爲傳摹第渲染逾分何其刻畫無鹽如是耶捧讀數
過不覺歌而忽哭哭而又歌也曩曾聞之吾丈曰滇之詩當以某爲第一不惟滇之
詩即宦於滇者之詩亦必以某爲第一夫滇固少詩然現在如蘇硯北袁癡青羅琴

山巖南樓文望山趙覺莊沙雪湖嚴匡山皆矯矯不羣十倍於某至宦滇者之詩則萃十五國之英才周旋一省無不人握靈蛇之珠戶抱崑山之玉况笏崖默齋兩先生已如雙峰之並峙乎倘此說一出恐滇之人必甘心於某而宦於滇之人必不忘情於丈也故爾時舌橋汗下不敢置一詞以對乃吾丈拳拳之意終以某爲可教而不肯鄙夷之一則見於代題小照之作再則見於辱和悼馬之篇三則見於前日所寄之七古某果何修而得此於吾丈耶猶記垂髫後即好爲詩要皆率其意所欲出凡所謂宗旨格律神韻皆未之辨迨交游日廣閱歷日深則獨醉心於飴山老人之說飴山曰詩之中必有人在詩之外須有事在若果從此用力則舉阮翁之所謂典則諧遠愚山之所謂一本一石俱從平他做起與杜茶村之所謂聞道皆可以是概之大集之佳者聲情綿渺韻致蕭爽于貴鄉中絕似西崖樊榭近則堪與穀人太史頽頽而丰骨猶爲疎峭然使局外聞之必謂吾兩人交相譽且交相諛矣抑知吾兩人豈交相諛亦豈交相譽者哉蓋交相勵遂交相惜耳非畧近况纖悉皆知大抵吾輩自墮地後即具慧業則庸庸之福斷難坐享以古較今往往而是惟當聽其自然無多作安排致爲造化老子所顛倒某近有詩云畏讒甘守口敲句苦拈鬚云云又

云刻舟枉求劍賣櫓易還珠云云亦可以知某之所處矣葉榆草尊齋定有副本懇
即借存敝篋使得與蒼山洱水共此靈長也山嶠多寒諸惟珍攝某啓

答鄧方輅書

王崧

曩在省城於黃次皋四兄所得知十兄汲古功勤求友志篤名甫入耳德已醉心嗣
聞敝縣兩獄並煩案鞫抵署二日旋即札布識欵茲奉手書及張大兄書細繹文義
始知荒函尙未徑達殊爲悵然僕質劣才庸所居復在僻陋之地雖束髮以後所嗜
惟在讀書而緹帙既少名宿尤稀講貫師資之益邈不可得惟日取陳編朝夕研摩
如蟬如蠹寢食俱忘三四十一年以來雖疾病寒暑奔走窮困風塵飢渴之中未嘗少
輟無如學海汪洋莫尋津畔白傅詩云所好隨年異爲忙終日同精力徒勞頑鈍如
故不圖謬爲胡君昆弟所稱譽而復爲足下所取信也僕於科舉之業幼齡即不櫻
心其訓詁詞章名理道學以及佛老申韓諸家之說皆嘗汎濫漁獵而迄無定見壯
歲出遊與士大夫相接更歷世故以證所讀之書竊以謂書分四部雖醇駁不齊要
其所言者道而已矣三代以上道主於行而不主於言晚周秦漢士各以所知之道
發之於言而文始著漢氏之東稍稍舍道以爲文曹子桓作典論論文而文乃與道

分韓昌黎杜少陵因文見道於是因所知之道作爲詩古文而其詩古文遂獨絕千古外此者詩若曹子建陶淵明元次山古文若歐陽公曾子固尙爲知道之文其餘諸子詩古文非不美也然非以文言道也蓋主於道者本其所知之道以爲文主於文者意在於文而取道之末節以粉飾焉而已士而讀書但當求道不必學文於道既有所知則爲詩而道寓焉爲古文而道寓焉即爲時文詞曲俚俗之談而道亦無不寓焉其爲學也非學詩古文以下諸體也所學者道也其學杜韓以下之詩古文也用其文章之法度以爲吾言道之唇舌而已文體雖多意在於學文則逐體致力而有所不及意在於言道則不名一體而無體不備若此者僕嘗心識之而才與學皆萬不能逮故問爲詩文多不存稿以其不足存也每思屏去詩文欲以管窺蠡測之知著爲一書質諸有道之士而早年迫於衣食近又窘於簿書未知何時得竟此欲也新舊詩文幸有從學張生於行篋中掇拾抄撮其制義已爲陸續付刊伏承索觀僅以詩古文三冊走伴奉教書無副本希於削正後仍發還也大集定多能借一讀快甚相距非遠前書曾邀枉顧若能惠然不勝矚望

詩報董竹溪書

王崧

伏承惠書敦忠告善道之義不棄疲駑而辱教之大指在於盡職守爲循吏而勿著述舊所著述不可鈹板行世俟歸林後藏之名山傳之其人此有道君子之言也雖然僕竊惑之有諸己之謂學施諸人之謂政爲治者不本於學爲道者不涉於事張南軒所以致慨於俗吏儒生之病也循吏不必皆有著述而有著述者豈必不爲循吏乎無著述而後爲循吏彼爲吏而目不覩詩書者比比皆是豈不盡爲循吏乎抑詩書果如時俗弋獵科名之具一登仕版即當棄之如遺乎知縣而著述恐廢厥事天下之人自山林隱逸外孰非有事之人孰是可廢之事載籍浩如烟海考其著述出於幽人畸士者裁十之二三餘皆懷符縲組各有其事之人也即知縣之有著述者宋元以前不必遠稽近代顧璘王圻李濂茅坤歸有光胡友信屠隆袁宏道王惟儉諸人列於正史文苑姓名然猶在人口耳間其人不必要皆賢不必皆不肖文苑所不列者又不知凡幾矣今世之爲吏而徵歌選勝燕遊飲博者不盡廢事之人何以著述獨能廢事賊與穀俱亡其羊故挾筴博塞所失惟均使不亡羊則挾筴之與博塞其差等或當有辨且夫六朝以來競尙辭章名雖爲儒而所學者雖雲鏤月模山範水之言否則貢諛獻媚行樂追歡也又或好勇疾貧嘆老嗟卑也儒者德業文章

本無二致彼乃岐而視之言雖工何益子思氏曰學所以益才也礪所以致刃也竊
嘗以謂三代盛時百畝授田三物造士學不專恃讀書世運既降非讀書無以爲學
政事著述皆讀書所推賢也所學之道曰仁求仁之方曰恕假如有人焉慮遠行而
迷其途則取輿圖地志紀程之書流覽詳究既出遊凡目驗足涉之境與其書或違
或合咸記注於冊以貽同志愛人之謂仁推己及物之謂恕造爲輿圖地志紀程之
書者使行道之人免俛俛之患愛人而推己及物之端也曩地隨時變遷創始不能
周密有作尤貴有述猶聖經之義理待後儒推闡而明則夫記注其目驗足涉之境
者其始異於無益之辭章也夫昔者漢氏之朝司馬遷著書百三十篇欲比於春秋
故其言曰孔子作春秋至於今五百歲小子何敢讓焉又報其友任少卿曰藏之名
山傳之其人意固謂春秋之書游夏且不能贊一辭况今世無游夏則此百三十篇
當百世以俟聖人也古著述之人高自位置司馬氏後惟王仲淹續六經授門人謂
董仇早歿程薛繼列文中子之教未作以俟來哲意與司馬氏略同自二子外揚子
雲雖擬易擬論語而不爲此言其餘作者未有鏤板時鈔寫流傳迨五代雕本盛行
凡有所作苟非乏於工貲無不付之梓人汴宋至今未及千載流傳之書較五代已

前不啻倍蓰雕本之力也刻書之意約有三端津逮後學一也請正四方二也徵求名譽三也作而未刻無論醇疵美惡固已凋殘磨滅同歸於盡矣即刻而流傳未廣日久亦就湮沒若本不足傳而刻之正如螢光燭火俄頃而息耳宋氏南北兩朝作者如林樂史七百八十八卷李心傳五百九卷李濤一千一百九十卷可謂富矣而或顯或晦其最富而行於世者新安朱子六百八十九卷浚儀王氏六百九十五卷其作之刻之之年大略可稽不盡在歸林後也若夫在官而刻書自一二卷以至百餘卷者不可悉數事莫棘於軍旅莫迂於講學王伯安並行不悖今人猶能道之而何疑於著述夫津逮後學仁恕之用心也即請正四方徵求名譽未嘗不可相濟前代王元美詩文播海內歸熙甫見而嗤爲庸妄子元美曰妄則有之庸則未也後元美學與年進乃嘆服熙甫之言近人汪荅文著堯峰文鈔閩百詩每摘其舛誤與之辨荅文重刻其書盡改從之使其秘而不刻人何由指其瑕彼何由從而改哉九州之域滇蜀爲僻遠蜀自漢文翁興學著述代有其人惟吾滇開闢至今廿一史中儒林文苑道學諸傳無一人廁名其間甚至辭章小技亦無一人見稱於騷壇盟主四庫全書博採羣籍其卷以億萬計而吾鄉人所作裁收關中奏議十卷南園漫錄十

卷且皆採自他方近日操詩文選政者偶得鄉人篇章急登於集而嘆網羅之無路
推原其故吾鄉先輩或有著述多惑於司馬氏之語而於刻書之三端皆無其意是
以寂蔑無聞曩居鄉時借袁蘇亭從事詩略文略之刻極力冥搜而所得甚夥則藏
名山傳其人者恐歸泯沒矣僕何人斯敢稱著述顧自幼嗜書讀既久而臆解生植
爲文時抒其所見是非不敢自信思質之有道先掇制義數十篇付鋟外有石刻木
刻數篇非刻不適用於用其他著述雖未遑編次而所言大抵相類津逮後學徼求名
譽均非所志也伏惟書教懇欵輒布區區附達所刻幸賜觀覽倘以爲妨於吏事而
悖乎仁恕之旨當剗削之也

與陳海樓書

王崧

秋初都門相遇接談之日甚妙無以罄數載離別之懷九月中附鄉人周君寄達一
書不過略叙寒暄而已吾儒爲學讀書之外質疑辨難當取資於朋友年來荔扉蘇
亭相繼謝世望山又遠宦於閩足下不日亦將出宰相見之時與地皆難預期今幸
聞問可通中心之所欲言請略言之夫人之爲學豈非求道乎道費而隱聖人有所
不知愚夫婦亦可與知其載於書亦謂之文秦漢以前無作文之說凡書之傳於世

者各言其所知之道而非以作文也僕少好讀書老而不輟至於世之所謂文非惟不善作亦不欲作然因讀書而偶有所知往往著爲篇章薄宦以來從遊之士輒付之梨棗遂爲世人所見其中說緯一書人不名之爲文而於樂山集則曰古文於樂山制藝則曰時文或謂古文爲善或謂時文爲善譽之者以爲博洽毀之者以爲繁蕪而於所言之理不察其是非所言之事不察其可否其曰博洽曰繁蕪則以書中每有所陳必徵引古籍疏其原委之故劉彥和云因情造文不爲文造情僕之爲書因述古而製篇而考古其篇既就始命以名非如作文之法先命一題然後臨文索理循題布置也謂爲博洽固不敢當謂爲繁蕪勢必刪其所徵引而歸於簡淨夫既刪其徵引則又何必爲是篇邪離道以爲文始於漢之季世歷代文集僕未嘗不觀然觀其於理有所發明於事有所考証初不計其文之高下也書者文也文者言也著書之人以文代口觀其書者惟當以目代耳縉紳談政事野老話桑麻其人各言所知聽之者但衡其所言何如豈計其語之或雅或俗音之或南或北哉夫流連光景周旋世故使人得以娛目賞心作文之樂趣固爲學之一端而自言所知使人得以稽古義繹舊聞亦非遜於學外也自帖括之制興士之習業惟取材於近代清空

轉折之文而隋唐已往之著作罕所研究雖已屏棄帖括別求古學而積習難移易其名不易其實僕自少至老不習帖括是以拙於作文而但著書以自言所知也夫有所知而著書以達之苟其能達則於文不求工而自工此惟深於道者能之非僕所可企及就使能工而著書之本意初不在此區區之見如是他人或河漢予言惟足下好學深思當有以匡正之耳

與宋芷灣書

王崧

崧頓首拜啓握別逾一載矣中間兩通音問而情憐究未敷宣今年三月杪得讀正月初旬惠寄之書具悉在景東事大損貨財良堪捩腕但利去而名來囊虛而政實部民頌德之歌春間已播榆郡不僅逆賊授首能靖邊陲而已人言吾榜多名士匪惟名士且有以名士而奏武功者林下鄙夫能勿望風翹首額手稱慶也哉歸田以來三年坐耗屏居破屋日以著述自娛明露可餐翠柏猶食桂香書院一席正玉谿生所云不知腐鼠成滋味猜意鷓鴣竟未休耳乃以物議支離之謗掩飾乞憐市廛之私大抵今之延學官師者專爲濟貧計是以內橐衣棺不堪爲弟子之人遽抗顏而擁皋比人品日下學術日卑端由於此非吾輩心在世道孰能知之孰肯慮之敝

縣浪穹有湖一區其水湍出爲河河口甚狹而旁有澗沙沙乘雨水而下阻塞河口湖水不洩而漲則一縣盡爲澤國先父經營數十年故河之外別開一河此塞則彼流彼塞則此流又築高堤攔沙掘深塹屯沙所以使澗沙不入於河而河得暢流然非年年修之則堤塹滿沙仍塞河而湖水必漲於是白之有司申請大府籌其經費歲支帑金且於地糧徵助其不足規畫既定後來遵守而行民免爲魚先父謝世崧復遠遊司其事者廢棄舊章遂致受災請賑大費補苴始得小安道光紀元以來兩河頓湮其一攔沙之堤屯沙之塹與平地相等崧歸里省墓入疆縱目昔之綠野平疇盡作平沙浩浩傷先功之泯沒惟民物之凋殘淚下盈襟不可遏抑蓋經費既爲墨吏攫取故工程不力景象如斯學中子衿赴愬索環共謀及時興工冀弭今年水患曾以相商而墨吏施浸潤之誥怙之者反以繼志恤災爲非婪贓貽害如是且百計保持惟恐墨吏筐篋不固或被取出救災損萬戶之身家充一人之谿壑水患之深拭目可俟吾人讀書學道凡有所行爲義而不爲利爲公而不爲私同讀此書同學此道意見竟不相同殆即來書所謂物議支離者歟區區之懷非足下曷以諒之拙著二種附呈教正邊郡寒暑不時伏維珍攝臨穎不一

與同學劉鑑書

寶欲峻

自五華別來彈指三十年矣何光陰迅駛若斯每於晤東郡友時一訊芳蹤知足下足家庭之樂飽山水之趣帷天席地友月交風王績云淵明對酒非復禮義能拘叔夜携琴惟以煙霞自適足下樂此不疲真羲皇以上人也而雲山修阻過訪無緣亦祇託想梁月寄懷江樹天涯知己落落晨星尙望如賦瀟湘之曲摘金碧之詞真萬不可得又况秋霜侵鬢非復後生興言及此輒效殷浩書空嘆咄咄怪事而已僕自爲冷官留迤西十三年隨以保薦卸任入覲後乞假歸來選期無耗遭先君大故繼以喪妻女坎壈纏身家計中落不得已携二幼子餬口四方已棲曲陽三載矣今歲決意杜門而爲當道所引復至貴郡自慙飄泊一官等曹公之雞肋到處累閔氏之豬肝心之憂矣怒焉如擣抵西林後每讀碑碣凡此邦鉅典悉足下喬梓大力倡首而車洪一橋無量功德皆老伯大人隻身之舉百世口碑盡在德門此數十年前所未悉而一旦深悉者不覺爲足下贊頌於無已也夫古今之大族多矣韓魏之豪石王之侈祇於狗馬聲色恣其所欲固不知所爲施濟也禮曰積即能散天地之所不得忌人物之所不得爭蓋其積之者厚且久故其散之者大且溥而其散之者既大

且溥則其積之者仍厚且久往過來續道固如斯足下之盡道竟如斯僕於滇固未
一二見也能不欣然贊美哉城中僅袁德姻兄昆仲朱玉弟昆玉舍弟蘇亭數人話
舊兩相往還距珂里尙二百里之遙未能踵晤仍祇想像顏色古人云一別二十年
人堪幾回別矧已可相見而猶悵望此情何以稍釋然一歲之間露月芙蓉之後霜
風橘柚之前或姻婭壺觴或縉紳嘉會豈無乘輿而來之時乎倘得賁臨一暢卅載
離懷諒足下不我遐棄也膝下玉樹亭亭更含飴弄孫均慶甚峻謹白

滇文叢錄卷五十六

雲南叢書集部之八十八

書牘類三

上雲南孫中丞書

程含章

竊章叩送行旌條經兩載祇以山川迢遞未克肅寄稟函然依戀之忱無日不神馳左右也昨閱邸抄敬悉老夫子恭膺簡命撫治滇南以臯夔稷契之經綸而處於政簡刑輕之地不特章桑梓之邦咸沾愷澤即老夫子亦得從容臥理種菊看書頤養精神以爲異日匡贊綸扉之用章聞之不禁手舞足蹈而不自知也昔狄梁公勳業蓋世桃李盈門而階前小草猶願爲籠中之藥章今日請得一比藥草可乎滇南山川重疊氣候和平無凶荒水旱之災有金木布穀之利家給人足固常空洵宇宙之樂土也自緬甸用兵以來元氣至今未復加以邊兵數動疾疫連年地震蝗生戶口衰耗毋乃政治有缺而司牧者之多賡民以生歟其大害在鹽觔夫馬採買三事敲骨取髓雖孤兒寡婦不得免焉前大中丞亦既革其弊矣不有人焉維持其後竊恐故態復萌也滇中多直亮清忠之士人尙廉耻不苟利祿不屑資緣邇來變遷亦已甚矣實學不修競以浮薄相尙士甫得一青衿即昂然以通儒自命交官府拜門

生恬然不以爲恠書院爲育才之地而風聲氣息尤令人不可嚮邇非昌黎公障百川而東之孰與廻狂瀾於既倒乎滇民質樸服食器用不尙浮華以晏樂爲不祥以爭訟爲可耻民之老死不至有司之庭者比比然也自長民者不恤其生丙辰迤西之民聚衆網殺書差者三十餘州縣雖懲治即散未有大殃而民風亦已壞矣章少時即聞迤東有燒香拜盟之事今聞此風大盛無地不然其弊起於銅銀各廠漸習漸染流毒民間不早創懲一發其禍必大而殺戮亦必多語云土醫醫國其次醫疾章願老夫子消禍於未萌救此十百千萬蠢蠢無知之民出鋒鏑而登仁壽之域也夫難憑者事也易逝者時也昔夫子初到粵東政治之美比隆鄭僑然五載珠江而除盜安民一事未竟厥功雖海疆自有主者而內河亦未平審母亦鎮靜和平之意多剛毅奮發之風少乎然而鷹鷂鸞鳳用各不同章以臃腫拳曲之才爲引繩批根之論譬之蛙鳴於水蟬噪於林所以瑣瑣焉幾經欲茹而仍吐者一則繫懷鄉國斯望治彌殷一則感念裁成斯關情倍切也狂瞽之言聖人擇焉伏維包蒙而教訓之則幸甚

竊查粵東山陬海澨，麤雜處爲從古盜賊充斥之地。自我朝定鼎，痛加剿戮，山海巨盜以次平定。百數十年來，休養生息，民物滋豐。諸蕃來朝，貨貝雲集。魚鹽蜃蛤之利，甲於天下。洵海上之樂土也。逮乾隆五十四五年後，盜賊復起。禍緣安南夷主黎氏衰微，阮光平父子篡立，兵革不息。國內空虛，招致亡命。崇其官爵，資以兵船，使其劫掠我商漁，以充兵餉。名曰採辦，寔爲粵東海寇之始。其時太平日久，水師懈弛，各將官緝捕不力，商漁失業。從賊者多，地方官亦不能杜漸防微，而接濟銷贖，諸弊無地不然。洎乎光緒既亡，羣賊無主，爭爲雄長，遂蔓延而不可制。若今之烏石三總兵保東海八阿婆帶諸賊，皆安南巨盜陳天保、莫觀輔等之頭目也。嗣是以來，添造戰船，命將出師，已三十年。勞費亦云久矣。而盜賊如毛，訖無成效。統計一歲之中，我之擒賊極多，不過千餘名耳。而賊首沿海一招從者，如蟻彼之船支，不待打造也。皆得自漁商彼之食貨，不待經營也。皆得自劫掠海洋之路，熟若門庭。波濤之險，安如平地。我師轉形怯懦矣。兵去則分據各港，無求不獲。兵來則連幫抗拒，莫之敢撓。我師轉形困瘁矣。又以海船全憑風力，風勢不順，雖隔數十里，猶之數千里。旬日半月，猶不能到也。是故海上之兵無風不戰，大風不戰，大雨不戰，逆風逆潮不戰，陰雲蒙霧

不戰日晚夜黑不戰暴期將至沙路不熟賊衆我寡前無收泊之地皆不戰及其戰也勇力無所施全以大砲相轟擊船身簸蕩中者幾何幸而得勝我順風而逐賊亦順風而逃一望平洋非如陸地之可以伏兵獲也東西南北惟其所之非如江河之可以險阻扼也必其船傷行遲我師環而攻之賊匪計窮半已投海然後獲其一二船而餘船已飄然遠矣倘值日色西沉賊從外洋逃遁我師不敢冒險勢必回帆收港故其殄滅最難統計出師以來各憲籌海之策大約有三其一曰剿謂賊匪罪同叛逆及今不除後將愈熾剿之誠是也顧不操乎必勝之謀與之以不敗之具官兵其肯用命乎且何以免其藉口也其一曰撫謂連年剿捕無功勞師糜餉伊於胡底撫之誠是也顧不俟賊匪窮而求我而先誘以官職招以金錢彼謂官司猶有能乎且何以懷茲允而杜邪心也其一曰守謂賊之服食器用何不一資諸內地嚴斷接濟則不擊自敗守之誠是也顧不備講乎守之道瀕海四千餘里可勝守乎擇地而守之則顧此失彼逐段而守之則備多力分兵家所忌恐非萬全之計也之三策者皆至當不易之理而卒未能平賊毋亦行之未盡其道乎方今兵力疲勞之後強弩之末難穿魯縞又前年十一月李提軍沒於蔡牽去年五月林總兵沒於張保覆

軍殺將兵氣不揚亦已極矣非大加一番振作恐賊匪未易即平況各憲未嘗身歷重洋一切情形僅得之傳聞之說章自效力四年三次出洋親冒矢石於風濤之壯厲危險海道之難易遠近各股賊匪之大小強弱與夫官兵之辛苦才否雖未能備悉淵微亦已叢知大略茲逢虛懷若谷詢及芻蕘謹將見聞思慮所及撮爲籌辦海匪事宜十有八條以備採擇焉

一戰船宜派本管之武弁監修也查前憲吉公任內修造船隻皆用出洋弁兵監修工程尙屬寔在嗣因有不肖弁兵意在需索匠人與之錢則諸事順手否則件件挑剔遂罷弁兵專用文員修造工竣之日稟請驗看合式即令武弁接收費用雖稍減於前而工料寔不如舊蓋船工最爲深微固與不固非一時外觀可得而盡一出大洋巨浪掀簸真形畢現矣章前因帶領紅單船百號出海與舟師相從兩月見各將官坐船日夜戾水數百桶譬驅老牛羸馬鬥豺狼於崇山峻嶺之中庸有濟乎毋怪其沿海停泊而不得力也夫船者官兵之城郭房室車馬也船果堅寔以戰則勇以守則固以追則速以衝則堅反是則凜凜焉憂沈溺覆亡之不暇安望獲賊憶在洋時見林總兵坐駕海安四號一船堅緻牢寔行走快捷賊匪望而生畏詢之爲蔡延

芳所監造可知監工得人一船可收數船之用不宜因一二弁不肖遂謂人人皆然也應請將船隻次第撤回徹底興修即派該管弁兵監修彼其身命所關自不肯聽匠人偷工減料如有需索指名揭參至於料價必稍增益應用藩庫發足毋令承修之員賠累而後工程可得而固此爲剿賊第一要務不可不倍加留意也

一篷索旋舵桅木宜加料製備也大海之中浪之起也船如升天浪之落也船如墜地一物不固即有覆溺之憂憶與舟師相從東西洋面凡三千餘里一遇大風舟師即有折桅者一船折桅全軍失色雖賊船唾手可得亦必舍而收港又不可棄之以資賊也必求木易之三四日後其工乃竣而賊已從容遁矣迨行三五日追賊將及即莫不然更行八九日又莫不然此所以出師兩月不獲一賊也應請於篷纜旋舵加料修備每船并多給篷席繩纜一副以備不虞灰麻釘油等物件件寬爲預備其頭大桅尤關緊要即不能全用大木亦須幫鑲結寔此皆官兵性命所係不可以爲細故而忽之也

一戰具宜逐件精良也洋海之戰莫烈於砲以大爲貴從前賊見官船皆奔避不戰爲砲少也數年來切我砲台擄我官船及商夷船隻砲位已不可勝用矣其大者至

四五千斤我師之砲大者不過二三千斤勢不如賊所幸兵丁施放較賊精熟惟須多備鉄釘參差束縛大如砲口令軍士於近賊時入砲施放一發可傷數十人比砲子爲更烈此外加藤牌鳥槍長刀短刀竹槍之類均須備足至過船拿賊莫妙火攻但我用火賊船亦用火必我之火倍烈於賊倍速於賊然後我先燒賊而賊不能燒我聞前浙江李提軍火攻之法另用小船預貯硝磺柴草臨時發火駛燒賊船此古法也惟是海上風濤迅厲火船未必便能近賊即近矣賊以長竿撞拒浪頭一湧大船賊船各開數丈斷難得力莫若仍照今法用火纜噴筒爲良查賊船火礮受藥五六舢噴筒大徑四寸餘長八九尺我師火礮受藥不過二三舢噴筒大不過徑寸長不過二三尺何以勝賊兵法云知彼知己百戰百勝又云器械不利以其卒予敵也應請製造亦如賊式罐筒之中加辣椒川烏斑茅虫等末毒煙所到賊已昏倒惟製造須密勿使泄漏更有火桶火斗二物受藥愈多火焰愈烈須令軍士多爲預備於逼近賊船時携上頭桅奮力搖擲其拋擲火罐亦須上桅方能及遠三者之用死生勝敗決於須臾必習練精熟方能先發制人但得二二三件及賊賊必紛紛投水其船可得矣

一口糧宜預發半年也查向例水陸兵餉皆預發三月惟是海洋路遠往返動經一兩月前之領者方回後之領者又將復去徒滋跋涉每於追捕吃緊之際輒因糧餉不繼停泊以待或因糧餉將到遠去恐其相左觀望徘徊往往緩不濟急夫事幾之會間不容髮遲之一日雖勞費經年不足追其前效嗣後應請一發半年交該將官隨時支給俾得多備薪米則心胆自壯可以窮追絕遠矣

一戰兵應請添配也查向例捕盜米艇大船配兵六十名中船五十名小船四十名數原不少惟是米艇長大每船掌舵者須六七人管頭篷者須八九名管大篷者須十餘名又每船砲位多者十七八位少者十二三位每位派兵三名數恒不敷其火罐噴筒藤牌鳥槍等物往往不能兼顧倘遇賊匪窮而相搏後船接應不及兵丁慌亂輒先跳水從前覆轍可爲明鑑而賊匪小船六七十人中船八九十大船百二三十人其盜首之船必百七八十人每見我師追及盜船見其槍刀林立輒逡巡而不敢過蓋欲過賊船必先保護本船過船人少則不能殺賊而反見殺於賊過船人多則本船空虛賊匪乘虛而入必致失事故自用兵以來獲賊不爲少矣而著名盜首從無一獲皆原於此凡盜首之財貨充積兵丁竄不思獲無如衆寡懸絕故憚而

不前也夫擒賊必先擒王得其王而餘黨可散嗣後應請大船配兵百名中船配兵八十五名小船配兵七十名人數既多軍心自壯而後賊首可擒至水師不敷配撥應即招募諳練鄉勇令弁兵隨事教導亦可得力也

一將弁須激勵鼓勵也古者用兵必有不次之賞以勸衆心亦必有不測之誅以肅衆志自盜匪滋擾以來各將弁涉歷風濤身經百戰與數十戰不等皆水師熟練之人特以在洋日久勞不得息又無重賞重罰以振動之未免日形疲鈍應請多方磨厲以發其鋒務得其誓效死力有進無退而後已出洋以後令該將官與監軍委員詳記功罪某日某人打仗奮勇某人先近賊船某人殺賊若干獲賊若干或火攻得法或攔截有力或策應便捷一一開報大則立予超升小則給予功牌獎以嘉語遇有升遷缺出論功不論俸而在營者不得與之較如有畏葸不前者亦即揭參治罪庶得人人感奮踴躍爭先至於帶兵大員尤宜優以禮貌布以腹心假以威權而後可責以成效也

一兵丁須振作軫卹也自古用兵在精不在多是故敢死之兵一可當百疲弱之兵百不當一彼盜匪皆亡命之徒一遇緊急齊心舍死格鬥往往反敗爲功我兵各顧

性命危急之際輒去其將官跳水先逃鮮有與將同死者章以爲非威不畏非德不懷查定例出洋兵丁除應得名糧給以養家外每名日給行糧銀五分恩至渥也無如海洋僻遠薪米昂貴一遇歉歲再食或不能飽則衣不蔽體形同乞丐自用兵以來各兵有丁年出海皓首不歸者長與風濤爲鄰更無室家之樂加以功罪朦朧莫由自表殺賊者無賞退怯者無罰受傷無醫藥之資死亡無棺衾之費雖陣亡例有恩卹而文報駁詰具領何年無怪其靡靡不振也應請明定章程功多者立賞以官其次或賞銀牌或賞銀兩仍記其功以觀後效疾病者給以藥資死亡者給與葬費受傷者由主將與監軍驗明輕重分別給賞陣亡者例得卹銀速爲給發如有臨陣退縮者立即斬首軍前庶軍皆感畏不戰而氣自倍於平賊不難矣

一戰船宜添造雇備分路出捕也查現在米艇共百二十號原不爲少無如盜首烏石二烏石大匪船不下五六十號鄭一已死其頭目張保最爲猖獗匪船不下百餘號東海八阿婆帶香山二匪船各三四十號金姑養已死其頭目老藍帶領其衆與總兵保大砲腹匪船各一二十號共計匪船不下三百餘號其餘零星小匪尙不在此數我師未免單弱矣且粵洋四千餘里船少則顧此失彼剿捕仍不得力應請酌

量添造新舊米艇須得百八十號再僱募紅單船四十號分爲四路廣州府屬洋面
一路惠潮二府屬洋面一路高廉雷瓊四府屬洋面遼闊係屬賊巢應分二路每路
米艇四十號紅單船十號餘剩二十號預備抽換修理之用各路之兵即駕各路之
船則海道較熟各營之官即帶各營之兵則約束較易四路並作分合緝捕不論賊
逃遠洋近洋緊緊追躡使其船不得燂水不得取薪米不得買備而我以宿飽之師
更番疊戰不過數月賊黨必散賊首可擒矣

一戰船須常加燂洗也海水鹹澁船底易生蠟壳其在民船每月必燂洗油刷一次
賊船亦然今師船止洗而不燂或燂而不油故行走每不若賊船之速總因弁兵貧
乏無項可支應請酌給燂費俾得乘間燂油其船身紅黑顏色亦須加染鮮明旗幟
亦要整肅庶軍容壯盛而駕駛亦靈也

一監軍應請選派也粵東舟師向無委員前憲王公以將官緝捕不力言多不實始
用佐雜爲委員亦未選派賢能官卑望輕不過具月報代書吏而已應請於丞倅牧
令等官內選派賢能爲監軍紀功錄過以憑賞罰并令密帶銀兩以備緩急賞卹之
用隨時報查取具將弁印領核銷如主將不職亦許列欸稟報似於捕務較爲有益

一海岸防守盤查各事應請責成巡道也接濟銷贓最爲詭密非常住海岸不能得其情僞督府藩臬政務殷繁遠在省城耳目難及知府事務亦多惟巡道職任監司於分則尊於事則簡所有防守口岸盤查接濟銷贓諸事應請責其提綱會同鎮將督率所屬文武常住海口寔力奉行一切食用夫馬另籌公費毋累地方官如果用得其人則行間諜耳目募死士於風雨晦明之夜火焚賊船諸事皆可以將官相機而動又州縣事尤冗雜所管洋面少者百餘里多者數百里一人之耳目精神勢難處處周到應由巡道派委佐貳雜職分段經管給與月費協同地方官弁小心防範凡出洋船隻逐一搜查如於自備食用之外多帶柴米木料釘灰油麻蒲蓆繩纜等物及夾帶硝磺火藥者即行拏究入口時查明有無銷買賊贓仍分別勤惰以爲黜陟於防守斯爲得力惟是口岸之接濟易查而荒村之接濟難查日間之接濟可查而夜間之接濟不可查因地制宜僱募船隻聯紳士耆老爲耳目心腹是則在地
方官之能事者

一保甲之法宜寔力奉行也古法之良莫良於保甲地方官非不遵行但無真精神貫注其中則懸一門牌造一戶籍究屬於事無濟彼盜匪之米粮布帛硝磺蓬索麻

油槍刀等物何一不由奸民接濟保甲果行夫竊有此若輩貪食盜利條告不足禁其姦教化不足格其心惟威之於刑庶幾知斂邇來法網恢恢匪惟同保不坐即正犯亦多幸免蓋緣接濟消贓之人必小有資財一經到案因徒隸役之輩或者陰授以旨往往翻供釋去此辦理接濟之所以難也應請飭令地方官寔力編查一有犯者誅其人沒其家發配其孥務使懲一儆百毋稍姑息至於荒涼寂寞之地尤爲盜匪窩巢地方官之法令威權窮而莫用則保甲之法又屬空談非大加懲創而厘剔之恐未易轉移也

一鄉勇宜團練也水師旣大舉出捕則內地轉覺空虛恐盜匪飢窮乘間入劫應請於撥兵貼防之外飭令地方官委員督率紳士約保團練鄉勇頻加點閱器械俱要整齊一有盜警嚴密堵禦如有應設砲位之處備價申請果其堵禦有方盜匪自不能入藩籬旣固則盤查接濟銷贓等事亦易爲力也

一沿海船隻宜一體編查也接濟銷贓非船不行議者謂禁止出洋則盜風自息其論至正惟是粵東人多田少半食魚鹽之利概行禁絕則貧民無以爲生從賊益衆况其勢亦有不能悉禁要在地方官於所屬商漁鹽船一體照例印烙編查十船爲

甲互相保結給以印照出入口岸塘汎逐細查驗所有艇漁船夜間不許留宿口外至濱海鄉村小船出入不由塘汎者尤爲接濟銷贓之具盜匪所在趨之若鶩應令地方官設法擇立殷寔之人以爲船總責其訪查夜間總繫一處有不遵者破沒其船通同作弊者誅無赦

一硝磺宜禁私賣也接濟之害食米之外火藥爲最聞盜匪火藥多係購買硝磺自行製配粵東瀕海濕熱薰蒸遠年牆土皆可煎熬成硝而硫磺則不能處處皆產防維較易昔往惠潮嘉應一帶密查硝磺曾於豐順縣雁洋逕地方會同揭陽令及該地文武查得磺坑一區當經具稟旋即封禁又訪得英德縣磺產最爲豐茂官磺之外多有私賣亦即稟請移知南韶連道嚴密查禁數年來盜匪購買頗難誠恐日久防範稍疏爲禍不細應請飭令地方官加意查拿一有私賣立置重典

一海上商鹽船隻應請護送禁止散行也盜匪多劫一船即我師多受一船之害其財貨可食數月其船隻可用數年所不用者大半勒取米糧布帛豬雞硝磺等物聽人贖回愚民罔顧法紀潛購以徃地方官無從稽查也現在惟紅單船與盜爲仇耳其東西兩路商漁鹽船聞其多向盜匪納銀打單故得出入盜中散行無忌而接濟

銷賊之弊即寓其中此害之大者也應請飭令地方文武實力查禁毋聽散行總須彙齊數十號爲一幫就近申請師船順便護送如有散行者准沿途水陸官弁兵役一體拿究加此則盜匪內無接濟外無劫掠不擊自敗矣

一沿海宜添設走役也查浙閩海疆盜賊到境即報知前途便於堵禦粵東遞送公文向由塘汛兵丁二三百里之程半月不到至於盜賊去向並無傳單不過汛兵密稟將官外人不得而知聲息不通水陸隔絕何以圖賊應請飭令州縣即於沿海汛防添設走役每處近者二名遠者三名書手各一名遇盜賊到境探明船隻多少開單露布傳知前途俾官弁兵役紳士鄉民均得預爲防範師船到處亦即傳報並送一切公文每日限行百里緊急日夜限行二百里逾限者重責前途一體接傳不但水陸血脉貫通盜踪瞭如指掌即各幫水師亦互爲聲援首尾聯成一氣其工食紙筆等費由地方官支給報銷事竣裁撤

一賊黨宜招撫也古者治盜剿撫兼施前憲見水師不甚得力盜賊不可勝誅廣開招撫之路其事未嘗不是惟不先之以剿而遽用撫且以官職金錢爲招似我畏盜而非盜匪懼而求撫也業奉諭旨禁止各盜匪亦既聞知矣若輩竄身海洋殺掠劫

奪無所不爲其罪原不勝誅但其中甘心爲盜者固多而被擄脅迫者亦復不少誰無父母妻子之念止以陷身匪徒出則人爭羅致故憚而不敢還耳書云殲厥渠魁脅從罔治從古帝王如天好生之德雖虎豹豺狼未始不網開一面且揆之今日水師情形亦斷不能盡取盜賊而殲之應請奏懇皇上准於出師之日於沿海地方明張告示除罪大惡極之一二賊不准投誠外其餘有不甘爲盜者急早投誠准其免死回家餘財并准携帶有能殺賊投誠及殺盜首投誠者分別獎賞倘仍執迷觀望拏獲之日駢首就戮如此則來歸者衆賊黨漸孤盜首可擊而取也或謂恐其詐降貽禍是則過慮彼之船隻砲械旣已繳收驟欲作惡勢所不能蛟龍失水一夫可制每見盜匪上岸行走多不能速人輒指而目之此輩固無能爲矣况烏合之衆一散難以復聚乎

以上各條戰守並用剿撫兼施而大要總在得人一事得人則一事效事事得人則事事效書曰非言之艱行之維艱章誠知此事之難非一手一足之烈願畏其難不爲恐異日之難更甚於今日至於添兵派船防守口岸一切用度爲數甚巨應請奏明辦理動正開銷其例無可銷者勸諭鹽洋商人捐輸成事與其常費之無窮毋寧

勞而永逸亦願力行何如耳毋偏聽而用舍之不公毋懷疑而信任之不篤行見羣策羣力爭赴功名殄滅鯨鯢慰安聖主未嘗無不可成之事也

復林若洲言時務書

程含章

足下素抱賈生之心作爲時務一書其論五憂也切而中其解七駁也詳而辨崇論宏議疊出不窮而僕前書謂其必亂天下則何也詩曰不愆不忘率由舊章孟子釋之以爲遵先王之法而過者未之有也大抵開叔之君類皆有英明雄略聖神天授之材又以手夷大難斯世之險阻艱難身所備嘗天下之士俗人情目所親覩前代之善取得失耳所熟聞其時佐命之臣又多虎變龍驤識微見遠之士故其坐論廟堂垂諸典則以貽子孫者類非後賢後王之所能及昔宋神宗欲變法司馬君實侍經筵讀曹參代蕭何傳神宗曰漢常守蕭何之法可乎對曰寧獨漢也使三代繼君皆守禹湯文武之舊雖至今存可也由是言之祖宗之法惟小有缺墜者隨時損益之至於大經大法不可變也漢晉以來唐宋元明有不變亂舊章而亡國者乎無有也我朝聖祖神宗繼繼承承一切官禮兵刑監前明而精之法度紀綱纖悉具備誠能守而弗失雖萬年未有艾也即以海防而論慮匪船之出沒無常也於是乎置水

師以鎮之礮臺以守之兵弁有制訓練有方遊巡有時會哨有地檠船載船星羅碁布都守之上轄以參遊副將統以提鎮又有兵備各道以分莅之又有督撫以節制之偷惰者黜勤能者陟疏防者謫失守者誅又慮愚民之表裏爲奸也於是乎編審保甲稽查接濟嚴禁銷贓地方自道府而下至於捕巡皆有詰姦禁暴之責遞相管束如身之使臂臂之使指百數十年太平之效咸在於茲迨乾隆五十四五年海盜漸起禍緣安南篡臣玩光平父子豢賊致寇擾我邊境泊天墜厥命羣盜無主爭爲雄長招致無賴肆行劫掠乃造米艇大船配兵出捕其時太平日久將吏怯懦緝捕不力地方亦不能實行保甲守口員弁因緣爲奸而接濟銷贓諸弊作矣海盜綿延至於今日愈無忌憚焚村莊劫礮臺者歲且再三告也皇上軫念沿海商漁嚴旨責問大憲非無肅清海嶠之心而將官無一果銳忠勇之人責以畏葸不前則曰賊衆我寡也風色不順也聞有一二差強人意者亦止搜羅小醜聊以塞責若大帮洋盜不敢過而問也邇來參革將弁不爲少矣而泄泄者如故即添船添兵以畀之亦屬無濟於事每歲獲盜多不過千餘名而無賴奸民受賊顧募入海者尙不止此所誅者少所添者多勞費伊於何底耶由是觀之海盜之不平非法足累人乃人不奉法

諺曰揚湯止沸不如去火抽薪今日之計止宜就無能之將作量力之謀不必遽言戰也惟專心議守多造船隻招募兵勇分布各港口岸責令將弁日夜訓練把守文武同心力行保甲嚴禁接濟如有疏漏法在必死凡船不經掛號搜查者毋令出入夜間口外之船概行禁絕漁船止許朝出暮歸不容多帶薪米商鹽各船責令水師逐程護送使賊外無所掠內無所援不出半年賊夥必散然後掩其不備殲厥渠魁則盜息而費亦可省足下欲謀人國會不深思遠慮而紛紛然欲取國家之成法一朝變易之如來書云宜簡機深望重大臣一員於閩廣江浙諸省要區開設幕府倣漢唐遺規復辟舉收人才或遣使人採訪或許以自薦一省陸路許選司道三員司道聽選副使二員一主禦寇嚴防接濟一於商船出洋時抽分餘息顧募鄉兵護同上下水路許選提鎮三員分合巡緝各授一軍約配戰船二十米艇十號仍聽各選諮議一員之數策者僕竊思之無一而可今日督撫之權不爲不重矣生殺予奪錢穀兵刑皆其職掌足下又欲別開幕府將廢督撫不用耶則數省事繁非幕府之所能理將仍而不革不受幕府節制耶則事權不一何以圖功將受幕府節制耶無論鞭長莫及緩急難恃以九千餘里洋面責諸一人使懸揣虛擬以圖必勝之策雖呂

望復生不可任此僕竊謂以一省之官辦一省之賊海面情形較易熟習兵將勤惰較易周知呼吸左右較易捷速果其得人安在督撫不可辦賊何必更設幕府事多滯礙耶其不可一也國家取士之法出正途者有科甲有行伍出異途者有蔭襲有詔試有投效有吏員有捐納我皇上親政以來士人上書陳言者苟有可採聞賜錄用皆所以廣收人才也有功者賞有過者罰銓歸閣部重大柄也遷擢以等惜名器也升調以年杜躁進也保薦必書事實防冒濫也其有奇才異能者例許專摺奏請或特旨不次超擢可謂四門洞開矣足下又欲復辟舉之法豈諸路皆不足以得人而辟舉獨可得人乎抑賢人君子不肯應朝廷諸路之求必待辟舉法行然後出而仕乎徒長虛聲無益實效其不可二也若夫使臣採訪惟據聲名則殷浩慶彈冠矣竊恐奔競請託賄賂諸弊如蝟而起難嚴刑峻罰以繩之不得而禁其不可三也課績命官故賢能者奮勇而貪劣者不得進若令其自薦則人皆毛遂吳起矣脫令有一能讀父書之趙括出乎其間足下將疑而不用耶則無以服其心而來天下之賢將舉長平四十萬卒慨然授之耶是戲天下於一擲也夫考試微名也枷杖流辟大辱也密封搜檢棘闈至嚴也而鎗替懷挾之風猶不能禁况立談而取尊官擢厚祿

何事不可爲耶其不可四也司道者百吏之綱維提鎮者三軍之司命皆天子之屏翰大臣也必其人功績著聞才識卓異天子乃簡而授之非如知府副將以下督撫可以奏補也足下竟許幕府自選以爲有合於古者大國三卿二卿命於其君之義不知古者封建諸侯各君其國各子其民故各得命其臣今則郡縣一統無私土無私民安得有私臣哉以閩廣江浙四省悉隸幕府已轄天下三分之一又使得自選其屬則朝廷輕藩鎮強足下能保無樹黨營私尾大不掉者乎其不可五也廣東官制三司之外輔以六道無可增不容減法至善也足下欲減司道爲三輔以二副使何以資彈壓而寄廉訪乎其不可六也賊船之來無定時無定境也接濟之奸非明目張膽也二者之患合通省文武之力猶不能辦足下乃責之一副使乎其不可七也往者招募鄉兵出洋緝捕意謂勝於營兵也詎知聞賊礮聲荒亂無措不戰而潰何則戰陣非其素習又且工價幾何孰肯舍身鬥賊乎足下欲使一副使抽分商人餘息購募鄉兵護同上下粵洋三千餘里一副使豈能盡護即果能護僕猶慮其加賦病民况烏合鄉兵必不得力賊船突至必遭焚掠商人以有限之財供無益之用雖刀鋸橫陳不能從命其不可八也廣東兼轄水師官將一提五鎮六協七參八遊

而陸路不在其數非是不足以資防禦也足下欲減提鎮爲三分之一則海面遼闊終形單弱合之則又顧此失彼其不可九也粵東戰艦舊惟繪艍資以護守形製皆不甚大也至乾隆五十九年海氛猖獗小船不能敵大乃造米艇百號分派各營每遇盜警不敷配駕尙須添顧商船非得已也賊船之來多者百十號少亦數十號足下欲每軍止用戰船二十米艇十號將謂寡可敵衆乎僕嘗半載在洋與賊連戰數次頗知其略大抵外洋之戰與內河陸路異何則汪洋之中一望無際非有山林險阻可以憑扼塞非有林木蔽翳可以伏奔軼其戰也惟恃船隻礮火之多寡大小爲強弱而又有霧有雨不可戰無風大風逆風逆潮皆不可戰必天日清明風力適中師船乃出船身簸蕩礮發多虛幸而得勝我順風而逐賊亦順風而逃不可驟及東西南北惟其所之不可邀截若到黑水外洋或日色將曛我師不得不回帆矣故其殄滅較難要之方戰之時必以船大礮大爲貴故以大船攻小船如以虎驅羊一可當十以小船攻大船如以卵擊石十不當一是故配船之法大船須十之八九小船須十之二三小船者備淺水捉賊之用不任戰也僕方欲添製加倍大船每幫二三號載以四五千斤大礮俾賊不戰自潰足下乃多用小船少用大船謂大船不若小船

之便亦未親臨行陣耳其不可十也若夫用人之道惟於進賢退不肖加之意而已
雖行軍之際使貪使詐亦所不廢要必度彼無背叛之心我可制其死命然後可用
若則厚賞之可也予之以柄不可也足下謂富鄭公欲收兇險之徒量加任用以爲
束縛之計僕謂此特爲小有才智不安貧賤者言耳若夫亂臣賊子豺狼成性雖日
抱而哺之不可馴也要在聖主賢臣防微杜漸有則斷而誅之斯亦何能爲者元明
季君荒淫失道法紀廢弛故使張士誠方國珍李自成張獻忠之徒擾亂天常足下
乃謂其不知收用不知此數人者收而用之有異於莽卓敦溫安祿山之爲耶夫治
天下之道惟法與人足下之於法也欲變易舊章於人也欲收召亂賊有一於此尙
足致亂况兼而有之乎昔王安石博學多聞慨然有匡濟天下之心卒以才偏性傲
以順己者爲賢以逆己者爲不肖遂致流毒播紳禍人家國足下以海門布衣留心
經濟忠君愛民之意溢於楮墨非豪傑之士烏克有此特以間散荒蕪未得備窺盛
朝制度之精遂泥古先已行之效此亦經生之常無足怪者所願從諫如流改過不
吝剛而不復實而若虛則德業日進令聞無窮矣方今制府誓清海嶠特於省會設
立軍工局大頒文告下諸郡縣收羅人才諮訪治道士民中有能出策平匪者許條

列欵要赴地方官呈遞倘格於有司許赴省局投遞果有成效立功予以出身是亦
辟舉之義也足下懷之久矣曷斟酌其辭出而圖之若仍執舊說也僕願且卷而懷
之理愈求精義愈求熟俟夫事理通達心氣和平再出而談天下事未爲晚也

與所屬牧令書

程含章

政莫善於養民養民莫大於水利則陂塘之開不可不急講矣雖然有難焉者今諸
君試號於衆曰吾爲爾開陂爲爾開塘而民必不應也更試號於衆曰本府爲爾開
陂爲爾開塘而民亦不應也更試號於衆曰督撫司道爲爾開陂爲爾開塘而民仍
不應也夫水爲粒食之原百姓甯不知自謀而顧令之不從何哉彼其望利之心不
敵其慮害之心也固已久矣何則一陂之開必合數十百家之人爲之且必請勘於
官而後決之衆心不同可慮也衆論不協可慮也衆力不齊可慮也官司之守候書
役之需索夫馬之供頓在在可慮也陂水之利害不知其何鄉而切身之憂紛然莫
解此其慮之在於始者也工作方與人懷觀望鄉鄰有詬詈之聲銀錢有墊支之累
陂頭甫築而撓之者來矣溝路所經而撓之者又來矣伐人一木一石而撓之者又
來矣讓之則功不可成爭之則訟端立起萬一半途而廢則虛糜之工料衆不與償

跋前疐後轉悔此舉爲多事此其慮之在於斷者也陂幸告成水汨汨來矣近者以其水過已前也則爭遠者以其水難到田也則又爭強者恃力則又爭富者恃財則又爭爭之不已必繼以鬥或傷或死產業破亡且新築之工多不堅實大雨之後沖決必多怨讟紛騰呼衆莫應前累未清後累踵至首事之心力既倦二三年後廢爲邱墟而前功盡棄矣此其慮之在於終者也然則陂終不可開乎曰是大不然余在南雄嘗開陂塘五十有三矣民之慮於始者吾慎圖之民之慮於繼者吾預防之民之慮於終者吾善成之民或朝有請焉而吾夕來矣民或夕有請焉而吾朝來矣肩輿就道不勞僕從不費民財示則親給諭則親書書役不得過問也一陂之勘至於再至於三至於五至於十吾不以爲煩也大寒大暑吾能耐之大飢大渴吾能忍之逼仄之區險危之地十里八里吾能步之陂之未成吾目之所視耳之所聽畫之所思夜之所夢咸在於此往往有緊要關頭百姓未言而吾論先下首事未到而吾已先來陂焉有不成者乎一陂既成百姓見有利無害咸曰吾父母未嘗有尺土於此而如是勞心如是勞身如是費財吾儕小人衣食之資子孫之計能毋勤乎於是強者斂跡

弱者勉力紛紛以開陂開塘請矣今余忝爲郡守所屬各縣民多窮苦竊無可興之水利乎則安得不引爲己責而急圖之也雖然有難焉者郡守牧令皆有地方之責然民之信郡守也恒不如信縣令民之畏郡守也恒不如畏縣令何則守遠而令近守疏而令親也惟冀諸君與余同心以民事爲己事凡有應修提堰應開陂塘之處董率士民勉力爲之并上其事於余余皆捐廉爲倡暇則親往督之以代諸君之勞一馬一夫一茶一飯不以累諸君果其著有成效他日荷鍤成雲決渠降雨諸君將與召父杜母並傳不朽余亦得藉以稍塞吾責豈不美歟抑余更有屬者昔伊尹爲政一夫不獲則曰時予之辜范文正公有言先天下之憂而憂後天下之樂而樂諸君其有見於此乎此意得也則於興修水利何難之有否則與其擾民毋寧寧民其毋以余爲歛怨府也則幸甚

覆方東樹書

名章至桐城人

程含章

月日含章頓首具報方先生閣下夏間屈就校士閱卷獲親塵誨并讀大撰自悵沉頓簿書公私繁蹟不能卒業然嘗鼎一臠已知其旨深稔志氣高亢度越流輩夫豈尋常綴文獵藻遊客濫竽可擬重荷不棄鈍拙賜書千百餘言波瀾壯闊辭句淳古

如捧拱璧循覽毋數相其位置殆崔蔡之流亞耶慨自古文義法不講久矣國朝自侯魏茗文錫鬯卓然成家嗣得望溪在陸荻園諸先輩接起寥寥不過十餘人耳近日臺省宗工暨四方名士都崇駢儷不喜散文遂覺此體幾廢作者既渺知音愈希施愚山之談詩也云去浮艷近古去清態近厚二語世多不信僕謂古文亦然閣下之文庶幾能知所去可以言近矣不識有當知言否耶且夫道德政事文章原出於一中古而後節次始漸歧耳始則政事或合道德或離道德是道德之與政事岐而爲二文章未嘗岐也中則文章或言道德或言政事是文章之岐道德政事爲二仍於道德政事必各合其一也終則綴拾道德政事之浮言而不切於事情是文章之與道德政事言若混之爲一實則歧而三矣人材安得無升降乎此閣下所云俗吏僻儒華文之士違用背憎各矜其能而不相爲用者所由來也斯三等駢肩疊足業已據一世矣烏得挽而還諸古耶不還諸古烏能易其肝腸口舌不諧一世之人而諧一忤世之古人耶蓋爲古文於今日固爲一世所弗爲而爲古人於今日尤爲一世所不肯爲惟其不肯爲所以終於不能爲古今之界劃然分矣竊從今日而上遡春秋孔子時相去二千三百餘年更從春秋而上遡唐虞時相去則一千八百年

耳彼此參較其古多增五百歲焉顧孔子時有二三嚶嚶自喜動稱古之狂士竟爲
闕然媚世者之所嘲笑擯爲躑躅涼涼弗得與世偶然則古人之難爲在二千餘年
以上之古已有然矣遑論於後世乎試斷自漢論之古之時有以名教爲己任者而
天下風節之士歸焉若漢李元禮宋司馬公是也有以宏濟爲己任者而天下方略
之士歸焉若唐姚元之宋范文正公是也有以經解爲己任者而天下訓詁之士歸
焉若漢馬鄭唐孔陸是也有以性理爲己任者而天下道學之士歸焉若宋之周程
朱陸是也有以古文爲己任者天下著作之士歸焉若唐之韓文公宋之歐陽公蘇
公是也有以詩歌爲己任者天下鴻藻之士歸焉若唐之太白子美是也是皆不世
人豪其鋒鋟氣魄俱足以震蕩四海開闔風氣人望所屬譬如星辰之輝斗府方輿
之聳喬嶽一經品題便作佳士名之所在利亦隨之所有偏宕卓犖英彥見擠於俗
人或可冀收於大人得收於大人則彼俗人莫不靡然向風悔過自責向之厭其迂
怪奇古者轉而譽之不離口矣班史指爲利祿之路使然豈無見乎於時而爲古人
尙易降及有明北地主持壇坫詩文東林收羅後生講學因之黨同伐異各爭門戶
馴致毒流縉紳禍延家國聖朝深鑒其弊痛剪朋黨內自閣部大臣外暨封疆大吏

寂無高標揭己采買聲譽確爲天下所指名者杜絕漢唐宋明末造釁端亦無有前
古道義聲氣聞風慕效之盛去其害而并遺其利勢相因耳於此而爲古人戾俗背
時圓鑿方枘較之前古其難倍蓰自非獨立不懼烏能毅然自命如閣下也相晤日
淺無從深悉行止姑就所見以決閣下客粵業爲阮制軍陝山長何太守等器重拂
拭特身未貴耳知己應不乏也既尙其志又艷其遇猥疑古人不可爲乎亦視所自
立耳今於閣下信之獨其所摘漢學破碎不通罔爲傾世氣餒摧壓思欲立說以斥
其妄而自比於孟子息邪說正人心者微有所惑不敢不質左右僕素荒經落殖不
習此學特以平日曾讀諸儒語錄以爲聖道精深廣大沉潛高明吾人各因資稟所
近而入殊途同歸總期不詭於道而止且天下之顯然與道爲敵如彼二氏世人盡
知其害終莫能出一術以消弭之爲君子計正當博求將伯之助羣樹吾道之幟而
乃剪厥羽翼搜索語病而自比於孟闢楊墨禹抑洪水是耶非耶願閣下毋復然也
抑自性學大明學子藉口伊川玩物喪志緒論竟坐空疎一病遍數趙宋南渡克稱
淹博僅得馬貴與鄭漁仲王伯厚魏鶴山四人而已屈指有明亦僅得楊升菴唐荊
川王弇州鄭鶴山四人而已不能多也皇朝崇道右文代代均有御撰文集行世每

怪士子道德經濟詩古文辭件件弗及前古惟於考据一門差勝從國初顧寧人朱竹垞閻毛諸先輩尊尙經古厥後杭大宗惠徵君蟬聯輩出真掩宋元明三代而直接唐漢能留讀書種子一脈夫註蟲魚之愧磊落退之早排之矣顧在今日似屬碩果之幸存耳并此亡之吾道不益孤乎盍熟圖之至如所諭古人之文由於自道所說信是達識少讀賈長沙書見其治安策內所陳敬禮大臣分封子弟數條集中先有有介人精說詩論議俱其平素讀書覽勢一心兩眼獨得所在及其立朝建白用加一番收拾蒼萃融成治策焉耳是以經濟文章雄視百代由此以觀古人文唯求濟於用更不計其醇駁事果切中時病足以利物雖刑名之家豪傑視之直與皇王大道同功證諸諸葛孔明啓迪後主俾其日寫申韓可見嗟乎五尺羞稱管晏畏談申韓設在後儒即或洞悉其妙亦惟陰取其術以自利而訖口不肯道矣此古人因時立教醇駁不掩非獨用之有效而心地光明亦弗可及焉律今八股家言篇篇內聖語語外王邊問他日從政即就當前持躬接物竟無一處用着斯其言之弗效曷足怪乎閣下乃克直道所見發前賢之所未發負此高世之見一旦遭魚水慶會坐而言者起而行將見樹竹帛之功而鑄金石之烈黼黻明盛傳之無窮買臣五

十而始富貴公孫六十而取丞相大器晚成由來舊矣鷲鳥將擊先戢其翼閣下甫當強壯豈徒托名山著述程勳積於翰墨哉直需逢時得志耳盍少安之獨是閣下厚自期許不屑以其所學干人而下夷媒鬻猥見存顧稱引魯卓一切賢吏以相獎藉躋僕上與古人次比而云文蹈兩漢不覺色駭汗潰緬維閣下非諛人者而云云乃爾毋亦過采道路游談而根觸其君子道善之樂乎且愧且感自揆不足克副閣下之意明矣僕滇南白屋一寒土耳平生佩服先憂後樂之言晨夕不忘幸得策名仕版佩符綰綬復值朝廷清明洊登今職苟不竭盡愚忱何以仰答高厚且前後所泄士民望奢情愨有似赤子之依依慈母此意良不忍負不敢不懃懃懇懇揣量肥瘠以備求安全之策顧今郡守動有銜轡非比漢時得用便宜從事加以德薄能鮮諸凡爲國爲民只憑一點心血力短心長不及古人萬萬所賴洞微燭遠匡所弗逮謝官曠耳庸符閣下之溢美耶但品僕文與漢之爲官文書者稍覺近之僕嚮未嘗就摘鉛槧覃思述作唯釋褐後臚陳利病宣布條教古法新意難望之胥吏之手筆舌遂多信哉其爲官文書也知未足登作者之堂而摩唐宋之壘安在高古典雅如兩漢者之可迹哉抑聞古人有言士屈於不知己而伸於知己虞仲翔又曰人生得

一知己可以不恨持是以觀閣下則知己林立詎有恨焉而諄諄命僕俾知閣下文爲古之文而人爲古之人何也或者閣下知己尙未足伸閣下之屈不無有餘望耶証以閣下知己之在粵者若前所道制軍山長夫固當途之有大力者矣猶未足伸閣下屈况氣力綿薄如僕者寔足以相振耶所爲籌思屢日莫識所由答也已乃憬然有悟私念閣下既以古人自命豈在金膏將意衡纒量交求榮其身而華其外已哉止期僕知天下能爲古文能爲古人有一方先生焉足矣擬彼劉豫州之快心於北海也竄其然乎爰敢率然爲報若此

覆蔣礪堂先生書

程含章

十月朔九日何提軍處送到手書敬悉老夫子提躬安泰川蜀民物恬熙以欣以慰承諭章由州牧不數年開府是邦念高厚之難酬慮盛滿之易蹈慎之又慎謙尊而光躬自厚而薄責於人有是非而無好惡人已兩期無失官民各得其平人才之難亟須磨練鼓舞等因言言金石字字典型修己治人之道無所不該章雖庸愚敢不遵奉教誡以期上酬聖主之恩下慰蒼生之望謹已懸諸座右朝夕朗誦一遍以當面命又由本省州縣而至督撫易處在熟難處亦在熟閣下官粵最久去粵未遠官

常民俗之優劣山陬海澨之利弊過來人一目便了此熟之易也其難則有二焉一則屬吏以大上司情形太熟又極肯辦事必相率不以實告昔日同寅多素不相下之人一時難得其心何以能盡其用然此猶可推誠結之彼信我辦事而不喜事無急功近名之心則不忍欺矣一則從前所蒞之地去思甚切望我良奢南雄連州比比皆然而州縣能行之善政施之道府已非體制所宜何況巡撫是以條教號令毋輕發紳士耆民毋輕見體羣臣者固不能不繩以法子庶民者亦不能但結以恩總以有定見無成見爲妙等因尤爲深入骨裏之言惟夫子智珠在胸爐錘在手故能言之剴切如此韓昌黎詩云想見施手時巨仞摩天揚其夫子爲政之謂乎一易之說章尙不敢自信常當虛心延訪以盡下情二難之說更不敢不以之自勉也竊惟處已接物之道不外天理人情而行之必以誠矜已傲物者非誠急功近名者亦非誠也章心直口快不能容物未免圭稜太露今則年逾六十鬚髮已頽矜氣退而名心忘非復曩時故我同寅中才智者吾愛之敬之拔而進之雖有小嫌不足校也中材者吾教之誨之但得官冊中多一賢即爲上司者少一累取長棄短不必人皆一律也其有貪酷闖冗甘爲民賊而不恥者則無論新人舊人不能不彈而去之矣若

夫兵可戢不可忘當練諸無事之日民可愛不可縱當納之大道之中章嘗以此語爲諸同寅言之昔孔子稱子產養民也惠而即繼之曰其使民也義與夫子之言先後同揆也少見紳士耆老自免許多葛藤而有不容不見之紳士亦藉以訪問地方情形耳至於非分之請固當嚴詞以拒之竊謂爲政有體守令爲親民之官自當接見紳士存問耆老使吾之境內若子弟之於父兄手足之於頭目呼吸上下聯爲一氣而後令之即行禁之即止今爲巡撫固不當煦煦爲仁子子爲義矣又條教號令毋輕發一節屢蒙垂誡章尙未能領會願質所疑竊謂教養二字乃爲政之大綱不易之定理也而今人皆以爲迂闊而不講章則謂聖賢必可學王道必可爲持之堅信之篤每與屬官反覆共談此理前守廣州自作教養勸懲告條以示民書坊中刊爲小本人爭買之民間每誦一二語以爲美談或者於風俗人心不無小補及到山東河南亦然鄰省人有抄去者可見斯民直道三代所同安在教養之政宜於古而不宜於今哉人既願從吾教吾安忍拒而不教蓋化民成俗之苦心於是乎在非必有私意於其間也昔王陽明呂新吾湯文正公諸先生皆嘗用此章亦猶行古之道也如此中有別滋流弊之處願夫子明以教我粵東數年來人才寥落繼起甚希培

養造就之功誠不可不急急以圖矣近閱京抄知夫子欽奉上諭署理大司寇回京供職章聞之喜而不寐竊謂上有堯舜之君必下有皋夔稷契之臣然後可成時雍風動之治今皇上聖德如天無慚堯舜而衆正盈朝之日又得大賢在側朝夕承弼真可爲天下蒼生慶也節交冬令北風凜冽伏惟珍懃不盡企馳

與山左屬官書

程含章

夫吏治當晦言否塞之後非掃除其跡而悉去之不可以言治也然而欲變更治必先自變牧令之心始心者政事之本也牧令之心正而地方無有不治者矣山東土田沃衍人心質直仕宦之福地也乃十數年來匪徒滋熾盜賊繁興百姓紛紛紜紜日以告官爲事京控之案甲於天下此豈盡斯民之過哉毋亦牧令好利之心有以致之也傳曰民之所好好之民之所惡惡之此之謂民之父母未有上好仁而下不好義者也乃山東宦場氣習吾甚惑焉當其在省寅僚之燕集賓朋之間談不聞其諮諏治道思作好官惟計較某州某縣孰肥孰瘠日思得一美缺便我私圖有於稠人廣衆中談吏治者則曰彼迂且狂車馬欲其堅肥衣服欲其麗都妻妾欲其嬌妍童僕欲其俊美夤緣鑽刺探聽風聲小不如意怨謗上司甚者播散謠言希圖挾制

轉相倣倣習爲風氣牢不可破一旦印符在手民間之休戚安危於己無與也呼籲
慘怛之聲不足聽也惟預計今年漕米加收若干折價若干錢糧稅契平餘若干不
滿其欲者輒曰民刁民蠻鞭之撻之視同草芥嗚呼此其心尙堪對君父哉尙堪對
鬼神哉無惑乎民以官爲仇而心滋不服也董子曰皇皇求財利常恐乏匱者庶人
之意也皇皇求仁義常恐不能化民者大夫之意也今居君子之位而爲細人之行
其毋乃非國家設官之義乎堯爲天子飯以土簋飲以土銅衣履不敝盡不更爲也
禹爲天子非飲食惡衣服卑宮室孔子稱之身爲百里之宰儉以養廉何患用度不
足耶嘗見廉能之吏上司賢之百姓愛之聲名俱泰用度常覺寬然而貪汚之吏賸
民之膏吮民之血卒之身敗名滅妻子流離天道昭昭報應不爽吏亦何樂乎貪而
不廉哉吾願諸君子一洗謀利之心勤求治理民氣未靖何以靖之民生未厚何以
厚之民性愚頑何以教之詞訟繁多何以息之盜賊充斥何以緝之夙夜兢兢毋怠
毋躁小民具有天良寧不知感即缺分瘠苦亦當量入爲出隨遇而安上司兼聽並
觀自有公道况今聖主英明澄清吏治四海之內六合之中有善必聞有惡必見果
其政蹟卓異何患朱紱不來哉若乃陽爲名高陰圖厚實人之視己如見肺肝是亦

卑卑不足道也

與華陰令張柏軒書

程含章

柏軒先生明府閣下曩聞選刻滇詩心生歡喜急思求得一見以爲快如是者蓋已有年頃承惠賜十部命僕分送同鄉公餘展讀一過竊嘆閣下搜羅之苦選擇之慎法律之嚴品評之當非數十年工夫不能成就用心亦已勤矣雖然何其隘也以全滇縱橫數千里上下數百年作者數百人而僅選詩八卷不已褊乎讀閣下大序深憫我滇人詩集之散佚無傳也深咎諸前輩之不早爲收羅也深嘉袁蘇亭兩集之能殷勤採輯也因受其付託而爲是選選之誠是也顧不因其業而擴充之俾全滇詩人面目發露彰著而乃務爲精約謂詩必渾厚和平乃爲正宗非是即不入選毋乃以意爲去取而失作者之心乎僕竊謂渾厚和平洵屬詩之正則然從古詩人率天賴以自鳴聲分五音豈必盡出和平之句大抵詩以言志作者各有性情各有時地不必盡同要在發乎情止乎義禮而已今夫天星辰日月風雨露雷雲霧雪霜晝夜寒暑未嘗逾時不變要之皆造物之大文不得謂日暖風和者爲天而酷暑嚴寒者非天也今夫地平原廣野山林岩谷江淮河漢草木鳥獸四方之風氣不同要之

皆坤輿之大文不得謂廣大寬平者爲地而坡陀險峻者非地也善夫韓子有言大木爲宗細木爲桶構榦伏儒櫟闔居楔各得其宜施以成室者匠氏之工也玉札丹砂赤箭青芝牛溲馬勃敗鼓之皮兼收並蓄待用無遺者醫師之良也登明選公雜進巧拙紆徐爲妍卓犖爲傑校短論長惟器是適者宰相之方也是故學人之業必取精多而用物宏然後能閱其中而肆其外仁者見之謂之仁知者見之謂之知學詩學道何一不然正不必拘拘一律以相繩也閣下序云舒尺錦可得爛若之觀嘗一鬻可知全鼎之味約可該博之謂也僕則謂一尺之錦何如全幅一鬻之味何如八珍浸假指一邱以爲山一邱何嘗非山然欲舉一邱以該山謂天下之山不過如是不可得也浸假指一壑以爲水一壑何嘗非水然欲舉一壑以該水謂天下之水不過如是不可得也且閣下之爲是選也豈徒自供吟誦已乎固將廣送溲人用以表章前賢加惠後學也如徒自供吟誦而已則由博反約晚年之學理固宜然若以之表章前賢加惠後學則管中窺豹所見能幾何哉細玩是集大抵一仿沈宗伯別裁體例故所選若此沈宗伯別裁亦是晚年所訂其選本之善否僕未有知然僕聞自來之善選詩者於古則莫若孔子於今則莫若高宗純皇帝孔子之說詩也曰興

觀羣怨事父事君而詩之體例不問也今讀三百篇匪特風雅頌氣象不同即風與風雅與雅頌與頌亦各自不同未聞孔子舉不同者而悉刪之也高宗純皇帝之選詩也於唐則取李杜韓白四家於宋則取蘇陸二家聖人之意以爲唐宋之詩美不勝收若每人各取數首或數十首則既無以見唐宋詩人之全并無以見所選詩人之全故擇其尤著者六家各選數千百首則六家之底蘊乃盡而其餘可包舉矣今閣下慮滇詩之散佚選而刻之力能具舉則當廣爲收羅多則一二百卷少亦不下四五十卷如力有不能則當選由前明以至國朝大家十數人各刻數十百首而全滇之精華於焉畢出今拘於沈宗伯之例爲此不全不備之舉甚爲閣下不取也僕觀閣下生平言必忠信行必方正兢兢自守不逾繩尺吾滇之完人也前作彩雲百篇發微闡幽真足慰苦節而植綱常爲功於世道甚大天下後世孰弗共欽其實僕前僅見其半尙所以全本見賜俾長見識至此集弗寶貴也狂瞽之言開罪不小惟閣下恕而教之

寄河南家梓庭中丞書 名祖洛

程含章

梓庭棣臺中丞大人閣下入夏後由濟南豫章兩次奉書均入覽否頃接中州故人

來信知七月間雨水漲發漳衛恒沁同時漫決河北三府被災者十有餘縣業經閣下親往查勘奏請撫卹聲明俟秋杪水涸請派欽差前來會勘商辦爲一勞永逸之計仰見仁心爲質忠藎篤斐此中之緩急重輕自有斟酌權衡動皆中於機會無俟鄙人瑣瑣爲也唯詎切同宗夙承摯愛用敢謬陳所見以備印證採擇焉竊以爲漳衛恒沁四水之漫決雖同而情形各異則施工之大小次第亦各不同有不容不塞不塞則其害愈大者沁是也有不須大塞而不可不加以疏濬者衛恒是也有不宜復塞塞之恐爲禍愈大爲費亦愈重者漳是也沁水頻年漲決助河爲虐今既改道不入於河如果於運道民田兩無所妨則因其勢而利導之以分黃河之勢豈不甚善然而經過豫東二省上下千數百里既不勝築隄防費之繁且其性挾沙帶泥今既奪溜入衛下達臨清從此衛受其害不但有妨於豫省之漕鹽運道即山東之臨清開口亦必被其壅塞而東南六省漕艘皆有阻滯之虞愚所以謂其不可不塞不塞則其害愈大者此也衛恒二水皆出於太行山水源不遠鮮有沙泥向無水患今因山水漲發河無所容故致漫決竊以爲止須補苴缺陷無事大興工作惟河道久不修治河身淤淺一遇水漲即至漫溢似宜加之疏濬俾復深通然當此紛紛工作

之時既不能概用帑金而哀鴻嗷嗷又不能盡資民力似應於寶公河以下向由長蘆商人挑修者仍責令商人速爲挑修其自寶公河以上無關於鹽運者分出段落勸用民力以工代賑惟是賑卹之例每大口日支銀六釐實不足以資養贍似應於賑卹外酌借帑金以贍之每日每工支飯食銀六分不給工價事竣按地畝攤征還欸則賑務河務兩事並舉矣愚所謂不須大塞而不可不加以疏濬者此也若夫漳水雖清濁二源皆起於大行山而濁漳之沙泥特甚溯自皇古以至於今漳水已歷數千萬年從不築隄亦從無水患衆所共聞共見也邇來數十年間河身漸高始有漫溢然其水四散旁出而大溜仍走中溜無冲坑刷坎之威無倒房抉地之怒且其水源不遠三二日後即見消退被淹禾苗得受淤泥愈見芬茂即間被沙壓水退之後便可早種二麥泥土肥美一歲有兩歲之穫故於農民無甚大苦迨嘉慶二十二年安陽吏民慮患不深始議築堤以爲可免漫溢之患而不知束縛水性使不得舒從此漳河紛紛多事無歲不報水災亦無歲不塞漫口旋築旋決訖無善策其決也大溜不走中溜有冲坑刷坎之威有倒房抉地之怒而官民之受害滋深矣是則未築隄障以前漳水漫而不決爲患猶小旣築隄障以後漳水漫而必決爲患愈大則

漳堤之不能復築也豈待繁言而後明哉曾記去年秋間愚離河南時值漳水報決往來鄴下因得詳細訪問當將漳河不宜築堤築則明歲必復潰決之故爲閣下言之後聞閣下親往勘訪以鄙言爲然奏請毋庸築堤皇上聖慮以事關直豫兩省民瘼且係漕鹽運道不可不加詳慎欽派可亭中堂來豫會勘因漳水直走大名大名之民咸所不願故仍以築復故道具奏三月而後成功夫以素由河南行走之漳一且改由直隸直隸之民不願夫固其宜築復故道於理爲順聞今年漳水之決仍走大名築而復之豈容再議且愚非不知漳隄不築之有害也亦非不知漳堤不築之爲害不細也然而天下事兩利相形則取其重兩害相形則取其輕愚嘗取漳水之源流而諦思之而知其不可復築築之而勞費將無已時也何則漳水由河北歷直隸以達山東今既潰決將止築其決口耶抑將未經漫決之處而并築之耶如止築其決口而置決口上下於不問則水必決於不築之處是築猶不築也若并其南北兩岸而全築之則工費甚巨責之於民民力斷不能勝其勢必出官帑而後可約計河南工費須得一二百萬河南既築則直隸亦宜接築不築則數年之後漳水又將決於直隸矣直隸既築則山東亦必接築不築則數年之後漳水又將決於山東矣

三省皆築非數百萬金不辦既費數百萬金以築之則必添設數廳員以守之每歲
弁兵之費歲修之費搶險之費又須數十萬金從此又添一漳河工程矣國家之經
費有常現在東南兩河及永定等王每歲所費業已不貲豈可復添一河工哉且漳
河亦止太行山下衆水之一耳即如直隸境內若滹沱若子牙若白若趙若定若沙
小河不下十餘道而皆無堤何獨於漳而必堤之哉竊謂漳河改道但得無妨於運
似宜因其勢而利導之不當復築即築恐亦不固去年之事是其明驗諺曰前車之
覆後車之鑑不可不深長思也如曰不築則恐大名之民不願則又不然漳水之由
豫由直唯其性之所便耳在官民則有彼此之分而在國家視之均是王土均是王
民但當籌計大局安有此疆彼界之殊耶閣下具通壅撤壅之才有識微見遠之慮
當此遣大投艱之日知必有定識定力爲國計民生計長久者愚以拘牽迂曲之人
而揣度情事於數千百里之外譬之瞽者觀山壘人聽水會何當於聲色之大唯閣
下酌而處之與時宜之并將籌辦機宜隨時示知以慰飢渴推重者之心而且爲河
北之民慶更生也則幸甚

致楊邁功中丞書

程含章

邁功中丞二兄大人閣下昨者因公到郡獲登君子之堂瞻仰道容備聞清誨十數年欽企之忱藉以稍慰兼承賢喬梓疊次枉顧惠我書籍飽我盤殮讀太封翁中憲大夫墓誌銘知閣下之履盛德而享大年淵源有自譬之松柏梓楠培其本而固其根則枝葉之暢茂條達正未有涯也可勝欽羨承示金谿縣志匆匆未及備閱僅取存訪一卷併小序凡例一則讀之具見令弟先生用心之細秉筆之嚴於慎重名器之中仍不失忠厚待人之意知人論世不當如是耶顧區區之心尙有未愜者此存訪數十人之載在前志理學文苑孝義隱逸中已數百年於茲矣其子若孫即據以爲推尊其祖之鉄案炳據今因其記載簡略或年分官名舛錯或語涉浮誇不見正史逐一摘出另列存訪一門雖未遽屏諸賢人君子之外而其人之是否可取尙在懸而未定其子孫能忽然已乎竊以爲孔門高弟七十二賢皆深通六藝之文而行義不盡彰彰可考至今從祀不絕其在論語中若冉伯牛身列德行之科惟傳其有疾而孔子惜之之語其餘無傳焉逸民明列七人而夷逸朱張不見經傳夷逸尙有孔子論斷朱張則並論斷而無之春秋載紀子伯群子盟於密語多闕文與夫郭公夏五備載於篇此其尤大彰明較著者也且不獨經書爲然也史亦有之前漢書記

吳公治平爲天下第一而名已失傳後漢書載汝南黃憲僅傳當時賢人贊美之辭而懿行嘉言闕而不著則記載之文錄前賢於數百年人徃風微之後或缺略而不全或傳聞之失實事所恆有不足爲怪且夫君子之處世也行欲其方而智欲其圓君子之論人也善善則從其長而惡惡則從其短豈以是博長厚之名哉仰仁人之用心有不如是則不安者今此數十人即明知不盡可信然存之於心可也筆之於書不可也修國史而疑而正之可也修邑志而改易前規不可也況以邑人而修邑志尤易招怨今將其久定之志而區而別之使不得附於賢人君子之列則強者必怒於言弱者必怒於色矣故愚意以爲此數十人者止宜一切仍舊使其人而有可信耶付諸信以傳信之例可也使其人不無可疑耶付諸疑以傳疑之例可也本屬前定之局毋滋衆口之疑昨將此意託令郎世兄代白聞閣下不加怪責謂其言爲有理仰見大君子之心鑑空衡平初無執着但不知鄙見之終能有合於高明否也用布愚忱伏惟鑒察不宣

致黎湛溪河帥書

名世序

程含章

湛總先生閣下曩過彭城辱承兼程趕來暢談竟夕將江西之吏治民情詳悉告知

俾此心稍有依據而僕兩載闕別企慕之忱亦藉以稍慰感何可言頻行復承賜前明徐儒東先生所著潞水客談一卷途中無事取而讀之先生深憫北方水利之不興也水患之不除也東南之民力竭也西北之邊儲空也慨然以當時之國計民生爲己任洋洋灑灑累數千萬言其論十四利也詳而盡其解客疑八也辨而晰其進屯邊之三策也深得自古屯田之精意雖使充國復生武侯再起不易斯言矣雖其中不無窒礙難行之處然可用者十居七八不可用者十之二三亦在人之斟酌而採取耳先生之言曰西北之人方苦水害而不知水利水之在天壤本以利人非以害人也聚之則害散之則利棄之則害收之則利尤與僕前在山東勸民多開渠塘以消水患之意合反覆尋繹竊嘆先生以絕大經濟絕大學問絕大文章而不克效用於當時也又嘆當時之君若臣既已用之有效乃以蜚語中傷墮棄成蹟而不悔也又轉恨僕生不同時不得與先生講明而切究之也今閣下坐先生數百年後而爲先生重刻此書分布海內是即心先生之心而先生之不克見知於當時者猶克遇知已於今日也拜領之餘可勝欽服竊念北方水利始於元之虞文靖公至明儒東先生而大暢其旨而卒不能行然尙可諉之曰上無聖明之君下無賢達之臣故

至此至我朝世宗憲皇帝以聖神文武之姿主持於上又得怡賢親王與高安朱文端公贊襄於下選用才俊爲屬大興直隸水利分設四局經理三年用銀數百萬兩開田七千餘頃可謂千載一時大有成效矣乃怡賢親王薨逝後曾不數年而荒廢殆盡其故何哉且夫小民之趨利也如水之就下雖嚴刑峻法猶不能禁也苟水利之有便於民何致棄成功而不悔乃旋作旋廢毋亦天時地利土俗人情與夫牛種器具之實有未便者乎何則種稻必資雨澤東南山多春夏積陰故常多雨播種栽秧可以按節而作西北地皆平坦春夏雨少栽插難以及時苟過其時秧節已老不便一也杭稻須常得水養非如雜糧之止須土潤便能發生也東南土性堅實隨處可以開塘蓄水西北則沙土浮鬆水易滲漏即日鑿深丈餘水亦不漏而一遇大雨四面之沙泥隨下塘易淤淺愚民以常須挑浚爲苦不便二也北方之不種杭稻己千數百年其民之心腹腎腸皆不願食稻飯亦不願種稻穀即用南人教之而非其心之所樂則學亦不精其收必不稔彼覺勞苦數倍於雜糧而收穫反不如雜糧之多則精神易倦不便三也稻田之工作較多非如雜糧之可以鹵莽而耕亦鹵莽而穫也每當耕耘收穫之時家中之父子兄弟不敷工作必須添雇而四顧鄉隣無一

熟者即用南人往助亦焉能處處給足而南人僑寄於斯心先猜疑其無工作時則又無以存活不便四也水田必須牛耕非如陸地之可用驢馬也北方水草不便蓄牛爲難購買自南價值必貴且又不善飼養陰陽燥濕之間易致倒斃一家牛斃則人人憂慮父子怨咨妻孥愁嘆反怪官司之苦以所難不便五也水田之農具多端與陸地異北方木鐵之類購買較難匠作亦不熟習即起南匠往造而水火料物不能一一如南則遷地弗能爲良且如水車一件乃家家必需之物但使分寸稍差即礙而不合用頻頻修整工匠難求遲悞已多有悔心矣不便六也具此六不便雖使南人數百家往而耕之未能事事如心亦覺用力多而成功少則退然返矣然則西北本帝王溝洫之區而古今之情形不同水利之屢作屢廢其在斯乎其在斯乎且即以三代而論詩三百篇中咏黍稷者十之八九而咏杭稻者十僅一二然則三代時亦何嘗盡種稻穀哉僕竊謂居今日而復講北方水利徒滋勞費無益於事惟水患不可不除水患除而水利即在其中必先以濡東先生之書教導士民俾其心安意肯共知此中真有滋味而後水利可興但亦止宜於水泉之鄉恐不能如濡東先生所云徧西北而皆可行也然先生以竭忠盡知不得一試之餘猶懃懃懇懇不忘

君國以冀幸其言之可售而再疏以請者之或有其人也非存禹稷已溺已飢之心能若此乎世有其人僕將北面事之世無其人僕將瓣香奉之今直隸之水患深矣孰是孺東先生爲聖主一釋憂勞耶迂腐之言是否有當惟閣下進而教之則幸甚

復幕客某書

楊昌

在工次十餘日矣委官四五人分護各隄僕疲於奔命久住隄隄風薰日炎而日黥黑飢而食則壺漿列礎杵間類農家之饑深宵露坐假寢隄下茅屋魂夢常驚我時自隣之頃接來書言我費心費力費錢無一不費足下憐我猶我之自憐可感也既而思之惡乎用憐爲也生人之境順與逆二者而已因順逆而苦樂生焉顧境之有順而不能無逆者天也吉凶榮辱有乘除焉人無如何也至人之苦樂惟人自主之身當晏逸誰云非樂中有苦境焉視之爲苦可也身當憂患誰云非苦中有樂境焉視之爲樂可也惡乎用憐爲耶且吾今日之逆與苦自其宜也食租衣稅願指氣使垂二十年矣平而陂伸而屈天之道也僕之不敢視爲苦而竊有所樂者抑猶有說焉身任其萬難心勞於百折然後盤錯深而文章生閱歷久而識力定易所謂窮則變變則通孟子所謂困於心衡於慮也僕雖不才心竊慕之且夫天道既有順而有

逆矣安見人事之不由困而之亨乎盈虛剝復亦有乘除焉惡乎用憐爲耶承示爲
強詞自慰并復前意幸勿以狂妄見哂

與漢南同官書

潤泉鄂中丞己丑孟陬檄下到郡諄諄以察吏安民是問屬慚承乏三年未有一得
聊即夙夜所以自箴者謹陳大略並述之以就正諸同僚竊聞政在得人以億萬生
靈之身家性命而付托於牧令一身精神不到之區即弊竇叢生之處雖不遑暇逸
欲求案無留牘野鮮冤民猶有不能又况利慾薰其心晏安鳩其性不念赤子之嗷
嗷待哺窮黎之奄奄欲斃縱倖逃糾於八法能無抱愧於五衷州縣爲親民之官知
府有表率之責若亦不念切民瘼躬先刻厲能不有忝厥職自負初心乎漢中士風
質直民氣惇龐亦頗知法知恩易於化導祇恐執法者法非其法市恩者恩非其恩
耳自丁巳以來三十年之間三經兵燹元氣未免剝喪急願得仁廉之吏有以煦嫗
而漸摩之除暴虐安善良勸課農桑振興學校弊去其所己甚利還其所固有庶幾
民氣稍舒民風可以蒸蒸日遷於善此迂闊之談固知無裨於治譜抑心所謂危不
敢不以告者諸同好其何以教之

再上宋芷灣師書

戴綱孫

月之十日從雪田處奉到郡中所寄賜題亡婦墓碣一通題詞二語發函伸紙感與慙并何德何能恩私橫被銷肌糜體未足云酬昔曹盱女上虞之碑外孫幼婦苟臨兒東海之碣女郎世子並以鐫華石墨昭紀鴻茂當時弁頰後撰烏奕是故世有死而賢於生亡不異於存者恃附名哲圖厥不朽也伏惟夫子以泰山北斗之望爲瓊瑤玉佩之辭親杼藻翰賁暉元壤亡婦雖生而閔寂已死而光昭魂而有知欣斯榮寵綱孫之遇夫子與夫子之待綱孫豈復今之人哉古之人亦不多遇也違侍左右五更薨英積憂之後寸心如冢時則山嶺水涯旋而荷組擔圭又久之而富不如貧貴不如賤又久之而逸我以死勞我以生怪幻因緣緣愁彌眩疊出錯見莫適爲主以茲心緒猥云進業豈非卻步曲行而求及前人者哉不殖將落良滋慨矣回首昔游如在天土今茲孤館抱影無言夫語而不知舍之可也發然後禁扞格難勝惟舉一反三既無獲於後進故師勞功半常有愧於前哲蓋事履之而後知身嘗焉則自見而今而後乃嘆爲人師之苦洵不如爲弟子者之樂也昨讀與齋庭書承示不使一字而華不輒一字而圓矧愚訂頑發矇啓瞶金科玉條座右懸之邇來喜觀范史

輒手一編其文雖不若馬之雄奇班之醜厚而紆回淡宕味有旨哉讀應奉及子劭傳知劭雖與子將同郡汝南而月旦之說是許非應夫子漢書雜詠中題曰應劭恐爲刊誤即請一爲更正之也早欲作書奉封只以上游去年保薦入此月來當見升擢擬遙晉一卮以爲吾夫子賀行自賀焉今且不知消息遂不及待耳絢孫私計欲俟亡婦窆窆已定徐爲家弟成昏至於明年借榻僧寮一空俗事庶可澄心靖志聊爲八九月讀書課藝之功蓋以此時屬有童蒙之誨又無善教之方朋從爾思至雜人事故也抑鬱誰語怊怳無怵道履康強伏惟珍衛不宣

甲申五月十日得吾師楚雄所發書中有賜題亡婦墓碣一通云昆明才子戴鳳裁之妻楊氏墓道光四年五月嶺南宋某題碣題詞二語云生嫁才人非薄命死營高冢爲雙棲旁系云鳳裁誓不再娶余又題此以慰孺人之魂夫以材朽行陋如絢孫而辱蒙夫子厚恩獎藉至於如此絢孫彌滋愧矣懼不克當而又重違師命敬以鐫之墓前因錄此書附識於後